

Jwan' mbli re apóst

Mke'yek Jesús tel' Xa' Mbi Nayon

¹ Teoj xa' ntak toz, * ye's ner jwan' mke'n loa, tya mdej na re jwan' mdobte mbli Jesús nde re jwan' mblo' Xa',

² axta kebe' mzin wiz ngwap Jesús lo be'. Sen' ngol be' yap Jesús, kon Mbi Nayon mnabe' Jesús re jwan' ndablo li re xa' nak apóst Xa', men jwan' mbliá Xa'.

³ Nde sen' ngujla Jesús, xisa mbro'to naban Xa' lo re men nak apóst Xa', na'r toz mod mblo' Jesús liga naban Xa'. Len' cho' wiz mbro'to Xa' lo re men nak apóst Xa', nde mdej Xa' re jwan' nak yalnyebe' chan' Dios.

⁴ Ti gob sen' thita nzi re xa', zya mnabe' Jesús lo re xa' sa na'ryo'd xa' yez Jerusalén. Nhab Jesús lo re xa':

—Bled go' sa kaya' go' jwan' mke'yek Xud na' Dios,† re jwan' xa mdejla na lo go'.

⁵ Tak Juan, liga ben'ta len' nit mblolé xa' men, per go' len' ti plata wiz ryo'le go' kon Mbi Nayon.‡

Jesús ngwap lo be'

⁶ Zyasa re xa' jwan' nzidop tya mnabdi's xa' lo Jesús, nhab xa':

—Xa' Nyebe', ¿Cho naya ngoxo'b be' si'rea yalnyebe' lo yez Israel tedib gob?

⁷ Le' Jesús mkab lo xa':

* **1:1 1:1** Lc. 1:1-4. † **1:4 1:4** Lc. 24:49. ‡ **1:5 1:5** Mt. 3:11; Mr. 1:8; Lc. 3:16; Jn. 1:33.

—Na'ndi'nta go' nye go' cho be' nde cho wiza, ben'ta Xud na' mney tak Xa' ngeno yalnyebe' li Xa'y.

⁸ Per kaya' go' yalne, sen' dib ben' go' ke' Mbi Nayon nde yatej go' xki's na yez Jerusalén, dib lo xyon Judea nde lo xyon Samaria nde axta ploja mdib izyo.§

⁹ Sen' mne nchab Jesús re jwan' re', nzi wi'ta re men ngwap Jesús lo be', mbro' ti xkow mdapa dib Jesús, nde na'ngwi'tra' xa' Jesús.*

¹⁰ Nde laj nziwi' gal' re xa' lo be' xa ndoyap Jesús, zya gax cho re xa' mbro'to chop mbi'† dib xa' nok lar nakis,

¹¹ rop mbi' ya nchab lo re xa':

—Mbi' lo xyon Galilea, ¿Cho kwan liy ngwi' go' lo be'? Le'ga Jesús ta mbro' xij go' re', ta xa ndya Xa' lo be', taxa bere Xa' tedib gob.

Mblo' xa' tib mbi' mkaya' rsin' Judas

¹² Zyasa mbro' xa' yek kox ndole Olib sa mbere xa' yez Jerusalén tedib gob (mde xa' jwan' xapka nda' ley di's ndye men len' wiz jwan' ndryo'xkwen men).

¹³ Sen' mzin re xa' len' yez, zya ngwap xa' len' yo xta' gap ten' mbed xa' nde tya mdyop re xa' re': Pedr, Jakob, Juan, Ndres, Blib, Max, Bartol, Mateo, Jakob xin' Alfeo, Simón xa' cananist‡, nde Judas wes Jakob.§

§ **1:8 1:8** Mt. 28:19; Mr. 16:15; Lc. 24:47-48. * **1:9 1:9** Mr. 16:19; Lc. 24:50-51. † **1:10 1:10** Rop xa' bi' re' nak Ang chan' Dios ‡ **1:13 1:13** Re xa' zelot, nak tib ned men jwan' nchola's toz xa' tola' xa' re men las xa' jwan' nak Israel lo ya' re xa' Rom.

§ **1:13 1:13** Mt. 10:2-4; Mr. 3:16-19; Lc. 6:14-16.

¹⁴ Reta xa' re' thibla' ndyop xa' sa thita ndyodi'sno xa' Dios nde nya'b xa' lo Dios, xija nzo tipla ngol nde noga Marí xna' Jesús nde kon re wes Jesús.

¹⁵ Len' wiz ya, Pedr mdoli xij reta wes nzi tya (tak tya nziga te' thib ayo' nzo thib galka men), nde nchab Pedr lo re xa':

¹⁶ —Re go' mbi', wes na, ndabloga ak jwan' ngeni lo xki's Dios, di's jwan' mtob Mbi Nayon ro rey David, sen' lo mdej David Judas, xa' jwan' mdo'b ned lo re men ta mxen Jesús.

¹⁷ Tak Judas ngok ti xa' ngo xij ná' nde no xa' ngok sin' lo jwan' re'.

¹⁸ Le' tmi jwan' mzena' xa' lo yalnaxa, tmi ya mxi' xa' tible izyo, tya ngob tatho' xa' nde ngoski' xa' axta mbro'che re xti' xa'.

¹⁹ Lo ta mbin reta men yez Jerusalén jwan' ngok, jwan' nasa izyo ya xki's xa' ndoley, "Acéldama", di's ya nak: "Izyo ren".*

²⁰ Tak ta ngeni lo ye's chan' Salmo, jwan' nchab: Nagán tyo liz xa'

nde ngenta cho men yoy.†

Nde noga nchaba:

Tedib men kaya' rsin' xa'.‡

²¹ Jwan' nasa nakin'ka xij na' re' kon' ti mbi' jwan' mdo kon na' lo dipta mketen' kon Jesús Xa' Nyebe'.

²² Xata mdobtey sen' mblole Juan Jesús§ nde axta wiz jwan' ngwap Jesús lo be',* ti mbi' ya kon' sa la'sto xa ná' tej xa' liga mbro'xban Jesús.

* **1:19 1:19** Mt. 27:3-8. † **1:20 1:20** Sal. 69:25. ‡ **1:20 1:20** Sal. 109:8. § **1:22 1:22** Mt. 3:16; Mr. 1:9; Lc. 3:21. * **1:22 1:22** Mr. 16:19; Lc. 24:51.

²³ Zyasa mblo'ya' xa' chop mbi', tib xa' ndole José, xa' ndolega' Barsabás o Just ni men xa' nde tedib xa' ndole Matí.

²⁴ Zyasa mna'b xa' lo Dios, nchab xa':

—Xa' Nyebe', lu nzolo lazo' reta men, blo' lo ná nyen' xanya tib rop mbi' re' mblía,

²⁵ sa xa' ya kaya' rsin' Judas nde ak xa' men jwan' tel' la, tej xki's la, sin' jwan' mbla' Judas por yalke jwan' mbli xa', nde nda xa' ten' nsal' xa' ya xa'.

²⁶ Zyasa mblibe' xa' rop mbi' ya, nde ngobe' Matí, nde mbla Matí xij re si'bthib xa' jwan' nak apóst.

2

Ye'd Mbi Nayon

¹ Sen' mzin wiz ni chan' pentecostes, reta xa' jwan' ndli lazon' Jesús thita ten' nzi dop reta xa'.

² Zyasa xajta mbyen mdez ti bi toz mbro' lo be', xaja ndyez ta nxyo'b mbi toza nde mze len' yo ten' nzi ndob xa' ngotey.

³ Nde xaja ya' bela mbro'to re lo di's, mblatoba yek kad thiba xa'.

⁴ Nde reta xa' mde' Mbi Nayon, mdobte mni xa' xa'xa' re di's, axaja nda' Mbi Nayona lo xa' ni xa'.

⁵ Len' yez Jerusalén nziga' re xa' judí, re xa' jwan' nxobyek toz re jwan' ndli lazo' xa', xa' jwan' mbro' na'r toz re yez.

⁶ Sen' mbyen mxyo'b mbi toza, men toz tir mdyop nde reta xa' mbwan, tak kad thiba xa' nchen xa' xki's xa' jwan' ndyodi's re xa' nzi tya.

⁷ Nde anta nzya lazo' re men nde taja nzoyen xa', nchab xa' lo ta xa':

—¡Bwi' go'! ¿Cho nanakta men lo xyon Galilea re xa' ta ndyodi'sa?

⁸ ¿Cho kwan liy sa xki's na', di's jwan' ngol non' nchon na' ndyodi's xa'?

⁹ Nche' nzi re men Partos, Medos, Elamitas, nde re na' nzo lo xyon Mesopotamia, Judea, Capadocia, Ponto, Asia,

¹⁰ xa' Frigia, Panfilia, Egipto nde re men lo xyon Africa gaxta yez Ciren, nde noga re men yez Rom xa' jwan' nzo nche', men judí nde re xa' jwan' ngolal judí,

¹¹ re men nzo lo xyon Creta nde Arabia. Mbyen na' xki's na' jwan' mni xa', re yalnaro chan' Dios.

¹² Nde anta nzya lazo' reta xa' jwan' toz nzoyen xa', nchab xa' lo ta xa':

—¿Cho kwan nak jwan' re'?

¹³ Le' tipla xa', nxino xa' men ya, nchab xa':

—Ndyus re men ba.

Di's ner jwan' mni Pedr lo re men

¹⁴ Zyasa mdoli Pedr kon re si' bthib xa' nde ne mbrez Pedr, nchab Pedr:

—Reta go' men las na nde men jwan' nzo Jerusalén, ndablo nye go' jwan' re' nde bin go' jwan' tej na.

¹⁵ Na'ndyusta reta men re' ta xa ndli go' xgaba, tak ben' til' naya*.

¹⁶ Che'la jwan' ta ndoyak naya, jwan' re' ta mdej profet Joel, sen' nchab xa':

* **2:15 2:15** esto es las nueve de la mañana en nuestra cultura

¹⁷ Dios nchab, yoloba sen' yoxo'b wiz,

Lan Xbin na yek reta men.

Le' re xin' bi' go' nde xin' got go', nin lor sa tej ora
lo men,

le' re mdyen' go' wi'r jwan' xaja men nzal' lazon',
nde re xa' gox wi' xa' re jwan' len' xkal' xa'.

¹⁸ Nipa na lo go', len' re wiz ya, noga re mos na,
xa' bi' nde xa' got,

chub na Xbin na yek xa',

nde nin lo xa' sa tej xa'y lo men.

¹⁹ Lo be' tan yalnzoyen,

nde lo izyo lo'n re jwan' wi' go',

lo'n ren, bel, nde bez chan' zen.

²⁰ Le' wiz na'toxnitra'y,

nde le' mbe' ak narena xaja ren,

jwan' re' ak sen' tera' yoxo'b wiz chan' Xa' Nyebe'.

Wiz ro toz tir nde wiz lo' chan' Xa' Nyebe'.

²¹ Nde reta men jwan' nyeke' lo Xa' Nyebe',

men ya lya'.[†]

²² Reta go' mbi' men Israel, bin go' re di's re':

Jesús, Xa' yez Nazaret, Mbi' mbloxo'bla Dios lo

go', Xa' jwan' liga ngeno yalnyebe' por re jwan'

nzoyen men, re yalbzye nde re jwan' mblo' Dios,

re jwan' mbli Dios xij go' por Xa', ta xa mnela go'y.

²³ Mbi' ya jwan' mdaya' men Xa' lo re xa' nak

sin', axa nak xgab Dios nde thita ngok go' kon re

men naraxa sa le'ga go' mxen go' Xa' nde mdaya'

go' Xa' lo re men narax sa mbij men Xa' nde mke'

men Xa' lo kruz.[‡]

[†] **2:21 2:21** Jl. 2:28-32. [‡] **2:23 2:23** Mt. 27:35; Mr. 15:24; Lc. 23:33; Jn. 19:18.

24 Le'ga Xa' ya, mblo'xban Dios Xa',§
na'mblaya'd Dios xa' lo yo'b chan' yalguj, tak
yalguj na'nyeda ndenke'y Xa'.

25 Tak rey David mdej kwent chan' Jesús, nchab
xa':

Thibla' ngwi'n Xa' Nyebe' ndo Xa' lon,
tak Xa' ndo lad ban na, nde ngen kwan li gan kin
yoy na.

26 Jwan' nasa nale toz ngo lazo'n nde di's nale
mbro' ron.

nde dib ben na ryo'xkwen lo ta nzo ti jwan'
ngenbed na,

27 tak na'la'd la na len' ba',
nekla ta'a di's gàz bel' Xa' Nayon loa.

28 Lu mblo' lon xomod ban na,
nale toz koa lazo'n lo tyonoa na.*

29 'Wes na, nambi toz nak jwan' re', David xa'
gox lon' ngo pola, nguj xa' nde mbwa's xa' nde
ban' xa' axta nawiz re' ben' naxa nche'.

30 Le' David ngok profet nde mne xa', le' Dios
mke'yek lo xa' le'ga lo bin xa' ryo' ti Xa'† tyob
nyebe' ten' ndob nyebe' David.‡

31 Axta pola mdejla David, le' Crist§ ryo'xban,
jwan' nasa nchab David, na'la'd Dios Xa' len' ba'
nde nekla gàz bel' Xa'.

32 Jesús re' jwan' Dios mblo'xban nde reta ná'
mne ke ta naka.

33 Le' naya, Dios, mbli naro Xa' Jesús, mtob Xa'
Jesús lad ban Xa', nde mkaya' Jesús Mbi Nayon,
jwan' ta mke'yek Jesús taya' Xa' lon' nde naya

§ 2:24 2:24 Mt. 28:5-6; Mr. 16:6; Lc. 24:5. * 2:28 2:28 Sal.
16:8-11. † 2:30 2:30 Xa' tel' Dios ‡ 2:30 2:30 Sal. 89:3-4; 132:11.

§ 2:31 2:31 Xa' tel' Dios

mbla Xa'y yek reta ná', jwan'na ta ngwi' go' nde nchon go' naya.

³⁴ Tak David nangwapta xa' lo be', per nchab xa':

Le' Xa' Nyebe' nchab lo Xa' Nyebe' lon:

“Ptob lad ban na,

³⁵ axta kebe' lín sa re xa' nayi' loa ak xa' xis jwan' tyob nia.”*

³⁶ 'Re go' men Israel, mne go' le'ga Jesús re', Xa' jwan' mke' go' lo kruz, Dios mblilal Xa', Xa' Nyebe' nde Xa' mtel' Dios.

³⁷ Sen' lo mbin re men jwan' re', mden' xa'y len' lazo' xa' sa mnabdi's xa' lo Pedr nde lo ti pla apóst, nchab xa':

—Wesa, ¿cho kwan ndablo li ná'?

³⁸ Zyasa nchab Pedr lo re xa':

—Bla' go' re jwan' narax nak go' nde bere go' lo Dios nde kad thiba go' bro'le lo le Jesucrist, sa ton' Dios re xken go' nde kaya' go' Mbi Nayon ta'la's Dios.

³⁹ Tak jwan' re' nak jwan' mke'yek Dios lo reta go' nde lo re xin' go', nde lo reta men ndo tij; nde noga lo reta men jwan' nchola's Dios na' Xa' Nyebe' kwez Xa'.

⁴⁰ Kon di's re' nde masra' di's jwan' mni Pedr nde mtoni Pedr xa', nchab Pedr:

Ptola' go' lazo' go' lo re jwan' narax ta nzo naya.

⁴¹ Le' re xa' ta mblí lazon' di's jwan' mdej Pedr mbro'le xa' nde ti son milka xa' mbike wiz ya, lo re xa' jwan' nzila.

* **2:35 2:35** Sal. 110:1.

⁴² Nde thibla' nxobyeke xa' re jwan' ndlo' re apóst, thita nak re xa', sen' ncha xa' nde sen' ndyodi'sno xa' Dios.

Mod mban re xa' jwan' mblí ner lazon' Dios

⁴³ Nde axta mbixpa' xa' lo ngwi' xa' re yalbzye nde yalnaro jwan' ndli re apost.

⁴⁴ Reta xa' jwan' ndli lazon' Jesús thipta mbre xa' nde thipta mdi'd xa' lo ta xa' re jwan' mkeno xa'.[†]

⁴⁵ Mtho xa' izyon xa' nde re jwan' ngeno xa', nde ngi'd xa' tmi lo reta xa', axaja nak yalti jwan' ngeno kad thiba xa'.[‡]

⁴⁶ Nde reta wiz thibla' ndyop xa' ten' ndob yodo', thita ncha re xa' liz ta xa', kon yalnale ngi'd xa' jwan' ncha xa', ngencho nabiz chan' na',

⁴⁷ ndli naro xa' le Dios, nde wen ngwi' re mayez xa'. Nde Xa' Nyebe' ndli sa re wiz ndola masra' men xij xa', re men jwan' lya' lo xken na'.

3

Pedr mtodan' thi xa' na'akta tye

¹ Pedr kon Juan thipta nda rop xa' yodo' hor son bzyeba, sen' nchal hor ndyodi's no xa' Dios.

² Tya nchano xa' ti mbi' xata ngol mbi' na'akta tye mbi' nde reta wiz ndatob xa' mbi' ya ro yala chan' yodo' jwan' ndole Nawe Nya, sa tya nya'b xa' yisa gon lo re men jwan' nda yodo'.

³ Mbi' ya, sen' mbwi' xa' ndozin Pedr kon Juan ndoyote xa' yodo', zyasa mna'b mbi' gon lo rop xa'.

[†] 2:44 2:44 Hch. 4:32-35. [‡] 2:45 2:45 Mt. 19:21; Mr. 10:21; Lc. 12:33; 18:22.

⁴ Le' Pedr kon Juan xe mbwi' xa' lo mbi' ya nde nchab Pedr lo mbi':

—Bwi' lo ná'.

⁵ Zyasa xe mbwi' mbi' lo Pedr kon lo Juan, nkembed mbi' nyen' kwan ta' rop xa' ya.

⁶ Zyasa nchab Pedr lo mbi':

—Na'ngenot na plat nekla or tan kaa, per jwan' ngenon jwan'na tan kaa. Lo le Jesucrist Xa' Nazaret, ptoli nde pte.

⁷ Zyasa mxen Pedr ya' ban xa' yisa, mtoli Pedr xa' nde zyaga mbwa' rop ni xa' nde mbwin rop yen ni xa',

⁸ ngotoligal' xa', tolo mde xa' nde ngote xa' yodo' kon Pedr nde Juan, ngete xa', nchat gap xa' nde nda' xa' dyux lo Dios.

⁹ Nde reta men yes, mbwi' men ndye xa' nde nda' xa' dyux lo Dios,

¹⁰ mbyolo men xa', tak le' xa' ndyob ro yala chan' yodo' jwan' ndole Nawe nya, tya nya'b xa' gon, nde nzoyen toz reta men axta nzyeb men jwan' ngok.

Pedr ndej xki's Dios lo re men

¹¹ Le' mbi' ta mdyan'na nala'tirta xa' Pedr kon Juan nde nzoyen toz re men, taja ndebe men lo xa' ten' ndole ro korredor chan' Salomón.

¹² Sen' mbwi' Pedr reta men ya, zya nchab Pedr lo xa':

—Re go' mbi' yez Israel, ¿Cho kwan taja nzoyen go' jwan' ngok? ¿Cho kwan taja ngwi' go' lo ná', cho ndyak go' kon yalne chan' ná' o por nayon nak ná' sa mtodan' ná' xa' re'?

¹³ Dios ta mbli lazo' Abraham, Isaak nde Jakob re xa' gox lon' ngo pola, Dios ya mbli naro Xa' Xin'

Xa' Jesús, Xa' ta mdaya' go' nguja nde na'nkapta go' di's sen' lo ne Pilat lya' Xa'.

¹⁴ Che'la na'nda'd go' di's ndla' Xa' Nayon nde Xa' Gal', le' go' mna'b mblya' ti xa' guj men.*

¹⁵ Per mbij go' Xa' nak xwan' yalnaban, Xa' jwan' mblo'xban Dios xij re men nguj, nde ná' mne jwan' re'.

¹⁶ Nde lo ndlipa lazo' ná' le Jesús, jwan' nasa mbwa' ni mbi' ta ngwi' go' nde nzolo go' re', tak lo ndlipa lazo' ná' Jesús jwan' nasa thiptane mdyan' tir xa' lo ta nzi wi' reta go'.

¹⁷ 'Wesa, naya mnen, na'nyed go' jwan' mbli go' sen' lo mkata go' kon re xa' nak sin' sa mbij go' Jesús.

¹⁸ Per Dios mbli sa tamod ngok di's jwan' mni Dios lo re xa' nak profet pola', sen' nchab xa': Le' Crist nakin'ka rid yalti.

¹⁹ Jwan' nasa, bla' go' reta jwan' narax nak go' nde de' go' lo Dios, sa ton' Xa' xken go', sa tel' Xa' Nyebe' re wiz jwan' nixa yo lazo' go',

²⁰ nde tel' Dios Jesucrist lo go', Xa' ta nakwentla ye'd.

²¹ Xa' jwan' nakin'ka yo lo be' axta sen' yoxo'b be' tokub Dios reta jwan', re di's jwan' mnabe' Dios mdej re profet Nayon, xa' ngo pola.

²² Tak Moisés nchab lo re xa' gox ta mbre pola': "Le' Dios Xa' Nyebe' lon', le'ga xij go' ko' Xa' ti profet, ta xa mblo' Xa' na re', nde Xa' ya nakin' xobyek go' lo reta jwan' nye Xa' lo go'.†

* **3:14 3:14** Mt. 27:15-23; Mr. 15:6-14; Lc. 23:13-23; Jn. 19:12-15.

† **3:22 3:22** Dt. 18:15-16.

²³ Nde re men jwan' na'tonzada xki's profet ya, men ya ryo'tal xij yez Dios.”[‡]

²⁴ 'Nde re profet ngo pola, xata mdobtey kon Samuel nde masra' re profet, mdej xa' re jwan' ndoyak naya.

²⁵ Na' nak re men jwan' nde lo bin re profet ta ngo pola nde noga par na' nak di's jwan' mke'yek Dios kon re xa' gox lon' ta ngo pola, sen' nchab Dios lo Abraham: “Lo bin la li ley' na re liz reta men nzo dib xis izyo.”[§]

²⁶ Tak sen' mblo'xban Dios Xin' Dios, nerla lo go' mtel' Dios Xa' sa kad tiba go' la' go' re jwan' narax nak go' nde li ley' Xa' go'.

4

Mbe' xa' Pedr kon Juan lo re xa' nak sin'

¹ Ben' ndoni Pedr kon Juan lo re men, zya mzin re ngwley', kon xa' nyebe' lo re xa' ngenap yodo' nde re xa' saduceo.

² Reta xa' re', nxi lazo' xa' tak Pedr kon Juan ndlo' xa' lo re men nde mbez xa', ke re xa' nguj toyal ryo'xban xa', ta xa mbro'xban Jesús.

³ Jwan' nasa mxen xa' Pedr kon Juan nde mke' lizyi'b xa' rop mbi' ya tib yal', tak mzyela izyo wiz ya.

⁴ Per bro toz xa' jwan' mbin xki's Dios mbli lazo' xa'y. Ben' re xa' bi'ta mer mkata ti gay' mil xa'.

⁵ Tedib wiz, reta xa' nak sin' ro lo yez, re xa' nak sin' lo men judí nde re maestr nchak ley xki's Dios, mdyop xa' yez Jerusalén.

[‡] 3:23 3:23 Dt. 18:19. [§] 3:25 3:25 Gn. 22:18.

⁶ Noga Anás mbol ngwley' ro, Caifás, Juan kon Lejandr' nde reta xa' ta re xa' nak ngwley' ro.

⁷ Nde mdoli xa' Pedr kon Juan xtow' reta xa' nde mnabdi's xa' lo rop xa':

—¿Cho mda' di's o cho mda' yalnyebe' ndli go' reta jwan' re'?

⁸ Zyasa Pedr, dib xa' mde' Mbi Nayon, nchab xa':

—Go' xa' nak sin' ro lo yez, nde re go' jwan' nak sin' lo men Israel:

⁹ Le' naya go' nya'bdi's lo ná' yalwen jwan' ngok lo ti men nayiz, tak nchola's go' nye go' xomod mdyan' xa',

¹⁰ tej ná'y lo go' nde lo reta men yez Israel, ndablo nye go' le' mbi' ta ngok nadan'na ndo lo go' re', mdyan' xa' kon le Jesucrist Xa' Nazaret, Xa' ta mke' go' lo kruz nde Dios mblo'xban Xa'.

¹¹ Jesús re' nak ke ta mblo'tal re go' jwan' nta' yo nde naya ke ya ngolal ke jwan' mas ntak.*

¹² Nde na'ngentra' cho tedib xa' tola' men, tak na'ngenta tedib xa' lo izyo, xa' jwan' mtel' Dios lo re men, sa toyal lyan'.

¹³ Zyasa mbwi' re xa' nak sin', xa na'nzyebta Pedr kon Juan ndyodi's xa', nde mne re men, rop xa' re' nak xa' mbi' na'mte'dta nde na'ngenod xa' yalchak, jwan' nasa mblibe' re xa' ke liga xis Jesús mketenke rop mbi' re'.

¹⁴ Nde lo mbwi' xa' mbi' ta mdyan'na, ndoli mbi' xij xa', zyasa na'akta ke' xa' yalke yek Pedr kon Juan.

¹⁵ Zyasa mnabe' xa' mbro'te re yon mbi' ya xij ten nzi xa' nde mbyan' ben'ta re xa' nak sin' sa mdodi's xa',

* 4:11 4:11 Sal. 118:22.

¹⁶ nchab xa':

—¿Cho kwan linon' rop mbi' re'? Reta men yez Jerusalén mne men re yalnaro jwan' mbli xa' nde na'lid na' gan ka's na'y.

¹⁷ Le' naya, par na'ryastra di's re' dib yez, zeb na' xa', sa na'todi'stra' xa' le Jesús lo nek thib men.

¹⁸ Zyasa mbrez xa' rop mbi' ya, mzeb xa' xa' nde mnabe' xa', sa nek lud na'todi'stra' xa' nde nalo'tra' xa' le Jesús lo re men.

¹⁹ Le' Pedr kon Juan mkab lo re xa' ya, nchab xa':

—Le'ga go' bli xgab cho gal' naka lo Dios, nerla go' xobyek ná' xisla xobyek ná' Dios.

²⁰ Tak na'lid ná' gan na'tejta ná' jwan' mbwi' ná' nde jwan' mbin ná'.

²¹ Zyasa re xa' nak sin' ben'ta mzeb xa' Pedr kon Juan nde mbla' xa' xa', tak na'ngasalta xa' xomod toti xa' xa', tak reta men yez nda' xa' dyux lo Dios por jwan' ngok.

²² Le' mbi' ta mbli Dios yalnaro lon' ta mdyan'na, nzola xa' masra' cho' lin'.

Re xa' ndli lazon' Jesús nya'b xa' yone lazo' xa'

²³ Sen' lo mbla' xa' Pedr kon Juan, mbere rop xa' ten' nzi masra' ta xa', nde mdej xa' re jwan' nchab re ngwley' nyebe' nde re xa' gox jwan' nak sin' lo xa'.

²⁴ Sen' mbin xa' jwan'na, thipta mbrez re xa' lo Dios, nchab xa':

—Xa' Nyebe' dib nax izyo, lu nak Dios, Xa' mtokwa' be', izyo, nitto' nde reta jwan' nzoy.†

²⁵ Lu mtob di's ro David xa' mbli sin' loa, sen' nchab la:

† 4:24 4:24 Ex. 20:11; Sal. 146:6.

¿Kwan liy nchak bxol reta men?
¿Kwan liy sa re men yez ndli xa' xgab li xa' jwan'
na'lid sin'?

26 Mdyopbe re men nak rey lo izyo,
nde thipta ngok re men nak sin' ro,
sa mbyi'no xa' Dios nde mbyi'no xa' Xa' mtel'
Dios.‡

27 'Tak len' yez re', rey Herodes, § Poncio Pilat*,
re xa' na'nakta Israel nde re xa' nak Israel, liga
thipta ngok re xa' sa mbyi'no xa' Xin' la Jesús, Xa'
Nayon ta mtel' la.

28 Chemod sa mbli re men reta jwan' nakla xgab
la, re jwan' mtan'la lu ak.

29 Nde naya, Xa' Nyebe', bwi' plopa nzeb xa' re
ná' ta ndli sin' loa, jwan' nasa nya'b ná' loa bla'sto
ná' sa yo ne lazo' ná' todi's ná' xki's la,

30 laja ptoga' ya'a sa dyan' re men nayiz, ak re
yalnaro nde ak re jwan' nzoyen men, por lo le xin'
la Jesús Xa' Nayon.

31 Sen' mne mdodi'sno xa' Dios, le' ten' nzidop
xa' mbwin ti xo, nde dib ben reta xa' mde' Mbi
Nayon, nde na'nzyeb tirta xa' ndej xa' xki's Dios
lo re men.

Thipta ngeno xa' reta jwan'

32 Nde reta men ta mbli lazon' Jesús, thita nak
lazo' re xa' nde thita xgab ndli xa', nde nek tib xa'
na'nzoya'd re jwan', che'la thipta ngeno xa' reta
jwan'.†

33 Nde kon yalne ro ndej re apóst xa mbro'xban
Jesús Xa' Nyebe' nde bro toz tir yalwen nkaya' xa'.

‡ 4:26 4:26 Sal. 2:1-2. § 4:27 4:27 Lc. 23:7-11. * 4:27 4:27 Mt.
27:1-2; Mr. 15:1; Lc. 23:1; Jn. 18:28-29. † 4:32 4:32 Hch. 2:44-45.

³⁴ Jwan' nasa na'ngenta nek thib xa' ndyak yalti xija, tak re xa' jwan' ngeno izyo o liz xa', ntho xa'y nde ndeno xa' tmi jwan' mdyoy,

³⁵ nde ndaya' xa'y lo re apóst nde le' apóst ngi'da axa nak yalti ngeno kad thiba xa'.‡

³⁶ Zyasa José, xa' jwan' mtob le re apóst Bernabé (di's ya nak, xa' ngone lazo' men) nak xa' men levita, le' xa' ngol lo xyon Chipre.

³⁷ Xa' re' ngeno thible izyo, mtho xa'y nde mbe' xa' tmi, mdaya' xa'y lo re apóst.

5

Ananías kon Safira

¹ Per ngo ti mbi', ndole Ananías, kon sal' xa' Safira, mtho xa' thible izyon xa',

² nde mne ngol mxen xa' lud tmi nde na'mdaya'd xa' re tmi lo re apóst.

³ Zyasa nchab Pedr lo xa':

—Ananías, ¿Cho kwan liy mda'a di's mnabe' maxu' lazo'a, nchola's la kwin'noa Mbi Nayon nde na'mdaya'd la reta tmi jwan' mthoa izyo?

⁴ Sen' tera thoa izyo ¿Cho nanakte chan' la? Nde sen' mthola luy ¿Cho nanakta tmin la jwan'na? ¿Cho kwan liy ta nya xgab mbala lazo'a? yalkwin' ta mbli ba, namblid lay lo ná', lo Dios mbli lay.

⁵ Sen' mbin Ananías re di's ya, ngob xa' izyo nde nguj xa'. Re men mbin jwan'na mzyeb toz xa'.

⁶ Tya mbike pla or yen', mchal lar or thabol, mblo'ter xa' nde ngwa ka's or xa'.

⁷ Mbri'ta sonka hor mzin xa' got Ananías per na'nyed xa' kwan ngotey.

‡ 4:35 4:35 Mt. 19:21; Mr. 10:21; Lc. 12:33; 18:22.

⁸ Zyasa nchab Pedr lo ngol:

—Ptej lon, ¿Cho yapka mtho go' izyo?

Le' ngol mkab:

—Aa', yapka ngway.

⁹ Zyasa nchab Pedr lo ngol:

—¿Cho kwan liy thipta ngok di's rop ta go' sa kwin'no go' Xbin Xa' Nyebe'? Bwi', le' re or yen' ta ngwa ka's sal' la ndelaba, nde naya, noga lu wer.

¹⁰ Zyaga ngob ngol lo ni Pedr nde nguj ngol. Sen' ngote re or yen'na, mbwi'r nguj ngol, mbe'r thobol, ngwa ka's or xa' cho sal' xa'.

¹¹ Nde reta men yodo' nde men ta mbin jwan' re', mzyeb toz xa'.

Na'r toz re yalnaro nde jwan' nzoyen men ngok

¹² Nde na'r toz re yalnaro nde yalbzye mbli Dios lo ya' re apóst xij re men, nde thita nzidop reta xa' ten' nak ro korredor chan' Salomón.

¹³ Le' masra' re men nzyeb xa' tsal'ta xa' re apóst, per re men yez, wen toz ni men xis xa'.

¹⁴ Nde masra' ndoya'r re xa' jwan' ndli lazon' Jesús, men toza, ngola nde mbi'y.

¹⁵ Taja nche' xa' re men nayiz lo lon' nde lo yalon', ntob xa' xa' ro ned sa lo rid Pedr masa xim Pedr din' yek xa'.

¹⁶ Noga bro toz re men jwan' nzo re yez nzi gax Jerusalén, ndeno xa' re men nayiz, re men nzo mbi narax nde reta men ya mdyan' xa'.

Mchubla xa' Pedr kon Juan

¹⁷ Zyasa mdosa' mbol ngwley' ro kon re xa' saduceo, xa' jwan' nzino mbol tya, mbla yalno lazo' xa'.

18 Mxen xa' re apóst, nde mblo xa' apóst len' lizyi'b low.

19 Le' ti anj chan' Dios, yal' mbye'd xal' xa' ro lizyi'b sa mblo'te anj re apóst nde nchab anj lo xa':

20 —Wa go' nde gote go' yodo', ptej go' lo re mayez di's chan' yalnaban kub re'.

21 Sen' mbin xa' di's re', til' mzin xa' yodo' nde mblo' xa' xki's Dios lo re men.

Laja le' mbol ngwley' ro kon re xa' jwan' thita nak kon mbol, mbrez xa' re xa' nak sin' lo men judí, sa todí's xa', nde mnabe' xa' yayo' re apóst ta nge lizyi'b.

22 Le' re xa' ngenap yodo' sen' mzin xa' lizyi'b, na'ngenta re apost tya. Zyasa mbere xa' nde mdej xa'y,

23 nchab xa':

—Mbwi' ná' saj now' dib lizyi'b nde re xa' jwan' ngenap, nzi xa' le ro lizyi'b; lo sen' mxal' ná'y, ngenta cho nak len' lizyi'b.

24 Sen' mbin mbol ngwley' ro jwan' re' nde kon xa' nyebe' lo re xa' ngenap yodo' nde re ngwley' jwan' nyebe', mbli toz xa' xgab xomod yolo re jwan' re'.

25 Zyasa mzin ti xa' nchab:

—Le' re mbi' ta mke' go' lizyi'ba, le' xa' nzi yodo' nzitote'd xa' re men.

26 Zyasa yub xa' jwan' nyebe' lo re xa' ngenap yodo' kon re men xa', ngwaxen xa' re apóst nde na'ntotid xa' xa' tak mzyeb xa' gad ke mayez xa'.

27 Sen' lo mzino xa' re apóst, mbe' xa' xa' lo re xa' nak sin', le' mbol ngwley' ro mnabdi's,

28 nchab mbol lo xa':

—¿Cho na'mnabe'd ná' lo go' sa na'lo'tra go' le xa' ya lo re men? Nde naya, mdib yez Jerusalén ndoli lazo' men jwan' ndlo' go' nde nchola's go' yek ná' ke' go' yalke ta nguj mbi' ya.*

²⁹ Zyasa mkab Pedr nde kon re apóst nchab xa':

—Nakin' nerla Dios xobyek ná', zyara' xobyek na' men.

³⁰ Dios chan' re xa' gox lon' mbre pola, Dios ya mblo'xban Jesús, Xa' jwan' mbij go' nde mke'nga go' Xa' lo kruz.

³¹ Jesús ya, mbli naro Dios Xa' nde ndob Xa' lad ban Dios, sa nyebe' Xa' nde tola' Xa' men, sa re men Israel la' men re jwan' narax nak men nde bere men lo Dios nde dyon' xken men.

³² Nde ná' nak xa' mbwi' reta jwan' re' nde noga Mbi Nayon mbwi'y, Mbi Nayon ta mda' Dios lo re men jwan' nxobyek Dios.

³³ Sen' mbin re xa' nak sin' jwan'na, mxitin lazo' xa' nde nchola's xa' kuj xa' re apóst.

³⁴ Zyasa xij re xa' ta nzi tya, ngotoli ti xa' fariseo ndole Gamaliel xa' nchak toz ley chan' Moisés nde re men yez nxobyek toz men xa', zya mnabe' Gamaliel mbro'te re apóst le thib atil,

³⁵ nde nchab Gamaliel lo re xa' nzi tya:

—Re go' men las na, jwin bli go' xgab jwan' lino go' re mbi' re'.

³⁶ Tak nera', ngo ti xa' ndole Teudas, nchab xa' nak xa' ti xa' ro nde mkata thap ayo' men mketenke xis xa'. Per sen' mbij men xa', le' re men jwan' mketenke xis xa' mbrya's men nde tyaja ngolo chan' xa'.

* 5:28 5:28 Mt. 27:25.

³⁷ Xis xa' ya, ngoche tedib xa' ndole Judas xa' Galilea, len' wiz jwan' ndyen le xa' re men, taga bro toz men mdonke xis Judas, per sen' nguj xa', reta men jwan' mdonke xis xa' mbrya's men.

³⁸ Jwan' nasa nin lo go' naya, bla' go' re mbi' re' nde na'galta go' xa', tak tez jwan' ta ndlo' xa' o sin' ta ndli xa' ba naka chan' men, tluxa.

³⁹ Per tez naka chan' Dios, na'lid go' gan luxa, ndawi' toz go', nday kon Dios ngeyo go'.

⁴⁰ Zyasa mbli re xa' xgab, liga jwan' mdej mbi' ya. Mbrez xa' re apóst, mdin xa' xa' nde mnabe' xa' na'todi'stra' xa' le Jesús, zyara' mbla' xa' xa'.

⁴¹ Le' re apóst, sen' mbro'te xa' ten' nzi re xa' nak sin', nale toz ngo lazo' xa', tak Dios mda' di's nsal' xa' mbri'd xa' yalti por le Jesús.

⁴² Nde reta wiz nda xa' yodo' nde re liz men, thibla' ndlo' xa' nde ndej xa' ke Jesús nak Xa' mtel' Dios.

6

Mblo' xa' gaz mbi' li sin' lo yodo'

¹ Len' re wiz ya, sen' jwan' toz ndoya'r re men ndli lazon' Jesús, zyasa re xa' ni di's gryeg mbrezno xa' re xa' ni di's hebreo nchab xa', le' re ngol nguj sal' na', xa' jwan' ni di's gryeg na'ndokaya'd xa' jwan' nakin' xa' re wiz jwan' xa' ndabloy.

² Zyasa re thibsen apóst mthopbe xa' reta men ta ndli lazo'n Jesús nde nchab xa':

—Nale'da naka la' ná' na'tejtra' ná' xki's Dios, sa ben' wi' ná' jwan' nakin' re men.

³ Jwan' nasa re go' wes na, ptan na, pkwan' go' gaz mbi' xij re', xa' jwan' wen nzo'b xki's na', dib xa' mde' Mbi Nayon nde nchen xa', lo xa' ya taya' ná' sin' re'.

⁴ Sa le' ná' thibka todi'sno ná' Dios nde tej ná' xki's Dios lo re men.

⁵ Zyasa mbro' lazo' reta men di's ya, nde mblí xa' Esteb, mbi' ndli toz lazon' Dios nde xa' mde' Mbi Nayon, tya mblí xa' Blib, Prokoro, Nicanor, Timón, Parmen, nde Lax, xa' yez Antioquía, xa' jwan' ngolal xa' judí.

⁶ Zyasa ngwano xa' re gaz mbi' re' lo re apóst, sa mna'b xa' lo Dios nde mxo'b xa' ya' xa' yek re gaz mbi' ya.

⁷ Le' xki's Dios masra' ndora'sa nde taja ndoya'r re men jwan' ndli lazon' Jesús yez Jerusalén; noga na'r re xa' nak ngwley' mxobyek xa' mblipa lazo' xa' Jesús.

Mke' lizyi'b xa' Esteb

⁸ Nde Esteb, nak xa' men mde' yalwen nde yalnyebe' chan' Dios, sa ndli xa' re yalnaro toz nde yalbsye' xij re men yez.

⁹ Zyasa pla xa' jwan' ndye yo ten' ndyop re xa' Israel jwan' ndole Mos Mblya', nde pla xa' jwan' mbro' yez Ciren, yez Alejandria, lo xyon Cilicia nde lo xyon Asia, re xa' ya jwinka ngwa xa' kwent kon Esteb.

¹⁰ Per na'ndlid xa' gan lo Esteb, tak Esteb ndyodi's kon yalnchak nda' Mbi Nayon lo xa'.

¹¹ Zyasa mdi'x xa' mka pla men, sa gab men ke mbin xa' mni xin Esteb xis Moisés nde xis Dios.

¹² Nde tamod mtoxol xa' reta mayez, re xa' nak sin' lo men judí nde re xa' jwan' nak maestr ndlo'

ley xki's Dios, mbla xa' xis Esteb nde mxen xa' Esteb nde mbe' xa' xa' lo xa' nak sin' ro lo yez xa'.

¹³ Nde mkwan' xa' pla men kwin' jwan' nchab:

—Mbi' re' thibla' ni xin xa' xis yodo' nayon re' nde xis ley chan' Dios,

¹⁴ noga nchon ná' ndej xa', le' Jesús Xa' yez Nazaret lux Xa' yodo' re' nde tse' Xa' mod gox jwan' mtan'no Moisés na'.

¹⁵ Zyasa reta xa' nak sin' ro lo yez jwan' nzi ndob tya sen' mbwi' xa' lo Esteb, mbwi' xa' xaja nya lo ti anj nya lo Esteb.

7

Esteb ndla lazon'

¹ Le' xa' nak ngwle'y ro mnabdi's lo Esteb, nchab xa':

—¿Cho li re di's ta ndej men xis la?

² Le' Esteb mkab:

—Reta go' wes na nde men nak sin' ro lo yez, bin go' jwan' nin lo go': Le' Dios lo be' mbro'to lo xud na' Abraham, sen' ben' nzo xa' lo xyon Mesopotamia, sen' tera' ya xa' yo xa' lo xyon Harán.

³ Zya nchab Dios lo xa': "Bla' izyon la nde re xa' taa, nde wa izyo jwan' lo'n loa."*

⁴ Zyasa mbro' Abraham lo xyon Caldea nde nda xa' ngo xa' yez Harán nde sen' nguj xud xa' tya, zya ndeno Dios xa' izyo re', ten' nzo go' naya.

⁵ Nde na'mdaya'd Dios izyo re' lo xa', nek thib ble luda; per Dios mke'yek taya'y lo re men jwan' ye'd lo bin chan' Abraham, tenyega zya na'ngenta xin' Abraham.

* 7:3 7:3 Génesis 12:1

⁶ Noga nchab Dios: Re men jwan' ye'd lo bin Abraham, yo xa' ti yez ten' na'nakta yez xa', tya toti toz men xa', li xa' sin' nde na'yaxta ka xa' dib ti thap ayo' lin'.[†]

⁷ Noga nchab Dios: “Na nya'b kwent lo yez ten' ta li xa' sin' na'yaxta ka xa' nde xisa ryo'te xa' yez ya sa ye'd xa' li xa' sin' lon nche'.”[‡]

⁸ Nde msal' Dios xki's Dios kon Abraham, nchab Dios: tyob be' lad men bi'. Jwan' nasa sen' lo ngol Isaak xin' Abraham, mdob xa' be' lad or sen' nzor xon wiz; taga' mbli Isaak kon xin' xa' Jakob nde taga' mbli Jakob kon re tib sen xin' xa', re tib sen xa' jwan' ngok mdan lo Israel.

⁹ Le' re xin' Jakob re', mbyi'nor wes or José nde mthor José, sa mbe' men José yez Egipto. Le' Dios thibla' ndono José,

¹⁰ nde mtola' Dios José lo reta yalti, mda' Dios yalnchak lo xa' nde mbli Dios sa Faraón rey Egipto wen mbwi' xa' José, nde mdob rey José sa nyebe' José lo reta yez nzi Egipto nde nyebe' José lo re men liz rey.

¹¹ Zya ngo win nde yalti toz dib lo xyon Egipto nde lo xyon Canaán, le' re xa' gox xud ná jwan' ngo pola, na'ngenta jwan' wa xa'.

¹² Sen' mbin Jakob nzo trig Egipto, zya mtel' ner xa' re xa' gox lon' xa' ngo pola sa yaka xa' trig Egipto.

¹³ Lo ngok brop gob ngwa xa', zyasa mdej José lo re wes José cho nak José nde tamod mne Faraón cho lo bin nde José.

[†] 7:6 7:6 Génesis 15:13 [‡] 7:7 7:7 Éxodo 3:12

14 Nde mnabe' José ngwayo' xud xa' Jakob nde reta men ta xa', lo reta xa' mkata songal nzo sin' xa'.

15 Tamod mzin Jakob Egipto, tya nguj xa', nde tyaga' nguj re xa' gox lon' ngo pola.

16 Sen' nguj xa' mbe' xa' xa' yez Siquem nde mka's xa' xa' ba' jwan' mxi' Abraham lo re xin' Hamor ten' nak yez Siquem.

17 Sen' ndosin gax be' ak jwan' mke'yek Dios, jwan' ta mda' Dios xki's Dios lo Abraham, le' yez Israel mxyena nde mbya'r toz xa' yez Egipto.

18 Axta kebe' mblatob tedib rey kub Egipto, xa' ya na'mbyolod xa' José.

19 Nde rey ya, mkwin'no xa' re men las na', mtoti xa' reta xa' gox lon' mbre pola, mnabe' rey lo xa' mbla' xa' reta mbed bi'n xa' sa gaj or, nde tamod naya'rta xa'.

20 Le'xa zya ngol Moisés, ti mbed jwan' mbro' lazo' Dios; nde sonta mbe' mxyen mbed lo xna' mbed.

21 Tyaja mbla' xa' mbed gaj mbed, le' mza' xin' Faraón mzyal mbed nde mxen' mza' mbed xajka xin' xa'.

22 Nde mtote'd xa' Moisés lo reta yalnchak chan' men Egipto, ngolal xa' ti mbi' nchak, xa ndyodi's xa' taga' ndli xa'.

23 Sen' nzo Moisés cho' lin', zya ngol lazo' xa' ngwatna xa' re men laz xa' Israel.

24 Sen' mbwi' Moisés, ti xa' Egipto ngetoti xa' ti xa' Israel, zyasa mbla Moisés xa' Israel, mbij Moisés xa' Egipto, tamod mblota Moisés jwan' ta mblino xa' Egipto xa' Israel.

²⁵ Tak ndli Moisés xgab mnela re xa' Israel por Moisés sa tola' Dios xa' lo ya' Egipto, per re xa' Israel na'gyenta xa' cho ta naka.

²⁶ Tedib wiz ngosi'b Moisés chop xa' Israel, nzi yo xa' nde nchola's Moisés na'yod xa', sa nchab Moisés lo xa': "Thita men laz go'¿Cho kwan liy sa ngyo go'?"

²⁷ Zyasa le' xa' ta ngeke'y cho tan' ya, mtobya' xa' Moisés nde nchab xa': "¿Cho mtob la sa nyebe'a nde nya'b la kwent lo ná?"

²⁸ ¿Cho nchola's la kuj la na, ta xa mbij la xa' egipcio na'ya?" §

²⁹ Sen' mbin Moisés jwan'na, mxon' xa' nde nda xa' ngo xa' ten' na'nakta laz xa', lo xyon Madián. Tya mkeno xa' chop xin' xa'.

³⁰ Sen' mbri'd nda'bla cho' lin', mbro'to ti anj lo Moisés xij bel jwan' ndoyol lo ya yis ten' nak izyo bis gax ten' nak yi' Sinaí.

³¹ Zyasa nzoyen toz Moisés jwan' ta ndowi' xa', nde sen' mbike gax xa' sa jwin wi' xa'y, zya mbin xa' mni Xa' Nyebe' nde nchab Xa':

³² "Na nak Dios ta mbli lazo' re xa' gox loa ngo pola, Dios ta mbli lazo' Abraham, Dios ta mbli lazo' Isaak, nde Dios ta mbli lazo' Jakob."* Le' Moisés tolo mxi'd xa' nde na'ngwitra' xa' lo bel.

³³ Le' Xa' Nyebe' nchab lo Moisés: "Bkib yalyid nia, tak izyo ten' ndoa nayon naka.

³⁴ Tak ngwi'n plopa yalti ndori'd yez na jwan' nzi Egipto. Nchon na re jwan' mbez xa', nde naya ndal na sa tola'n xa'. Jwan' nasa, naya, ptosa', sa

§ 7:28 7:28 Éxodo 3:12 * 7:32 7:32 Éxodo 3:12

tel na lu Egipto.”†

35 Nde Moisés ta mblotal xa', men ta nchab xa' lon': “¿Cho mtob la sa nyebe'a nde nya'b la kwent lo ná?” Moisés ya ta mtel' Dios xaga xa' nyebe' nde xa' tola' men, lo ta mni anj lo Moisés sen' mbro'to anj ti lo ya yis.

36 Nde Moisés ya jwan' mblo'te re xa' Israel, mbli xa' re yalnaro nde jwan' nzoyen men lo xyon Egipto, len' nitto' Nane, nde izyo biz, dib thi cho' lin'.

37 Nde le'ga Moisés ya ta nchab lo re men Israel: “Le'ga xij go' ko' Dios ti profet xa na re' nde gon go' di's ro Xa'.”‡

38 Le'ga Moisés ya mdoño re xa' Israel izyo bis ten' nak yi' Sinaí sa tya mni anj chan' Dios lo Moisés nde mbri'd xa' di's lo re xa' gox lon' ta mbre pola, sa mkaya' xa' di's nda' yalnaban jwan' ta ngeno'n naya.

39 Per re xa' gox lon' ta mbre pola, na'ngonta xa' di's ro Moisés, mblo'tal xa'y nde len' lazo' xa' mdob bere xa' Egipto.

40 Nde nchab xa' lo Aarón: “Ptoxkwa' pla dios lo' ned lon', tak Moisés ta mblo'ten' izyo Egipto, na'nyet na' kwan mxak xa'.”§

41 Zyasa mdoxkwa' xa' ti mnab ngon yen', nde mbij xa' ma' yon lo mnab nde nale toz ngo lazo' xa' lo jwan' mdoxkwa' ya' xa'.

42 Zyasa mbla'ya' Dios xa' nde mda' Dios di's mbli naro xa' reta jwan' nzi'b lo be'. Xa nchabka lo ye's mke' re profet:

† 7:34 7:34 Éxodo 3:5,7 ‡ 7:37 7:37 Deuteronomio. 18:15

§ 7:40 7:40 Éxodo 32:1

¿Men Israel, dipta cho' lin' jwan' mdo go' ned izyo biz

¿Cho mbij go' ma' yon jwan' mdaya' go' lon?

⁴³ Che'la nxob yen go' yo ndob Moloc,
nde taga' mbli go' kon mnab mbel lo be' ndole
Renfán,

re mnab jwan' le'ga go' mdoxkwa' sa li naro go'y.
jwan' nasa tel na go' mas tij lo Babilonia.*

⁴⁴ Le' re xa' gox lon' ta mbre pola, mkeno xa' yo
nayon ten' ngoza' xa' re jwan' nge ley chan' Dios
ten' nak izyo biz, ta xa mnabe' Dios lo Moisés lo
nchab Dios, ndablo toxkwa' xa' yo axata naksa'
jwan' ta mblo' Dios lo xa'.

⁴⁵ Re xa' gox lon' jwan' mbre pola, mkaya' xa'
yo nayon re', mbe' xa'y kon Josué izyo jwan' mkib
Dios lo tedib ned men jwan' na'nakta Israel, sa
mdaya' Dios izyo ya lo re xa' gox lon' ta mbre pola,
nde tya mbyan' yo Nayon axta wiz jwan' mkete
David.

⁴⁶ Nde wen mbwi' Dios David, nde nchola's
David ntoxkwa' xa' ti yo ten' ak liz Dios, Dios na'
Jakob.

⁴⁷ Che'la Salomón ngok xa' jwan' mtoxkwa'
yodo'n Dios,

⁴⁸ tenyega, le' Dios, Xa' naro toz, na'nchod Xa'
yo ntoxkwa' ya' men, xa nchabka profet:

⁴⁹ Che'mod ne Xa' Nyebe': Lo be' nak ten' ndob na,
nde lo izyo nak ten' ndyo nin.

¿Cho ned yo toxkwa' go' ak liz na?

¿o plo ten' ryo'xkwen na?

⁵⁰ ¿Cho na'nakta yub na mdoxkwa reta jwan' re'?†

* **7:43 7:43** Amós 5:25-27:25-27 † **7:50 7:50** Isaías 66:1-2

⁵¹ 'Tadka ndoni Esteb, nchab Esteb: —Ne toz yek go', ngok ke lazo' go' nde na'tyobta nza go', thibla' nta'b go' Mbi Nayon, lal nak go' kon re xa' gox lo go' ta mbre pola.

⁵² Re xa' ya mchubla xa' reta profet, mbij xa' re xa' jwan' mbye'd tej ner ke ye'd ti Xa' gal', Xa' gal' ya jwan' ta mdaya' go' nde mbij go' Xa'.

⁵³ Go' jwan' mkaya' ley chan' Dios ta mda' re anj, nde na'nxobyekta go'y.

⁵⁴ Sen' mbin xa' re di's ya, xaja kwana mkexyan xa' nde anta nte's le xa' ngwi' xa' lo Esteb.

⁵⁵ Le' Esteb, dib xa' ndono Mbi Nayon, mbwi' xa' lo be', ngoni lo xa' xni chan' Dios, nde mbwi' xa' Jesús ndo lad ban Dios.

⁵⁶ Nde nchab Esteb:

—¡Bwi' go'! Ngwi'n ndoxal' lo be', nde ngwi'n le' Xin' Mbi' mbye'd lo izyo ndo Xa' lad ban Dios.

⁵⁷ Zyasa mbrez yaj reta xa', mtow' xa' nza xa' nde thita ngok xa' mxen xa' Esteb.

⁵⁸ Nde mblo'te xa' Esteb ro yez, tya mbwad ke xa' Esteb; le' re xa' jwan' mke' yalkwin' xis Esteb, mkib xa' lar nzo'b xis xa' nde mtan'no xa'y lo mbyo ndole Saulo.

⁵⁹ Laj ngegadke xa' Esteb, mna'b Esteb lo Dios, nchab xa':

—Jesús Xa' Nyebe', pkaya' xbin na.

⁶⁰ Nde mdoxub Esteb mbrez yaj xa', nchab xa':

—Xa' Nyebe', natyenta lu kwent jwan' narax ta ndli reta mbi' re'.

Nde sen' ngolo nchab xa' di's ya, ngu' xa'.

8

Saulo nchubla re men ndli lazon' Jesús

¹ Nde thita ngok Saulo kon re xa' jwan' mbluj Esteb.

Len' wiz ya jwan' toz mdobte mchubla xa' re men ndli lazon' Jesús, jwan' nzi yez Jerusalén; nde mbrya's reta xa' dib lo xyon Judea nde lo xyon Samaria, ben'ta re apósta mbyan'.

² Nde pla xa' jwan' nxo'byek toz Dios, ngwa ka's xa' Esteb nde jwan' toz mbin'no xa' Esteb.

³ Mbay le' Saulo nchubla reta men ndli lazon' Jesús, ndlya xa' reta liz men, ngo'bnyo xa' mbi' nde ngol, nde nke' lizyi'b xa' reta men ya.*

Blib ndej xki's Dios lo xyon Samaria

⁴ Mbay le' re xa' ta mbrya'sa, nda xa' reta yez ndatej xa' di's wen chan' Jesucrist lo re men.

⁵ Zyasa mdola Blib nda xa' yez Samaria, tya mdobte mdej xa' xki's Jesucrist lo re men.

⁶ Nde thita ngok reta men, ntonza toz xa' re jwan' mdej Blib, nchon xa' nde ngwi' xa' re yalnaro ro ndli Blib.

⁷ Tak bro toz re xa' jwan' nzo mbi narax lazon' mbi yek xa' nde re mbi naraxa anta mbez yaja ndyro'tey; nde bro toz re xa' jwan' na'akta tye nde re xa' ngo'b nin' mdyan' xa'

⁸ Jwan' nasa nale toz ngo lazo' re men yez ya.

⁹ Per tya nzo ti mbi' ndole Simón, xa' re' ndala ndli xa' yalmxí nde kon jwan'na nkwin'no xa' re men nzi Samaria, nxyal' xa' xaga ti xa' ro toza.

¹⁰ Nde ntonza toz reta men xki's mbi' ya, axta re xa' ntak lo yez nde re men tata ba, mbez xa':

—Jwan' re nak yalne ro chan' Dios.

* **8:3 8:3** Hch. 22:4-5; 26:9-11.

¹¹ Nde ntonza toz men xki's mbi' ya, tak ndala ngetetokan xa' re men kon re yalmxí jwan' ndli xa'.

¹² Per sen' lo mbli lazo' re men di's wen lo yalnyebe' chan' Dios nde lo le Jesucrist jwan' ndej Blib, zyasa ngol nde mbi' mbro'le.

¹³ Noga yub Simón mbli lazo' xa' Jesús nde sen' mbro'le Simón, thibla' mdonke xa' xis Blib, nde nzoyen xa' ngwi' xa' re yalnaro nde yalbzye jwan' ndli Blib.

¹⁴ Sen' mbin re apóst jwan' nzi Jerusalén, ke re men lo xyon Samaria mbli lazo' xa' xki's Dios, zyasa mtel' xa' Pedr kon Juan yez ya.

¹⁵ Rop xa' re', sen' ngotu xa' tya, mna'b xa' lo Dios por re men ya, sa kaya' xa' Mbi Nayon.

¹⁶ Tak nek thib xa' nzi tya tera' yatu Mbi Nayon yek xa'; ben'ta mbro'le xa' lo le Jesús.

¹⁷ Zyasa Pedr nde Juan mxo'b ya' xa' yek re men ya, nde mkaya' xa' Mbi Nayon.

¹⁸ Lo sen' mbwi' Simón, ke lo mxo'bya' apóst yek re men sa nkaya' men Mbi Nayon, zyasa mta'b simón tmi lo xa',

¹⁹ nchab Simón:

—Noga lon pta' go' yalnyebe' ba, sa choja men jwan' xo'b ya'n yek na' kaya' xa' Mbi Nayon.

²⁰ Zyasa nchab Pedr lo Simón:

—Watobyaj kon tmin la, tak ndlia xgab kon tmi ti'a yalnyebe' jwan' nda'las Dios!

²¹ Na'nda'blod la nde na'nsal'ta lu lia sin' re', tak nagal'ta nak lazo'a lo Dios.†

²² Bse' xgab la nde bla' jwan' narax nak la, nde mna'b lo Dios te' ton' Xa' xgab narax ta ndlia ba;

† 8:21 8:21 Sal. 78:37.

²³ tak ngwi'n jwan' toz nzo naxí lazo'a nde lo ya' jwan' narax nkedo'a.

²⁴ Zyasa mkab Simón, nchab xa':

—Mna'b go' por na lo Xa' Nyebe', sa na'tyakta na nek thib jwan' ta ndej go' ba.

²⁵ Le' rop apóst, sen' mne mda' xa' kwent nde sen' mne mdodi's xa' xki's Dios, zya mbere xa' yez Jerusalén, nde na'r toz re yez jwan' nzi lo xyon Samaria mbri'd xa' mdej xa' di's wen chan' Jesucrist.

Blib kon ti xa' yez Etíope

²⁶ Sen' ngolo jwan'na, ti anj chan' Xa' Nyebe' nchab lo Blib:

—Ptosa' nde wa ned la, ned izyo nagán jwan' ndryo' yez Jerusalén nde nzina yez Gaza.

²⁷ Zya mdosa' Blib nda xa'. Nde ned ngosi'b Blib ti mbi' eunuk[‡] yez Etyope xa', mbi' re' ntobza' tmi chan' ti rey got, Candace lo xyon Etyope, le' mbi' ya ngwa ta' dyux lo Dios yez Jerusalén,

²⁸ sen' mbere mbi', ndob xa' lo karret xa', ndob lab xa' ye's mke' profet Isaías.

²⁹ Zyasa nchab Mbi Nayon lo Blib:

—Wa nde bike gax cho karret ba.

³⁰ Sen' mbike Blib gax cho karret, zya mbin Blib le' mbi' ya ngelab ye's jwan' mke' profet Isaías; zyasa mnabdi's Blib lo xa', nchab Blib:

—¿Cho nchen la jwan' ngelab la?

³¹ Le' mbi' nchab:

[‡] **8:27 8:27** eunuk Nso son ned eunuk, tib ned xa' nak nchalno xa' na'kad xa' ngol, tedib ned xa' ndryo' xkon xa' nde tedib ned xa' ta ndli xa' sa li xa' sin' lo Dios.

—¿Xomod yen nay ta na'ngenta cho koxkana lon?

Nde mna'b xa' lo Blib yap Blib lo karret sa tyob Blib cho xa'.

³² Le' lo xki's Dios ten' ngelab xa', che' nchaba: Xa ndano men ti mbakxil' ten' kuj men ma' ba, ta mbe' men Xa', Xaja ti mbakxil' ta na'mbezta lo ncho' xa' yi's lad ma', ta mtow' ro Xa'

³³ Lo nala ngwi' men Xa', na'galta mna'b re xa' nak sin' kwent lo Xa'; na'mkenod Xa' xin' Xa', tak mkib men yalnaban chan' Xa' xis izyo. §

³⁴ Le' xa' ta nak eunuka mna'bdi's xa' lo Blib, nchab xa':

—Nya'b na loa, ptej lon ¿Cho xa' ta ndej profet nche'; cho le'ga profeta o nzo cho tedib xa'y?

³⁵ Zyasa le'ga ten' ta ngelab xa' ya, tya mxen Blib nde mdej Blib di's wen chan' Jesucrist lo xa'.

³⁶ Laj ndo rop xa' ned mzin xa' ten' nzi nit nde nchab xa' lo Blib:

—¡Nche' nzo nit! ¿Cho nzo kwan nka di's sa ryo'len?

³⁷ Le' Blib nchab:

—Tez dib nzo lazo'a ndli lazo'a Jesucrist, toyala. Le' xa' nak eunuka mkab:

—Ndli lazo'n Jesucrist nak Xin' Dios.

³⁸ Zyasa mnabe' xa' mblatob karret, mbla rop xa' nde nda xa' len' nit nde mblo'le Blib xa'.

³⁹ Sen' mbro'te xa' len' nit, le' Mbi Nayon chan' Xa' Nyebe' mbliy mti' Blib, le' xa' nak eunuk

na'ngwi'tra xa' Blib, nde nale nzo lazo' xa' nda xa' xned xa'.

⁴⁰ Le' Blib mbro'to yez Azoto, nde a xa ndarid Blib re yez taja ndatej Blib di's wen chan' Jesucrist lo re men, axta kebe' mzin xa' yez Cesarea.

9

Mbli lazo' Saulo Jesús

(He. 22:6-16; 26:12-18)

¹ Laja Saulo tatka ngetetoseb xa' kuj xa' re men nak xin' te'd Xa' Nyebe', ngwa xa' lo mbol ngwley' ro,

² nde mna'b xa' ye's lo mbol sa ta' mbol di's yakwan' xa' men bi' nde ngol, re men jwan' nzo lo ned kub chan' Jesús, ten' nzi re yo jwan' ndyop men Israel* yez Damasco, nde yedno xa' re mena yez Jerusalén sa ke'lizyi'b xa' xa'.

³ Laj ndo Saulo ned, lo ndozin la xa' gax yez Damasco, zya xajta mbro' ti xni ro lo be' mblay dib ten' ndo xa'.

⁴ Nde ngob xa' izyo, zya mbin xa' mni ti Xa' jwan' nchab:

—Saulo, Saulo, ¿Cho kwan liy ngetechublaa na?

⁵ Le' Saulo mkab lo Xa':

—¿Cho go' Xa' Nyebe'?

Le' Xa' nchab:

—Na nak Jesús, Xa' ta ngete chublaa ba; le'ga loa ngekwan' la mas yalti ta xa ndli ngon sen' nke'ni ma' xi ya nalé.

⁶ Le' Saulo anta nxi'd nde nzyeb, mkab xa':

Xa' Nyebe' ¿Cho kwan nchola's la lin?

Le' Xa' Nyebe' nchab:

* **9:2 9:2** re yo re' ndole sinagog

Ptoli nde gote len' yez, sa tya yaj loa nyen' kwan ndablo lia.

⁷ Le' re xa' jwan' ndano Saulo, mzyeb toz xa' tak mbin xa' mni ti men, per ngen cho mbwi' xa'.

⁸ Sen' mdoli Saulo nde mxal' xa' ngud lo xa' per na'aktra' wi' xa'; zyasa mxen xa' ya' Saulo nde mbe' xa' xa' yez Damasco.

⁹ Tya mdob xa' son wiz na'akta wi' xa', na'ngwad xa', nde nangu'd xa' nit.

¹⁰ Yez Damasco ngo ti xin' te'd Jesús ndole Ananías, lo xa' ya mni Xa' Nyebe xaja men nzal' lazon' ba nde nchab Xa':

—¡Ananías!

Le' Ananías mkab:

Na nche' Xa' Nyebe'.

¹¹ Le' Xa' Nyebe' nchab:

—Ptosa' sa le'a ya ned ndole Nali, liz Judas tya nyabdi's la ti xa' ndole Saulo, xa' yez Tarso, tak naya le' xa' ndotodi'sno Dios,

¹² nde xaja men ntza' lazon' ba ndowi' xa' ti mbi' ndole Ananías ngote ten' ndob xa', mbi' ya nxo'b yan' yek xa' sa toyal wi' xa' tedi gob.

¹³ Sen' mbin Ananías jwan'na, nchab Ananías:

—Xa' Nyebe', bro toz men ndej kwent chan' mbi' ya lon, plopa ntoti xa' re men nayon la, men nzi yez Jerusalén.

¹⁴ Nde naya nde mbi' ya nche' kon yalnyebe' chan' re ngwley' nyebe', sa we xa' re men ta ndli lazon' lu nde ke' lizyi'b xa' re men ya.

¹⁵ Le' Xa' Nyebe' nchab:

—Wa, tak sin' toz li xa' re' lon, mblín xa' sa yatej xa' xki's na lo re men na'nakta yez Israel, lo re rey nde lo re men yez Israel.

¹⁶ Tak na lo' lo xa' plopa nakin' rid xa' yalti por na.

¹⁷ Zyasa ngwa Ananías nde ngote xa' len' yo ten' ndob Saulo, mxob ya' xa' yek Saulo, nde nchab xa':

—Wes Saulo, Jesús Xa' Nyebe', Xa' ta mbro'to loa ned ta ndea ya, Xa' ya mtel' na sa wi'a tedib gob nde dib la te' Mbi Nayon.

¹⁸ Zyaga, xaja bexa nya jwan' ngob ngud lo Saulo nde mbwi' xa' tedib gob zya ngotoli xa' nde mbro'le xa'.

¹⁹ Zya mda Saulo, sa ngo ne lazo' xa'. Nde mbled Saulo tipla wiz yez Damasco kon re xa' jwan' ndli lazon' Jesús, xa' nzo tya.

Saulo ndej xki's Dios yez Damasco

²⁰ Zyaga mdobte mdej Saulo xki's Crist lo re men ten' nzi re yo jwan' ndyop men Israel†, nchab xa', liga Xa' re' nak Xin' Dios.

²¹ Nde reta xa' ta nchon jwan' ndej Saulo anta nzoyen xa', nchab xa':

—¿Cho na'nakta xa' re' ta nchubla re men yez Jerusalén, re men jwan' nxobyek Jesús nde jwan'na ndeli xa' nche' ndexen xa' men sa we xa' men lo re ngwley' nyebe'?

²² Per Saulo masra' ncho ne lazo' xa' nde ntokan xa' yek re xa' judí nzo yez Damasco, ndlo' Saulo ke Jesús nak Crist.

Mxon' Saulo lo re xa' judí

²³ Sen' mbri'dla na'r wiz, ngok di's re xa' judí sa kuj xa' Saulo,

† 9:20 9:20 re yo re' ndole sinagog

²⁴ per mbin Saulo jwan' ndoke xa' lino xa' Saulo. Yal' nde ndlyabe ngenap xa' reta ten' nge yala ro yez, sa kuj xa' Saulo,

²⁵ zyasa re xin' te'd Jesucrist, yal' mbe' xa' Saulo mblo xa' xa' len' ti chokwid nde mbala xa' xa' xis pto jwan' now' dib ro yez Damasco.‡

Saulo mzin yez Jerusalén

²⁶ Sen' mzin Saulo yez Jerusalén, nchola's xa' kata xa' re xin' te'd Jesucrist; per reta men ya nzyeb xa' Saulo, tak na'lid lazo' xa' cho no Saulo nak xin' te'd Jesucrist.

²⁷ Per Bernabé mbe' Saulo nde ngwano xa' Saulo lo re apóst, mdej Bernabé xamod mbwi' Saulo Xa' Nyebe' ned, mdodi'sno Xa' Nyebe' Saulo nde xa' na'nzyeb tirta Saulo ndej Saulo xki's Jesucrist lo re men yez Damasco.

²⁸ Nde ngo Saulo kon re apóst yez Jerusalén nde thipta mkete re xa',

²⁹ noga na'nzyepta xa' mdej xa' xki's Jesucrist lo re men, nde ngwa xa' kwent kon re xa' judí, xa' ni di's grieg, le' re xa' ya ndoke kuj xa' Saulo.

³⁰ Sen' mbin re wes jwan'na, mbe' xa' Saulo yez Cesarea, nde tya mtel' xa' Saulo yez Tarso.

³¹ Zyasa reta men jwan' ndli lazon' Jesucrist re xa' nzi lo xyon Judea, Galilea nde Samaria nabe'z nzi xa'. Taja ndoxen xa' lo xki's Dios, nzeb lazo' xa' Xa' Nyebe' nde ndla'sto Mbi Nayon xa' sa masra' men ndoli lazo' xa' di's wen.

Mbyak Eneas

‡ 9:25 9:25 2 Co. 11.32-33.

³² Laj ngete tna Pedr re men jwan' ndli lazon' Jesús, noga ngwatna Pedr re men nayon nzo yez Lida.

³³ Tya ngosi'b Pedr ti xa' bi' ndole Eneas, ndala xon lin' nax yis xa' na'akta tye xa'.

³⁴ Le' Pedr nchab:

—Eneas, Jesucrist todan' la. Ptolí nde bka xabyis la. Nde zyaga mdoli Eneas.

³⁵ Nde re men nzo yez Lida nde yez Sarón lo mbwi' xa' mdyan' mbi' ya, reta xa' mbli lazo' xa' Xa' Nyebe'.

Mbro'xban Dorkas

³⁶ Zya yez Joep ngo ti ngol xin' te'd Jesús ndole Tabita, lo di's gryeg ndole xa' Dorkas§. Ngol ya, dipta naban xa' mbli xa' yalwen nde mbli'sto xa' re men ndyak yalti.

³⁷ Len' wiz ya mxen yis Dorcas nde nguj xa'. Nde sen' ngolo mbwad xa' thabol, zya ngwathix xa' thabol yo xta' gap.

³⁸ Ma na le' yez Lida nzi gax yez Joep, sen' mbin re xin' te'd Jesús tya ngete Pedr, zya mtel' xa' chop mbi' ngwana'b lo Pedr, nchab xa':

—Ken la ye'd la ten' nzi ná'.

³⁹ Zyaga mdonke Pedr xis xa'. Sen' mzin Pedr, mbe' xa' Pedr yo xta' lad gap ten' nax thabol, tya re ngol jwan' nguj sal' na' nchon' xa' mbike xa' lo Pedr, ndlo' xa' re lar jwan' mdoxkwa' Dorkas sen' naban xa'.

⁴⁰ Zyasa mblo'te Pedr reta xa' le, mdoxub Pedr nde mna'b Pedr lo Dios, ngolo jwan'na mbwi' Pedr lo thabol, nchab Pedr:

§ 9:36 9:36 Lo di's xtil ndole xa' Gacela, naka tib le ma' xa' nya mzin.

—¡Tabit, goche!

Le' Tabit mxal' ngud lon' nde sen' mbwi' xa' Pedr, mdobli xa'.

⁴¹ Zyasa mxen Pedr ya' xa' sa mdoli xa'; nde mbrez Pedr re ngol jwan' nguj sal' na' nde re xa' jwan' ndli lazon' Jesús, sa mblo'to naban Pedr Tabit lo re men.

⁴² Reta men nzo yez Joje mbin xa' jwan' ngoka, nde bro toz men mbli lazo' xa' Xa' Nyebe'.

⁴³ Nde bro ngo Pedr yez Joje, liz ti xa' ndole Simón, xa' nke sin' lo yid ma'.

10

Pedr nde Kornel

¹ Ngo ti xa' yez Cesarea ndole Kornel, xa' nyebe' lo thib ayo' sondad jwan' ndenta ndole Italian,

² Mbi' re' nde re liz xa' nxo'byek toz xa' nde ntseb lazo' xa' Dios, nda' xa' gon lo re men yez, nde thibla' nya'b xa' Dios.

³ Ti wiz, nzoja hor son bzyeba, xaja men mzal' lazon' ba mbwi'pa xa' ti anj chan' Dios ngote anj ten' ndo xa' nde nchab anj:

—¡Kornel!

⁴ Xe mbwi' Kornel lo anj nde mna'bdi's zeb xa': ¿Cho kwana Xa' Nyebe'?

Le' anj nchab:

—Reta jwan' nya'b la lo Dios nde gon jwan' nda'a lo re men nzina lo Dios xaja jwan yon.

⁵ Bloned pla xa' bi', naya, ya yez Joje sa yaxi' xa' Simón xa' ndolega' Pedr.

⁶ Le' Pedr nzo liz ti xa' ndole Simón, xa' nke sin' kon yid ma', liz xa' ndob gax ro nitto', sa Pedr nye loa kwan ndablo lia.

⁷ Sen' ndya anj ta ndoni lo Kornel, zya mbrez Kornel chop xa' ndli sin' lo Kornel, nde kon ti sondad, xa' nxo'byek toz Dios nde thibla' ndla'sto xa' Kornel.

⁸ Sen' ngolo mdej Kornel lo xa' ya, re jwan' mbwi' Kornel, mbloned Kornel xa' yez Joje.

⁹ Tedib wiz, laj ndo re xa' ned, ndozin gax la xa' yez Joje. Pedr ngwap yek yo sa todi'sno xa' Dios, ndosin rolja wiza.

¹⁰ Zya mzi'b ndyan' toz Pedr nde nchola's xa' wa xa'; per laj ndotoxkwa' jwan' wa xa', zya mbro'to ti jwan' lo Pedr xaja men nzal' lazon' ba,

¹¹ mbwi' Pedr ndoxal' lo be', nde tya mbro' ti lar ro ndobo re thap nza ne'y, ndalay mzina izyo.

¹² Lo lara nzo re ned ma' jwan' ndob thap nin', re ma' ndye len'na' izyo, nde re ma' nxyobi lo be'.

¹³ Zya mbin Pedr mni ti Xa':

—Ptoli, Pedr, bij ma' nde bda.

¹⁴ Le' Pedr nchab:

Xa' Nyebe', na'wat nay, tak terka wan nek thib jwan' bew nde jwan' xkap.

¹⁵ Mbrop gob bere mni Xa' lo Pedr, nchab Xa':

Jwan' ta mtombila Dios, na'koled lay jwan' bew.

¹⁶ Son gob ngok jwan'na, le' lar ya bere ngwapa lo be'.

¹⁷ Laj ndoli Pedr xgab, cho kwan nak jwan' ta mbro'to lo Pedr, zya mzin re mbi' ya ro yo, xa' ta mtel' Kornel, ndona'bdi's xa' plo nak liz Simón.

¹⁸ Nde mbrez xa' xis yala mna'bdi's xa', cho tya nzo ti xa' ndole Simón, xa' ndolega' Pedr.

¹⁹ Laj ngeli Pedr xgab jwan' ta mbwi' Pedr, le' Mbi Nayon nchab lo Pedr:

—Nche' mzin son mbi' ndekwan' lu.

²⁰ Ptolí, nde bla, nde na'akropta xgab la yankea xis xa' tak na mtel xa'.

²¹ Zyasa mbla Pedr, nda Pedr lo xa' nde nchab Pedr:

—Na che'ya, na ta nkwan' go'. ¿Cho kwan liy nde go'?

²² Le' xa' nchab:

—Kornel, xa' nyebe' lo thib ayo' sondad, ti mbi' gal' nde ntseb lazon' Dios, nde reta men Israel wen ni men xis xa', ti anj nayon chan' Dios mnabe' lo xa' sa mbloned xa' ná' ndexi' ná' lu, yaa liz xa' sa gon xa' xki's la.

²³ Zyasa mtori'd Pedr xa' len' yo, mda' Pedr ten' mbled xa'. Lo sen' mduxni tedib wiz, ndanke Pedr xis xa', nde noga tipla wes yez Jope mdonke xis Pedr.

²⁴ Axta tedib wiz mzin xa' yez Cesarea. Le' Kornel ndobed la, mbrez Kornel reta men nak ta xa' nde re men jwan' mas nzal'ta xa'.

²⁵ Sen' ngote Pedr, zya mbro'te Kornel ngwa xi' ned xa' Pedr, nde mdoxub xa' lo Pedr, li naro xa' Pedr.

²⁶ Zyaga mtoli Pedr xa', nchab Pedr lo xa':

—Ptolí, tak noga na men nak na.

²⁷ Laja ndatodi'sno Pedr Kornel, ngote rop xa' len' yo, sa mbwi' Pedr men toz nzidop tya.

²⁸ Nde nchab Pedr lo re xa':

—Go' mne plopa narax naka lo ti men judí sal'ta xa' o bike gax xa' lo men jwan' na'nakta judí. Per Dios mblo' lon, nek thib men na'ndabloda go'len, men bew o men xkap.

²⁹ Jwan' nasa, sen' mbrez go' na, zyaga ndal na, na'nkabrot na. Nde naya nyabdi's na, ¿Cho kwan liy sa mbrez go' na?

³⁰ Zyasa nchab Kornel:

Nal thap wiza, che'ja hor nge'lin yalse liz na hor byon, nde leja ndotodi'snon Dios, zya mbwi'n mbro'to ti mbi' lon, nok ti lar anta ndyob xni nya.

³¹ Nde ne xa' lon: "Kornel, Mbinla Dios re jwan' nya'b la lo Xa' nde re gon jwan' nda'a lo men nzin na lo Dios.

³² Le' naya bloned pla xa' ya yez Jope, sa yaxi' xa' ti xa' ndole Simón xa' jwan' ndolega' Pedr, le' xa' nzo liz tediba Simón, xa' nke sin' lo yid ma', liz xa' ndob ro nitto'; nde sen' sin Pedr liz la, xa' nyey loa."

³³ Jwan' nasa zyaga mbloned na pla mbi' ng-waxi'a, nde wen mbli'a ndea nche'. Le' naya nche' nzi reta na' lo Dios, sa gon ná' reta di's jwan' mda' Dios loa tej la lo ná'.

³⁴ Zyasa mdobte mdodi's Pedr nde nchab Pedr lo xa':

—Naya liga mbyen na, ke Dios nambid Xa' men,*

³⁵ che'la, one choja yez nde re men, nkaya' Dios men sen' ntseb lazo' men Dios nde li men jwan' gal'.

³⁶ Dios mni lo reta men Israel, mdej Xa' di's wen chan' yalnabe'z por Jesucrist nde Xa' re' nak xwan' reta men.

³⁷ Go' mne, reta jwan' ngok dib lo xyon Judea, mdobtey lo xyon Galilea, lo sen' mbri'dla Juan, mdej Juan xki's Dios nde mblo'le xa' men.

³⁸ Nde mne go' xa mbli ley' Dios Jesús mda' Xa' Mbi Nayon nde yalnyebe' lo Jesús, Xa' Nazaret, nde xa mketeli Jesús re jwan' wen nde mtodan'

* **10:34 10:34** Deut 10:17.

Xa' re men jwan' ntoti maxu', reta jwan' re' mbli Jesús tak Dios ndo kon Xa'.

³⁹ Reta ná' mbwi' jwan' mbli Jesús lo xyon Judea, yez Jerusalén, nde mbij men Xa' mke'nga men Xa' lo kruz.

⁴⁰ Per ngoxo'b mbyon wiz mbloxban Dios Xa', nde mbli Dios mbro'to Xa';

⁴¹ nambro'tod Xa' lo dib yez, le' Xa' mbro'to lo ná' tak ax mblía Dios ná' sa mne ná' re jwan' ngok, mda ná' nde ngu' ná' kon Xa' sen' mbro'xbanla Xa' xij re men nguj.

⁴² Nde mnabe' Xa' lo ná' sa ya ta' ná' xki's Xa' lo yez, nde tej ná' ke Dios mdob Jesús sa nya'b Xa' kwent lo re men naban nde lo re men nguj.

⁴³ Xa' re' ta ndej re profet, reta men jwan' li lazon' Xa', por le Xa' dyon' xken men.

⁴⁴ Laj ndotodi's Pedr, le' Mbi Nayon mblatuy yek reta xa' ta nzi yon xki's Dios.

⁴⁵ Nde re xa' ta ndeno Pedr, xa' jwan' nxobyek toz jwan' ta tyob be' lad men bi', nzoyen toz xa' mbwi' xa', ke noga re men na'nakta judí nda'la's Dios Mbi Nayon mblatuy yek xa'.

⁴⁶ Nde mbin re xa', ke re men ya ndyodi's xa' xa'la re ned di's jwan' na'nchenta men nde kon di's ya mni xa' di's wen lo Dios.

⁴⁷ Zyasa nchab Pedr:

—¿Cho nzo kwan ka di's ryo'le re men re' lo ta mkaya'a xa' Mbi Nayon xa na' re'?

⁴⁸ Nde mnabe' Pedr ryo'le xa' lo le Jesús, Xa' Nyebe'. Zyasa mna'b re xa' lo Pedr, yan' Pedr tya pla wiz.

11

*Ndej Pedr re jwan' mbli Pedr lo re wes nzi
Jerusalén*

¹ Nde mbin re apóst nde re wes nzi lo xyon Judea ke noga men na'nakta Israel mbli lazo' xa' xki's Dios.

² Lo ngoxo'b Pedr yez Jerusalén, le' re xa' judí jwan' nxobyek toz tyob be' lad men bi'ba, mbrezno xa' Pedr,

³ nchab xa':

—Cho kwan liy ngotea len' liz men na'nakta judí nde mdanoa xa'?

⁴ Zyasa mdobte mdej Pedr lo re xa' axata ngoka, nchab Pedr:

⁵ —Na ndo yez Jope ndotodi'snon Dios, zya mbro'to ti jwan' lon xaja' men nzal' lazon' ba, mbwi'n ndela ti jwan' mbro' lo be' nyay xaja' nya ti lar nakis ro ndobo re thap nza ne'y nde mzina ten' ndon.

⁶ Zyasa jwin mbwi'n nyen' kwan nzo lo lar, nde tya nzo re ned ma' ndob thap nin', re ma' wan, re ma' ndye len' na' xis izyo, nde re ma' nxobi lo be'.

⁷ Zya mbin na mni ti Xa', ne Xa' lon: “Pedr, ptoli, bij ma' nde bda.”

⁸ Le' na nchab lo Xa': “Xa' Nyebe' na'wat na ma'; tak terka wan nek thib jwan' bew nde jwan' xkap.”

⁹ Zyasa bere mbin na mni Xa' mbrop gob, ne Xa': “Jwan' mtombila Dios na'koled lay jwan' bew.”

¹⁰ Tson gob ngok jwan'na lon, zyasa retay ngwap lo be' tedib gob.

¹¹ Nde zyaga mzin son mbi' yo ten' nzon, mbro' xa' axta Cesarea ndekwan' xa' na.

¹² Nde ne Mbi Nayon lon, na'akropta xgab la tyonkea xis xa'. Noga re xop wes re' mdonke xis na nde ngote ná' liz ti mbi',

¹³ nde mbi' ya mdobte mdej lo ná' xamod mbwi' xa' mbro'to ti anj liz xa', nde nchab anj lo xa': "Ptel' pla mbi' ya yez Joje, sa yaxi' xa' Simón xa' jwan' ndolega' Pedr,

¹⁴ xa' ya tej re di's loa xomod lya'a nde lya' re men liz la."

¹⁵ Sen' mdobte mdodi's na, zya ngotu Mbi Nayon yek reta xa', xajka ngotu Mbi Nayon yek reta na' zyaya.

¹⁶ Zyasa mte'las na xki's Xa' Nyebe', sen' lo ne Xa': "Juan, liga ben' len' nit mblole xa' men, per go' ryo'le kon Mbi Nayon."*

¹⁷ Nde tez le'ga Dios mda'y lo re xa' ya, jwan' ta mda' Dios lo re na' ta ndlia lazon' Jesucrist Xa' Nyebe' ¿Cho nak na sa tyotow' na lo Dios?

¹⁸ Sen' mbin re wes di's ya, na'nkapta xa', mni xa' di's wen lo Dios, nchab xa':

—jMbay noga re men na'nakta Israel ngebez Dios xa' sa la' xa' re jwan' narax nak xa', bere xgab xa' lo Dios nde kaya' xa' yalnaban adi'!

Yodo' yez Antioquía

¹⁹ Sen' mbijla xa' Xteb,† zya mdobte mchubla xa' re men ndli lazon' Jesús nde mxon' men, nzo xa' mzin lo xyon Fenicia, lo xyon Chipre nde yez Antioquía. Tya ben'ta lo re men judí mdej xa' xki's Jesucrist, ngentra' cho lo ndej xa'y.

* **11:16 11:16** He. 1:5. † **11:19 11:19** He. 8:1-4.

²⁰ Per xija nzo pla wes, xa' lo xyon Chipre nde yez Ciren, sen' mzin xa' yez Antioquía, mdobte mdej xa' di's wen chan' Jesús Xa' Nyebe' lo re xa' judí ni di's grieg.

²¹ Nde Xa' Nyebe' ndola'sto re men ya, nde bro toz men mbla' xa' re mod gox nak xa' nde mbli lazo' xa' Jesús Xa' Nyebe'.

²² Re jwan' re' mbin re xa' nzi yodo' Jerusalén sa mtel' xa' Bernabé ya xa' Antioquía.

²³ Sen' mzin Bernabé tya, mbwi' xa' yalwen chan' Dios, ngonale lazo' xa', nde mtoni xa' re men ndli lazon' Jesús sa thipta xgab tyen re xa' tyonke xa' xis Xa' Nyebe'.

²⁴ Tak Bernabé nak ti mbi' wen, dib xa' mde' Mbi Nayon nde ndlipa lazo' xa' Jesús. Nde bro toz men mdaya' lazon' lo Xa' Nyebe'.

²⁵ Xisa ngwa kwan' Bernabé Saulo yez Tarso, nde sen' ngosal xa', mbe' xa' xa' yez Antioquía.

²⁶ Nde tya mbre xa' kon re men yodo' dibta tib lin' nde bro toz lo men mblo' xa' xki's Dios. Yez Antioquía, tya jwan' mblo'le ner xa' Cristian re men jwan' ndli lazon' Jesucrist.

²⁷ Len' re wiz ya, ngo pla profet mbro' yez Jerusalén ngotu xa' yez Antioquía.

²⁸ Tib xa' ya ndole Agabo,‡ mdoli xa' xij reta wes nzi tya nde Mbi Nayon ntoni xa' sa mdej xa', yo ti win toz dib izyo, nde jwan'na ngok len' lin' sen' mdob nyebe' Claudio.

²⁹ Zyasa re wes nzi yez Antioquía mbyan'di's xa', axaja nchala lo xa' mtel' xa' jwan' la'sto xa' re wes nzo lo xyon Judea.

‡ 11:28 11:28 He. 21:10.

³⁰ Tamod mbli xa' mtel' xa'y lo Bernabé kon Saulo sa zina lo re xa' nak sin' lo yodo', xa' nzi lo xyon Judea.

12

Mbij xa' Jakob nde mke' lizyi'b xa' Pedr

¹ Le'ga len' lin' ya, rey Herodes mnabe' mxen xa' pla men yodo' nde mtoti xa' xa'.

² Nde mbij xa' Jakob wes Juan kon espad.

³ Sen' mne Herodes ke ndyen re xa' judí ta mbij xa' Jakob zyasa mnabe' Herodes yoga Pedr. Len' wiz ya ncha xa' pan ngenta lebadur.

⁴ Sen' ngoga Pedr, mke' lizyi'b xa' Pedr, nde mnabe' xa' lo sin' thib sondad sa ngok rol xa', thap thapa sondad ngenap. Tak xgab Herodes nak, sen' ngoto ni pask zya ko'to xa' Pedr lo mayez sa kuj xa' Pedr.*

⁵ Nde jwin toz ngenap xa' lizyi'b ten' nge Pedr; le' re xa' jwan' ndli lazon' Jesús dib nzo lazo' xa' nya'b toz xa' lo Dios por Pedr.

Mtola' Dios Pedr len' lizyi'b

⁶ Yal' jwan' tuxni izyo tedib wiz, sen' ta kote Herodes Pedr sa wi' xa' xa' ak Pedr, le' Pedr naxyat xtow' chop sondad nde ndobo Pedr kon chop kaden nde masra' sondad nzi kenap ro lizyi'b.

⁷ Zyasa mbro'to ti anj chan' Dios nde dib len' lizyi'b mbila xni, le' anj mzib ya' lad Pedr sa mblo'xkal' anj xa' nde nchab anj lo xa':

—¡Naban goche!

Nde zyaga mbro'ta kaden ta nago ya' Pedr.

* **12:4 12:4** Ex. 12:1-27.

⁸ Nde nchab anj lo Pedr:

—Bo len' la, nde pke' yalyid nia.

Nde ta mbli Pedr, zyasa nchab anj:

—Bix xab la nde ptonke xis na.

⁹ Nde mbro'te anj, xisa mdonke Pedr per na'nyed xa' cho li ndoyakpa jwan' ngeli anj, mxak Pedr naxsal' lazo' Pedr.

¹⁰ Nde mbri'd xa' ten' nzi ner sondad jwan' ngenap, taga' mbrid xa' brop ten' ngenap sondad nde mzin xa' ro yala naksa' yi'b jwan' nge ro ned, yala ya, yuba mxyal'la. Sen' mbro'te rop xa' le, mde xa' lud nde zyaga mti' anj lo Pedr.

¹¹ Zyasa mbi lo Pedr nde nchab xa':

—Naya liga mnen, Xa' Nyebe' mtel' Xa' anj Xa' sa mtola' Xa' na lo ya' Herodes nde lo reta jwan' nchola's re xa' judí lino xa' na.

¹² Sen' mne Pedr re jwan' re', mzin Pedr liz Marí, xna' Juan xa' ndolega' Mark, tya nzidop bro toz xa', nzina'b xa' lo Dios.

¹³ Sen' mzin Pedr, mbrez Pedr xis yala jwan' nge ro ned, le' ti mza' jwan' nge sin' tya ndole Rode, nda wi' mza' nyen' choy,

¹⁴ per sen' mblibe' mza' xki's Pedr, nale toz ngo lazo' mza', yaja na'nxa'la mza' ro yala che'la mke' mza' karrel nda mza' len' yo, nde nchab mza' lo re xa' nzi tya, Pedr ndo xis yala le ba.

¹⁵ Per re xa' nzi tya, nchab xa' lo mza':

—¡Ngosa' yek la!

Le' mza' nega ndo, nchab mza': Liy. Zyasa nchab xa':

—Nzo pa anj Pedr ngete le ba.

¹⁶ Le' Pedr tatka mbez ndo le, zyara mxal' xa' ro yala sa mbwi' xa' liga Pedr ndo tya nde nzoyen toz re xa'.

¹⁷ Zyasa mta'b ya' Pedr lo xa' sa na'kwestra' xa' nde mdej Pedr lo xa', xamod mblo'te Xa' Nyebe' Pedr len' lizyi'b. Nde nchab Pedr lo re xa':

—Ptej go' jwan' re' lo Jakob nde lo re wes.

Zyasa mbro'te Pedr nde nda Pedr xa'ga plo.

¹⁸ Sen' mduxni izyo, anta che'pa mbez re son-dad, tak na'nyed xa' ma Pedr.

¹⁹ Zya mnabe' Herodes sa ngwa kwan' xa' Pedr, per na'ngazalta xa' Pedr, zyasa mke' Herodes yalke yek re sondad jwan' mkenap nde mnabe' Herodes mbij xa' re sondad ya. Sen' ngolo re jwan'na, mbro' Herodes lo xyon Judea nde nda Herodes yez Cesarea nde tya ngo xa'.

Nguj Herodes

²⁰ Nde Herodes ngi'no xa' re men yez Tiro nde Sidón, per rop yez re', thipta ngok di's xa' sa mbike xa' lo Herodes, nerla mdodi'sno xa' Blasto, xa' jwan' nakaya' sin' ro lo Herodes nde xa' ya mbla'sto re xa' sa mna'b xa' wen kwe xa' kon rey, tak lo xyon rey ndryo' jwan' ncha re men yez Tiro nde Sidón.

²¹ Nde ti wiz jwan' mbyan' di'sla xa', ngok Herodes xab xa' jwan' nak xa' rey nde mdob Herodes ten' ndyob nyebe' xa' nde mni xa' lo re men.

²² Zyasa tolo mbrezyaj reta men, nchab xa':

—iXa' ta ndoniba na'nakta xa' men, dios nak xa'!

²³ Zyaga ti anj chan' Dios mbli zyaga mxen yiz Herodes tak na'mblinarod xa' le Dios nde tolo mdobte mda mblye'd bel' Herodes nde nguj xa'.

²⁴ Laja le' xki's Xa' Nyebe', ndoxena nde ndora'sa dib nax.

²⁵ Sen' ngolo rsin' Bernabé kon Saulo yez Jerusalén, mbere xa' ndya xa' yez Antioquía nde mbe' xa' Juan xa' ndolega' Mark.

13

Ner gob mbro' Bernabé kon Saulo ndatej xa' xki's Dios

¹ Xij re wes ta nzi yodo' yez Antioquía nzo re xa' nak profet nde re xa' nak maestr, re xa' ya nak, Bernabé, Simón xa' jwan' ndolega' Ya't, Lus xa' yez Ciren, Manaén xa' jwan' thipta mxyen kon Herodes xa' nyebe' lo xyon Galilea nde kon Saulo.

² Ti wiz sen' nzi li xa' yalse nde nzilinaro xa' le Dios, zya nchab Mbi Nayon lo xa':

—Blo'xa' go' Bernabé nde Saulo sa li xa' sin' jwan' mbrez na xa'.

³ Sen' lo mne mbli xa' yalse nde mdodi'sno xa' Dios, mxo'b ya' xa' yek Bernabé nde yek Saulo, ngolo jwan'na, mtel' xa' xa' nda xa'.

Bernabé kon Saulo ndej xki's Dios lo xyon Chipre

⁴ Le' rop xa' ta mbloned Mbi Nayon, nda xa' lo xyon Seleucia jwan' nax ro nitto', nde tya mxen xa' bark nda xa' Chipre.

⁵ Sen' mzin xa' yez Salamina jwan' nax ro nitto', tya mdobte ngwatej xa' xki's Dios re len' yo ten'

ndyop re men Israel. Noga ngeteno xa' Juan ndli kompay xa'.

⁶ Sen' ngolo mbri'dnda'b xa' dib lo xyon Chipre mzin xa' axta Pafos, tya ngozi'b xa' ti xa' judí ndole Barjesús, xa' mxí nak xa' nde profet kwin' xa',

⁷ le' xa' mxí re', thibla' gax ndo xa' lo Sergio Paulo xa' nyebe' lo yez, xa' nzo toz xgab yek xa', Sergio Paulo mnabe' xa' sa ngwayo' Bernabé kon Saulo tak ndyen toz xa' gon xa' xki's Dios.

⁸ Le' Elimas, tamod nak le xa' mxí ya di's gryeg, mchal toz xa' tow' xa' sa na'gonta Sergio xki's Dios.

⁹ Per Saulo, xa' ndolega' Pab, dib xa' mde' Mbi Nayon, mbwi' gal' xa' lo xa' mxí ya,

¹⁰ nde nchab xa':

—¡Lu, nab yalkwin' nde nab yalnarax nzo lazo'a, xin' Maxu' nak la, tak ngi'noa re jwan' gal'! ¿Cho na'nchoched lazo'a ndotokan la ned gal' chan' Xa' Nyebe'?

¹¹ Naya le' yalnayi' chan' Xa' Nyebe' xyo'b xis la, kow ngud loa lud tyemp nde nawi'tra lu xni.

Zyaga mkal ngud lo xa' mxí ya nde thiptane mkow ngud lo xa', anta nchek xa', nkwan' xa' nyen' cho tyen ya' xa' sa tye xa'.

¹² Zyasa Sergio Paulo, xa' nyebe' lo yez, mbwi' xa' jwan' ngok nde mbli lazo' xa' Dios, nzoyen xa' ngwi' xa' re yalte'd chan' Jesús Xa' Nyebe'.

Pab nde Bernabé nda yez Antioquía lo xyon Pisidia

¹³ Ngolo jwan' re', mbro' Pab yez Pafos mxen xa' bark nde kon tipla wes nda xa' yez Perge lo

xyon Panfilia; le' Juan Marcos tyaja mblake xa' nde mbere xa' yez Jerusalén.

¹⁴ Le' re xa' ndaga xa', mbri'd xa' yez Perge, mzin xa' yez Antioquía lo xyon Pisidia. Nde wiz jwan' ndryo'xkwen men, ngwa xa' len' yo ten' ndyop re men Israel nde mdob xa'.

¹⁵ Sen' ngolo mbwab ley chan' Moisés nde ye's jwan' mke' re Profet, zyasa re xa' nak sin' len' yo ten' ndyop men Israel, mnabe' xa' sa ngwatne xa' lo re wes ta mzina', nchab xa':

—Wes, tez ndeno go' cho di's kone go' lazo' re men, ptej go'y lo men naya.

¹⁶ Zyasa mdoli Pab nde mta'b ya' Pab lo re men sa xe kwe men nde nchab Pab lo xa':

—Go' men Israel nde go' men nzeb lazon' Dios, bin go' jwan' re':

¹⁷ Dios, Xa' ta nak xwan' yez Israel, mblí Xa' re xa' gox lon' ta mbre pola sa mblilal Dios xa' ti yez ro, te'nyega ngok xa' men tedib lo ngo xa' yez Egipto, * kon yalne chan' Dios mblo'te Dios xa' yez ya.[†]

¹⁸ Nde mxek Dios xa' dibta len' cho' lin' ten' nak izyo nagan.[‡]

¹⁹ Ngolo mblu'x Dios gaz ned yez nabi' lo xyon Canaán,[§] zyasa mdaya' Dios yez ya lo re xa' gox lon' ta mbre pola.*

²⁰ Xisa, mer ti thap ayo' nzo cho'psi' lin', mdob Dios re xa' ngok jwes[†] sa nyebe' xa' lo yez Israel, axta lin' sen' ngo Profet Samuel.[‡]

* **13:17 13:17** Ex. 1:7 † **13:17 13:17** Ex. 12:51. ‡ **13:18 13:18** Nm. 14:34; Dt.1:31. § **13:19 13:19** Dt. 7:1. * **13:19 13:19** Jos. 14:1. † **13:20 13:20** Jue. 2:16. ‡ **13:20 13:20** 1 S. 3:20.

²¹ Zyasa mna'b xa' rey, § nde mda' Dios Saúl xin' Cis, mbi' jwan' nde lo bin Benjamín, * mbi' re' ngok rey cho' lin'.

²² Xisa mkib Dios yalnyebe' lo Saúl, † nde mtob Dios David ngok rey, nde mni Dios di's wen xis David, nchab Dios: "Axata nak lazo'n nak David xin' Isai, xa' li reta jwan' ncholas na." ‡

²³ Nde axata mke'yek Dios ta ngoka, lo bin David mzin Jesús, Xa' mtel' Dios tola' men Israel.

²⁴ Sen' tera' ryo'to Jesús, Juan mdej lo reta men yez Israel, ryole men sa la' men reta jwan' narax nak men nde bere men lo Dios. §

²⁵ Sen' ndoyolo rsin' Juan, zya nchab Juan: "¿Cho nak na ndli go' xgab? Na'nakta na Crist.* Xis na re' nde ti Xa' nekla nsal' na xak na yalyid nge ni Xa'."

²⁶ 'Wes na, re na' ta nde lo bin Abraham nde re go' men thib lad ta nseb lazon' Dios, lo reta na' mtel' Dios xki's Dios, di's ntola' men.

²⁷ Tak reta men yez Jerusalén nde re xa' nak sin', na'ngyolod xa' Jesús, nekla ngyen xa' xki's re profet jwan' ndlab xa' re len' wiz jwan' ndyro'xkwen men, per mbli xa' jwan' nchaba, lo sen' mke' xa' yalke yek Jesús.

²⁸ Nde tenye na'ngasalta xa' nek thib yalke ndli gaj Jesús, per mna'b xa' lo Pilat gaj Jesús. †

²⁹ Sen' ngolo mbli xa' reta jwan' ngeni lo ye's, jwan' lino xa' Jesús, zya mbli xa' Jesús lo kruz

§ 13:21 13:21 1 S. 8:5. * 13:21 13:21 1 S. 10:21. † 13:22 13:22 1. S. 13:14. ‡ 13:22 13:22 1. S. 16:12; Sal. 89:20. § 13:24 13:24 Mr. 1:4; Lc. 3:3. * 13:25 13:25 Jn. 1:20. † 13:28 13:28 Mt. 27:22-23; Mr. 15:13-14; Lc. 23:21-23; Jn. 19:15.

nde mka's xa' Jesús len' ba'.‡

³⁰ Per Dios mblo'xban Jesús xij re men nguj

³¹ Nde na'r toz wiz mbro'to Jesús lo re xa' jwan' ndyonke xis Jesús sen' dryo' xa' Galilea nde ncha Xa' Jerusalén,§ re xa' ya nak xa' mney nde naya re xa' ya ndyodi's xki's Jesús lo re men yez na'.

³² 'Nde noga ndej ná' di's wen chan' Jesucrist, di's ta mke'yek Dios lo re xa' gox lon' ta mbre pola,

³³ nde naya, lo re na' jwan' nde lo bin chan' re xa' goxa, lon' ngok jwan' nchab Dios sen' lo mbro'xban Jesús, ta xa ngeni Salmo mbrop, jwan' nchab: “Lu nak xin' na, na mbli sa nzoa naya.”*

³⁴ Nde lo ta mblo'xban Dios Jesús xij re men nguj sa na'gasta bel' Xa', nchaba lo Salmos: “Lo go' lin re yalwen nde jwan' gal' ta mke'yek na lo David.”†

³⁵ Jwan' nasa, noga tedib lad lo salmos nchab: “Na'tad la di's gàs bel' Xa' Nayon loa.”‡

³⁶ Tak David liga ngok xa' sin' lo re men jwan' mbre tyemp xa', mbli xa' jwan' xa nchola's Dios, nde xisla nguj xa' nde mbwa's xa' ten' nzo ka's re xa' gox lo xa', nde ngo's bel' xa'.

³⁷ Per Jesús, Xa' ta mblo'xban Dios na'nga'sta bel' Xa'.

³⁸ Wes na, ptan na, ndablo yolo go' jwan' re', ná' ndej, ben'ta Jesús li sa dyon' reta xken men,

³⁹ tak reta men jwan' na'ngakta ndro'to nambi kon ley chan' Moisés, Jesús mbli gan mbro'to nambi xa' lo ndli lazo' xa' Jesús.

‡ 13:29 13:29 Mt. 27:57-61; Mr. 15:42-47; Lc. 23:50-56; Jn. 19:38-42. § 13:31 13:31 Hch. 1:3. * 13:33 13:33 Sal. 2:7.

† 13:34 13:34 Is. 55:3. ‡ 13:35 13:35 Sal. 16:10.

⁴⁰ Ndawi' toz go', sa na'yeta xis go' di's jwan' mke' re profet, jwan' nchab:

⁴¹ Re go' ta ngotal xki's na, bwi' go', aka jwan' nzoyen go', nde lux go', tak len' wiz ta nzi go' re', lin ti jwan', na'lid lazo' go'y tenye tej mena lo go'.§

⁴² Sen' mbro'te Pab len' yo ten' ndyop re men Israel kon re xa' jwan' ngeteno Pab, zyasa re xa' na'nakta men Israel mna'b xa' lo Pab sa noga tedib wiz jwan' ndryo'xkwen men todí's Pab tud di's re' lo xa'.

⁴³ Sen' ngolo mbrya's re men, bro re xa' judí nde re xa' jwan' ngolal men judí, mdonke xa' xis Pab nde xis Bernabé. Nde mni toz Pab lo re xa' ya, sa thibla' tyono xa' yalwen chan' Dios.

⁴⁴ Sen' ngoxo'b tedib wiz jwan' ndryo'xkwen men, mer dib yez mdyop, sa gon xa' xki's Dios.

⁴⁵ Per sen' mne re xa' judí bro toz men mdyop, tolo mbyi'no xa' Pab, narax mkab xa' lo re jwan' ndej Pab, mkabro xa' nde mni xin xa'.

⁴⁶ Le' Pab kon Bernabé na'nzyepta xa', mkab xa':

—Nerka lo go' nakin' todí's ná' xki's Dios, per naya ta ngotal go'y nde le'ga go' ndyak na'nzal'ta go' kaya' go' yalnaban adi', jwan' nasa mas nda ná' lo re men na'nakta Israel.

⁴⁷ Tak tamod mnabe' Xa' Nyebe' lo ná', ne Xa': Mtob na lu sa ak la xni lo re men na'nakta Israel, nde axta ploja mdib izyo tej la lo re men, ke na tola' men.*

§ 13:41 13:41 Hab. 1:5. * 13:47 13:47 Is. 42:6; 49:6.

⁴⁸ Sen' mbin re xa' na'nakta Israel jwan' re' nale toz ngo lazo' xa' nde nchab xa', wen toz nak xki's Xa' Nyebe'; nde mbli lazo' xa' Jesús, reta xa' jwan' nak be'la kaya' yalnaban adi'.

⁴⁹ Nde xki's Dios mbrya'sa dib nax tya.

⁵⁰ Le' re xa' judí mtokil' xa' re ngol ta nxobyek re jwan' ndli lazo' re xa' judí nde re ngol ntak nde kon re xa' bi' jwan' mas ntak lo yez, thihta ngok di's re xa' sa mtoxon' xa' Pab nde Bernabé, mblo'te xa' xa' lo xyon ya.

⁵¹ Zyasa Pab kon Bernabé mzib xa' yothi' ni xa', sa mblo' ke mblo'tal re xa' ya xki's Dios, nde nda xa',[†] mzin xa' yez Iconio.

⁵² Le' re xa' jwan' ndli lazon' Jesucrist nale toz nzo lazo' xa' nde dib ben xa' mde' Mbi Nayon.

14

Pab kon Bernabé ngete yez Iconio

¹ Ten' nak yez Iconio, Pab kon Bernabé ngote rop xa' len' yo ten' ndyop re men judí sa mdodi's xa' xki's Dios lo re men nde bro toz re xa' judí nde re xa' na'nakta Israel mbli lazo' xa'y.

² Per re xa' judí jwan' na'ndlid lazon' Jesús, mtokil' xa' re men na'nakta Israel sa mbyi'no xa' re men ndli lazon' Jesús.

³ Nde tenye ta naka, bro tyemp ngo Pab kon Bernabé yez ya nde mdob xgab xa' lo Xa' Nyebe' na'nzyepta xa' ndyodi's xa' xki's Dios, le' Xa' Nyebe' ndlo' ke liga re yalwen chan' Xa' jwan' ndyodi's Pab, nde nda' Xa' Nyebe' yalne lo rop xa' sa ndli xa' re yalnaro jwan' nzoyen men.

[†] **13:51 13:51** Mt. 10:14; Mr. 6:11; Lc. 9:5; 10:11.

⁴ Nde re men nzo yez ya ngok rol xa', nzo xa' ndo kon re xa' judí nde nzo xa' ndo kon rop apóst.

⁵ Zyasa re xa' judí nde re xa' nanakta judí thipta ngok di's xa' kon re xa' nak sin' lo yez, sa toti xa' nde gadke xa' rop xa' ta nak apóst.

⁶ Sen' mbin rop apóst jwan' re', mxon' xa' nda xa' yez Listra nde yez Derbe, yez jwan' nzi lo xyon Licaonia nde noga nda xa' reta re yez jwan' nzi gax tya,

⁷ nde tya mdej xa' di's wen chan' Jesucrist lo re men.

Mbwad ke xa' Pab yez Listra

⁸ Yez Listra nzo ti mbi' na'ndyeda. Xata ngol xa nayiz ni xa' jwan' nasa na'ndyed xa'. Mbi' re' ndob tya,

⁹ ndoyon xa' re di's ni Pab, zya mbwi' Pab lo xa' tak mne Pab ndlipa lazo' xa' dyan' xa',

¹⁰ nde ne mni Pab, nchab Pab:

—¡Ptolí nde gal' pto nia!

Le' mbi' ya ngwat xa' nde mde xa'.

¹¹ Sen' mbwi' re men jwan' mbli Pab, zyasa ne mbrez reta xa', kon xki's men lo xyon Licaónica, nchab xa':

— ¡Dios nak re mbi' ta mzin lon' re'!

¹² Bernabé mblolé xa' Júpiter nde Pab mblolé xa' Mercurio, tak Pab jwan' ndo ye' di's.

¹³ Zyasa ngwley' chan' Júpiter ngeno xa' yodon' xa' ndob ngo' lo yez sa ndeno xa' ngon nde ye', thipta nde xa' kon reta men, nchola's xa' kuj xa' ma' yon jwan' ta' xa' lo Pab kon Bernabé.

¹⁴ Sen' mne Bernabé kon Pab jwan'na, mched xa' xab xa' nde ngote xa' xij reta men, ne mbrez xa',

¹⁵ nchab xa': —¡Reta go' ba! ¿Cho kwan liy ndli go' jwan' re'? Rop ná' re', taga' men nak ná' xa nak go' ba, jwan' nasa ndetej ná' lo go', bla' go' re mnab ta ngencho sin' li nde bli lazo' go' Dios naban, Xa' ta mdoxkwa' be' nde izyo, nitto', nde reta jwan' nzi lo kad thibay.

¹⁶ Pol lin'na' mda' Dios di's kad men ban men axa nchola's men,

¹⁷ per thibka ndlo' Dios cho nak Dios, por re jwan' wen ndli Xa'; le' Xa' ndla yi ndryo' lo be', sa nawe nchak re jwan' bin, thibla' nzo jwan' ncha men sa nale nzo lazo' men.

¹⁸ Tenye nchab Pab kon Bernabé reta jwan'na, nen toz sa mbli xa' gan mtow' xa' lo re men sa na'ngujta men ma' yon lo xa'.

¹⁹ Zyasa mzin pla xa' judí mbro' yez Antioquí nde Iconio, mblo xa' yek reta men sa mzye' xgab men nde mbwadke xa' Pab, ngolo jwan' re' mdo'bnyo xa' Pab axta ro yez, tak mbli xa' xgab nguj Pab.

²⁰ Le' re xa' jwan' ndli lazon' Jesús mdyop xa' ten' nax Pab, zya ngoche Pab nde nda Pab len' yez. Sen' mduxni tedid wiz mbro' Pab tya kon Bernabé nde nda xa' yez Derbe.

²¹ Sen' ngolo mdej xa' di's wen chan' Jesucrist dib yez Derbe, mbli xa' gan bro toz men mbli lazo' xa' Jesús. Zyasa mbere Pab kon Bernabé yez Lистра, yez Iconio nde yez Antioquí.

²² Re yez ya mketegone xa' lazo' re men jwan' ndli lazon' Dios, ntoni xa' re men ya sa na'lad xa' thibla' tyo xa' lo jwan' ndlipa lazo' xa', sa nchab Pab kon Bernabé lo re xa', ndabloga rid men lo reta yalti sa yote men lo yalnyebe' chan' Dios.

²³ Nde kad yodo' mblo' xa' re xa' nak sin' gol , sen' mne mna'b xa' lo Dios nde mne mbli xa' yalse, mda'ya' xa' re men ya lo Jesucrist Xa' ta ndli lazo' xa'.

Pab kon Bernabé mbere yez Antioquía lo xyon Siria

²⁴ Xisa mbri'd ndab Pab kon Bernabé lo xyon Pisidia nde mzin xa' lo xyon Panfilia,

²⁵ nde sen' ngolo mdej xa' xki's Dios yez Perge, nda rop xa' yez Atalia.

²⁶ Tya mxen xa' bark ndya xa' yez Antioquí, ten' ta re xa' nak wes mdaya' xa' xa' lo Dios sa ya tej xa' xki's Dios nde sin' ya jwan' ngolo mbli xa'.

²⁷ Sen' mzin xa' Antioquí, mthop xa' reta men nzi yodo' nde mdej xa' plopa yalnaro mbli Dios lo xa' nde xa mxyal' yala jwan' li lazo' xa' lo re men na'nakta judí sa no re men ya mkaya' xa' xki's Dios.

²⁸ Nde bro tyemp ngo Pab kon Bernabe tya, kon re men jwan' ndli lazon' Dios.

15

Yaltodi's mkeno xa' yez Jerusalén

¹ Len' wiz ya mbro' pla xa' lo xyon Judea nde mzin xa' yez Antioquí nde ndlo' xa' lo re wes, tez na'tyopta be' ten' nak lad men bi' jwan' xa nyebe' ley chan' Moisés* na'nyeda lya' men.

² Le' Pab kon Bernabé jwinka ngwa xa' kwent kon re xa' ya, yaja re wes nzi tya mna'b xa' lo Pab kon Bernabé kon tipla wes, sa ya xa' yez Jerusalén

* 15:1 15:1 Lv. 12:3.

sa todi's xa' jwan' re' kon re apóst nde re xa' nak sin' lo yodo'.

³ Zyasa re xa' nzi yodo' yez Antioquía, mbloned xa' xa', nde mbrid xa' lo xyon Fenicia nde Samaria mketetej xa' lo re wes, ke re xa' na'nakta judí mbla' xa' re mod gox chan' xa' nde mbli lazo' xa' Dios, sen' lo mbin re wes jwan'na, nale toz ngo lazo' re xa'.

⁴ Sen' mzin Pab kon Bernabé yez Jerusalén, le' re xa' jwan' nzi yodo', re xa' jwan' nak apóst nde re xa' nak sin' lo yodo' mkaya' xa' xa', le' Pab kon Bernabé mdej xa' reta jwan' mbli Dios kon xa'.

⁵ Per pla xa' fariseo, xa' mbli lazon' Jesús, mdoli xa' nde nchab xa':

—Nakin'ka nyebe' men lo re xa' na'nakta judí sa tyob be' lad xa' ten' nak lad men bi'ba nde nyebe' men li xa' jwan' nyebe' ley chan' Moisés.

⁶ Zyasa mdyop re apóst nde re xa' nak sin' lo yodo', sa mdodi's xa' jwan' re'.

⁷ Sen' ngolo plopa mbrez xa', zyasa mdoli Pedr nde nchab Pedr lo xa':

—Reta go' wes na, mnela go' axta nera' mbli Dios na xij go' sa yatej na di's wen chan' Jesucrist lo re xa' na'nakta judí sa li lazo' xa' Dios.†

⁸ Nde Dios ta nzolo lazo' reta men, mblo' Dios lo re xa' ke mkaya' Dios xa' sen' lo mda' Dios Mbi Nayon‡ lo xa', jwan' xa mda'ga Dios lon'.§

⁹ Tak thipta ngwi' Dios re na' nde taga' ngwi' Dios tedib ned xa', jwan' nasa mtombi Dios lazo' xa' lo ndli lazo' xa' Dios.

† 15:7 15:7 He. 10:1-43. ‡ 15:8 15:8 He. 10:44. § 15:8 15:8 He. 2:4.

¹⁰ Le' naya, ¿Cho kwan liy sa nchola's go' li be' go' Dios, mbez go' lo men li xa' ti jwan' nek re xa' gox lon' mbre pola nde nek na' na'ndlid na' gan li na'y?

¹¹ Che'la, le' re na', ndli lazon' mblyan' por yalwen jwan' nda'la's Jesús Xa' Nyebe' nde taxa mod naka kon tedib ned xa'.

¹² Zyasa xe mbre reta men nde mke'nza xa' jwan' ndej Bernabé kon Pab, plopa naro nak jwan' mblo' Dios nde jwan' nzoyen men mbli Dios por xa', xij re men na'nakta Israel.

¹³ Sen' mne mdodi's rop xa', zya mkab Jakob nchab xa':

—Wes na, ptonza go' jwan' nin.

¹⁴ Pedr mdej, xomod mbrez ner Dios re xa' na'nakta judí nde mblilal Dios xa' men yez Dios.

¹⁵ Nde jwan' naxa ngeni lo ye's mke' re profet pola, jwan' nchab:

¹⁶ Ngolo jwan' re' beren

sa nakub toxkwan liz David jwan' ngob.

Tokub na re pto,

Nde liche nay tedib gob,

¹⁷ Sa masra' re men kwan' xa' Xa' Nyebe',

nde taga' re men jwan' na'nakta judí, re xa' ta ndli lazon' na.

¹⁸ Tamod ne Xa' Nyebe', axta pol lin'na mdejla Xa' re jwan' re'.*

¹⁹ 'Jwan' nasa mbez na, na'tow'ta na' lo re xa' na'nakta Israel ta ndoli lazon' xki's Dios,

* **15:18 15:18** Am. 9:11-12.

²⁰ ben'ta ke' men ye's lo xa', sa na'watra xa' re jwan' ta mbe lo mnab,[†] na'lid xa' re lo jwan' xkap,[‡] na'wad xa' ma' nchaj we, nde na'wad xa' ren.

²¹ Tak axta pola, kad re yez ngo thiba xa' jwan' ndlab ley chan' Moisés re len' yo ten' ndyop men Israel, len' re wiz jwan' ndryoxkwen men. §

²² Zyasa re apóst, kon re xa' nak sin' lo yodo' nde reta men jwan' ndyop yodo', mblo' xa' chop wes yanke xis Pab nde Bernabé sa tel' xa' xa' yez Antioquí, xa' ya nak, Judas xa' ndolega' Barsabás nde Silas, chop mbi' jwan' jwin nzo'b xki's na' xij re wes.

²³ Kon xa' re' mtel' xa' ye's jwan' nchab:

“Re ná' jwan' nak apóst, re xa' nak sin' gol lo yodo', nde kon re men jwan' ndyop nak yodo', ni ná' lo re go' wes na'nakta judí ta nzo yez Antioquí, lo xyon Siria nde lo xyon Cilisia, naxu't bre go'.

²⁴ Tak mbin ná' le'ga xij ná' re' mbro' pla xa' jwan' na'nakta ná' mda' di's lo xa' sa ngete xa' ngo narax xa' lazo' go' kon xki's xa', ngete tokan xa' go', nyebe' xa' lo go' tyob be' lad go' ten' nak lad men bi'ba nde xo'byek go' ley,

²⁵ jwan' nasa mas wen mbyan'di's ná', mblo' ná' chop wes mtel' ná', sa yatwi' xa' go' thita nda xa' kon Bernabé nde Pab xa' nke'lazo' ná',

²⁶ tak rop mbi' re' mdob xa' yalnaban chan' xa' lo yalnathoz por Jesucrist Xa' Nyebe'.

²⁷ Jwan' nasa mtel' na' Judas nde Silas, sa yub xa' tej jwan' re' lo re go'.

[†] 15:20 15:20 Ex. 34:15-17. [‡] 15:20 15:20 Lv. 18:6-23. § 15:21 15:21 Lv. 17:10-16.

²⁸ Tak ná' nde Mbi Nayon, mbwi' ná' ke nand-ablotra' nyebe' ná' li go' masra' jwan', ben'ta jwan' ndablo li go' nak:

²⁹ Na'wad go' bel' ma' ta nchuj xa' nda' xa' lo mnab, na'wad go' ren ma', nekla wa go' ma' ta nchaj we nde na'lid go' re lo ned jwan' xkap. Tez kenap lazo' go' lo re jwan' re', wen toz ngeli go'. Nabe'z bre go'."

³⁰ Zyasa mtel' xa' xa', ngo xa' ned nda xa' yez Antioquí nde sen' mzin xa' tya, mthop xa' reta wes yodo' nde mdaya' xa' ye's lo re wes.

³¹ Sen' mblab wes ye's, nale toz ngo lazo' re xa' tak mbloney lazo' xa'.

³² Le' Judas kon Silas nak xa' profet, sa mblone xa' lazo' re wes nde mdodi'sno toz xa' re wes sa tyosa' re xa' lo xki's Dios.

³³ Sen' ngoxo'b be' yo xa' ned tya, nabez mbloned re wes xa' sa bere xa' lo re wes jwan' mtel' xa'.

³⁴ Le' Silas mbro' lazo' xa' mbyan' xa' tya.

³⁵ Noga Pab kon Bernabé thibka mketelo' xa' di's wen chan' Xa' Nyebe' dib yez Antioquí kon tipla wes jwan' nziga tya.

Mbla' Pab Bernabé nde mdobte Pab brop byaj lo rsin' Dios

³⁶ Mbrid lud tyemp, Pab nchab lo Bernabé:

—Ndan' tedib gob re yez ten' ngwatejla na' xki's Xa' Nyebe', sa win' re wes nyen' xa nzi xa'.

³⁷ Le' Bernabé nchola's no Juan tye, xa' jwan' ndolega' Mark.

³⁸ Per Pab na'ndryo'd lazo' xa' we xa' ti men jwan' mblakela xis, xata mbyan' xa' yez Panfilia* nde na'ndlitra xa' kompay lo rsin' Dios.

³⁹ Jwan'na ndli sa jwinka ngwa Pab kwent kon Bernabé, yaja msil' ta xa', le' Bernabé mbe' Mark mxen rop xa' bark nde nda xa' lo xyon Chipre,

⁴⁰ le' Pab, mbli Silas nde mbloned re wes xa', mbli ley' wes xa' lo yalwen chan' Xa' Nyebe', mbro' xa' nda xa'.

⁴¹ Mbri'd xa' lo xyon Siria nde lo xyon Cilisia, mkete xa' re yodo' mblo ne xa' lazo' re wes.

16

Timoteo mdonke xis Pab kon xis Silas

¹ Ngolo jwan'na, Pab kon Silas mzin xa' yez Derbe nde yez Listra, ten' nzo Timoteo ti xa' jwan' nak xin' te'd Jesús, xin' ti ngol judí xa' ndliga lazon' Jesús, le' xud Timoteo na'nakta xa' men Israel.

² Nde re wes nzo yez Listra nde yez Iconio, wen ndyodi's xa' xis Timoteo.

³ Pab nchola's no Timoteo tyonke xis Pab, sa mnabe' Pab lo Timoteo mdob be' lad xa' ten' nak lad men bi'ba, sa tamod re xa' judí jwan' nzo tya wen wi' xa' Timoteo, tak reta men mne le' xud Timoteo nak xa' gryeg.

⁴ Nde re yez jwan' ndarid xa', taja ndatej xa' lo men, re jwan' ndablo li men, jwan' mbyan'di's re xa' nak apóst nde re xa' nak sin' gol nzi yez Jerusalén sa xo'byek xa'y.

* 15:38 15:38 He. 10:44,13.13.

⁵ Jwan' nasa re men yodo' ta nzi tya masra' ndob xgab xa' lo jwan' ndlipa lazo' xa' nde kad wiz masra' ndoya'r xa'.

Ti mbi' lo xyon Macedon mbro'lo lo Pab

⁶ Lo ta na'nda'da Mbi Nayon di's ngatej xa' xki's Dios lo xyon Asia, yaja mbri'd xa' lo xyon Frigia nde Galacia,

⁷ sa mzin xa' lo xyon Misia, tya mbli xa' xgab ya xa' lo xyon Bitinia, per na'nda'da Mbi Nayon di's nga xa' tya.

⁸ Yaja ndagal' xa' mbri'd xa' lo xyon Misia nde mdola xa' mzin xa' yez Troas.

⁹ Sen' mbli yal', zya xaja men msal' lazon' ba mbwi' Pab ti mbi' lo xyon Macedon, mbi' ya ndoli nde mna'b toz xa' lo Pab, nchab xa': "Ye'd la lo xyon Macedon sa la'stoa ná'."

¹⁰ Sen' ngolo mbwi' Pab mbi' ya, zyaga mdosa' ná' nda ná' lo xyon Macedon, tak mne ná' Dios ngebez ná' sa yatej ná' di's wen chan' Jesucrits lo xa'.

Mke' men xa' lizyi'b yez Filipos

¹¹ Mxen ná' bark yez Troas, ndagal' ná' yez Samotracia nde axta tedib wiz mzin ná' yez Neápolis.

¹² Tya mbro' ná' nda ná' yez Filipos, ti yez chan' Rom, yez ntak lo xyon Macedon nde tya mbyan' ná' pla wiz.

¹³ Nde len' wiz jwan' ndryo'xkwen men, mbro' ná' len' yez sa ngwa ná' ti ro yo' ten' thibka ndyop men sa ndyodi'sno xa' Dios. Tya mdob ná' nde mdej ná' xki's Dios lo re ngol jwan' nzi tya.

¹⁴ Zyasa ti ngol ndole Lid, ngol yez Tiatira, xa' ntho lar lan jwan' nap toz. Ngol re' nxobyek toz xa' Dios, ndoyon ngol jwan' ndotej Pab, tak Xa' Nyebe' mxal' lazo' ngol sa mtonza ngol xki's Dios.

¹⁵ Sen' ngolo mbro'le ngol kon re men liz ngol, zya mna'b ngol lo ná', ne ngol:

—Tez ngwi' go' na liga ndli lazo'n Xa' Nyebe', ya' go' ndyan' liz na sa tya kwed go'.

Nde nega ndo ngol kebe' mbled ná' liz xa'.

¹⁶ Sen' lo nda ná' ten' todi'sno ná' Dios zya mzyal' ná' ti mza' ndono xbi jwan' naye' mza'. Sin' ya ndli mza' nde jwan' toz nzena' mza' tmi jwan' ndaya' mza' lo xa' nak xwan' mza', lo ta naye' mza'.

¹⁷ Mza' re' mdonke xis re ná' Pab nde tolo ne mbrez mza', nchab mza':

—Re mbi' re' ndli sin' lo Dios naro toz, le' xa' ndetej lo go' ned jwan' xomod lya' men!

¹⁸ Nde na'r toz wiz ta mketebez mza', axta kebe' ngoche lazo' Pab, nde mbyek Pab, nchab Pab lo xbi jwan' ndono mza':

—Lo le Jesucrist, nyebe'n loa bro'te lazo' mza' ba.

Nde zyaga mbro'te xbi ya lazo' mza'.

¹⁹ Le' re xa' ta nak xwan' mza', sen' mne xa' na'nzena'tra' mza' tmi, zya mxen xa' Pab nde Silas mbe' xa' xa' lo men nak sin' yolow ro.

²⁰ Nde mbro'tono xa' Pab kon Silas lo men nak sin' nde nchab xa':

—Rop mbi' re' nak men judí nde ngetetokan xa' re men yez na',

²¹ ndlo' xa' thibned jwan' na'nyeda kaya' men nde jwan' na'ndabloda li men, tak na' re', men yez Rom nak na'.

²² Zyasa reta mayez mke' xa' yalke yek Pab kon Silas, le' re xa' nak sin' mnabe' xa' mbro'te xab Pab kon Silas nde mdin xa' xa' kon ya kos.

²³ Sen' ngolo mdin toz xa' rop mbi' re', mblo xa' xa' lizyi'b nde mnabe' xa' lo xa' ngenap lizyi'b sa jwin toz kenap xa' rop mbi' re'.

²⁴ Sen' mkaya' xa' yalnyebe' ya, zya ngwa lo xa' Pab kon Silas ti ten' mas na's len' lizyi'b nde mblo xa' ni Pab kon ni Silas len' ye'r lad ya ten' na'nyeda tyoli xa'.

²⁵ Nde rolja yal', Pab kon Silas mdodi'sno xa' Dios nde mbil' xa' lo Dios nde reta xa' jwan' nge lizyi' mbin xa' jwan'na.

²⁶ Zyasa mbye'd ti xo toz, axta re xan' bto' chan' lizyi'b mbwina, zyaga mxyal' reta ro yala nde mxyak re kaden jwan' ndobo re xa' nge lizyi'b.

²⁷ Sen' mbro'xkal' xa' ta ngenap lizyi'b, mbwi' xa' ndoxal' reta ro lizyi'b, zya mblo'te xa' espad xa' sa kuj xa' lazo' xa', tak mbli xa' xgab mxon' reta men nge lizyi'b.

²⁸ Zya ne mbrez Pab, nchab Pab lo xa':

—Na'kujta lu lazo'a, tak reta ná' nzi' nche'!

²⁹ Le' xa' ngenap lizyi'b mna'b xa' xni nde mke' xa' karrel ngote xa' len' lizyi'b, anta nxi'd xa' mdo xub xa' lo ni rop xa'.

³⁰ Zyaga mblo'te xa' Pab kon Silas nde nchab xa':

—¿Cho kwan ndablo lin sa lya'n?

³¹ Le' Pab kon Silas mkab lo xa':

—Bli lazo'a Jesucrist Xa' Nyebe', sa lya'a nde lya' reta men liz la.

³² Nde mdej xa' xki's Dios lo mbi' ya nde lo re men liz xa'.

³³ Nde yal' yaga, xa' ta ngenap lizyi'ba mtach xa' ten' nawi'y lad Pab nde lad Silas, nde zyaga ngwa xa' sa mbro'le xa' nde kon re men liz xa'.

³⁴ Nde mbe' xa' Pab kon Silas liz xa' sa mda re xa' nde nale toz ngo lazo' re liz xa', tak mbli lazo' xa' Dios.

³⁵ Sen' mduxni izyo, re xa' nak sin' mtel' xa' polící sa ngwatne polící lo xa' ta ngenap lizyi'b, sa la' xa' Pab kon Silas.

³⁶ Le' xa' ngenap lizyi'ba, nchab xa' lo Pab:

—Re xa' nak sin' mnabe' ryo'te go'; jwan' nasa bro'te go' nde nabe'z bya go'.

³⁷ Le' Pab nchab lo re polící:

—Nzi wi' reta men ngen cho yalke mdin xa' ná', mke' xa' ná' lizyi'b nde men yez Rom nak ná'. ¿Nde naya nchola's xa' naga's kote xa' ná'? Na'akta jwan'na, nakin' yub xa' nyebe' ye'd sa kote xa' ná'.

³⁸ Le' re polící ngwayab xa'y lo re xa' nyebe', sen' mbin re xa' nyebe' le' Pab kon Silas nak xa' men Rom, mzyeb toz xa'.

³⁹ Zyasa re xa' nyebe' ngwa xa' nde mna'b xa' lo Pab kon Silas sa ri'd xa' yek xa' re jwan' ngok. Nde mblo'te xa' xa' lizyi'b nde mna'b xa' lo xa' sa ryo'te xa' len' yez.

⁴⁰ Sen' mbro'te rop xa' lizyi'b, ngwa xa' liz Lid, sen' ngolo mbwi' xa' re wes nde mblone xa' lazo' re wes, zya ngo xa' ned ndya xa'.

17

Ngok bxol re mayez yez Tesalónica

¹ Pab kon Silas, mbridnda'b xa' yez Anfípolis nde yez Apolonia zyara' mzin xa' yez Tesalónica, tya ndob ti yo jwan' ndyop men Israel.

² Le' Pab, xa naka xa', ngwa xa' ten' ndob yo ndyop re men Israel, nde son wiz jwan' ta ndroxkwen men ngwa xa' kwent kon re men nzi tya,

³ nde xa ngeni xki's Dios ta mblo'xkan Paba lo re men, le' Crist nakin'ka rid Xa' yalti nde ryo'xban Xa' xij re men nguj nde noga nchab Pab:

—Le' Jesús ta ndej na re', Xa' nak Crist.

⁴ Nde nzo pla xa' judí mbli lazo' xa' Jesús, mkata xa' kon Pab nde kon Silas, le' re xa' gryeg, xa' jwan' nxobyek Dios nde re ngol jwan' ntak lo yez, bro toz re xa' re' mbli lazo' xa' Jesús.

⁵ Zyasa re xa' judí xa' na'ndlid lazon' Jesús, mxí lazo' xa', mthop xa' pla mbi' sa'b, mbi' narax, nde mkata bro xa' sa ngok bxol xa' len' yez. Mbla xa' liz Jasón, nkwan' xa' Pab kon Silas sa kote xa' xa' nde taya' xa' xa' lo mayez.

⁶ Lo ta na'ngasalta xa' Pab kon Silas, zyasa mbe' xa' Jasón kon tipla wes, nde mdaya' xa' xa' lo re xa' nak sin' lo yez, nchab xa':

—Xa' re' ngetetokan men dib nax izyo nde naya nde xa' nche'.

⁷ Jasón mda' yo nzo xa', nde reta men jwan' ndyonke xis xa' na'nxobyekta xa' re jwan' nyebe' Cesar, tak mbez xa' ke nzoga' tedib rey ndole Jesús.

⁸ Sen mbin re mayez jwan' re' nde kon re xa' nak sin', zyasa ngok bxol reta xa'.

⁹ Per Jasón nde ti pla wes mdi'x xa' lo xa' yolow sa mbla' xa' xa'.

Pab kon Silas nda yez Berea

¹⁰ Zyaga re wes, yal' mtel' xa' Pab kon Silas axta yez Berea. Nde ben'ta mzin ned xa' Berea, ngwa xa' yo ten' ndyop re men judí.

¹¹ Nde re men nzi tya mas wen nak xa' ke re men nzi yez Tesalónica, tak re xa' re', dib nzo lazo' xa' mbin xa' xki's Dios nde reta wiz nte'd xa' xki's Dios sa nye xa' nyen' cho li ta naka.

¹² Nde bro toz re xa' nzi tya mbli lazo' xa' Jesús, taga' bro re xa' grieg, xa nak re ngol ndak lo yez nde re men bi', mbli lazo' xa' Jesús.

¹³ Per re xa' judí, xa' yez Tesalónica, sen' mbin xa' no yez Berea ngetetej Pab xki's Dios, zya ngwa xa' tya, nde mtoxol xa' re mayez.

¹⁴ Zyaga, re wes, mtel' xa' Pab sa ya Pab ned ro nitto', le' Silas kon Timoteo mbyan' xa' yez Berea.

¹⁵ Nde re wes jwan' ndalo' ned lo Pab, mbe' xa' Pab axta yez Atenas. Zyaga mbere xa' tedib gob, ndeno xa' di's jwan' mtel' Pab lo Silas kon lo Timoteo sa ken xa' ya xa' ten' nzo Pab.

Pab ngete yez Atenas

¹⁶ Laj mkembed Pab yez Atenas sa yotu Silas kon Timoteo, axta mbyow lazo' Pab tak mbwi' Pab mze len' yez nzi re mnab jwan' ndli lazo' xa'.

¹⁷ Jwan' nasa, ngwa Pab di's kon re xa', len' yo ten' ndyop men Israel, kon re xa' judí nde re xa' jwan' nxobyek toz Dios, taga' kon re xa' jwan' ndyop lo xbi'.

¹⁸ Nde pla xa' nchak, * xa' jwan' nak epicúreos†

* **17:18 17:18** Nak xa' men filósofo, nchak toz xa', nte'd xa' kwan liy sa nzi men. † **17:18 17:18** Re xa' ta nak epicúreos ndli xa' xgab jwan' mas nakin' lo laj naban men nak nale yo men

nde tedib ned xa' nak estoicos[‡], ngwa xa' di's kon Pab. Nde tipla xa' nchab:

—¿Cho kwent nda' mbi' tadi's pchoba?

Tipla xa' nchab:

—Tyak men kwent chan' tib ned dios kub ndetej xa'.

Tak le' Pab ndej di's wen chan' Jesucrist nde chan' yalndryoxban.

¹⁹ Zya mxen xa' Pab nde mbe' xa' Pab Areópago, nde nchab xa':

—¿Cho toyal nye ná' xamod nak yalte'd kub ta ndej la ba?

²⁰ Tak na'nzolutirta ná' re jwan' ta ndej la ba. Nchola's ná' nye ná' xomod naka.

²¹ Tak re men yez Atenas nde re men xaga yez jwan' nzo tya, ngentra' kwan mbix xa', ben'ta ndyen xa' tadi's xa' nde gon xa' re jwan' kub.

²² Zyasa mdoli Pab xij re men nzi Areópago, nchab Pab:

—Men yez Atenas, ngwi'n jwan' toz ndli lazo' go' re dios jwan' ngeno go'.

²³ Tak laj ndari'd na, mbwi'n ten' nxobyek go' re dios go' tya ngosi'b na ti ten' nchab: "LO DIOS NA'NZOLOD MEN". Dios jwan' ta na'nzolod go' nde nxobyek go', Xa' ya ta ndej na re'.

²⁴ 'Dios ta mdoxkwa' izyo nde reta jwan' nzi xis izyo, Xa' ya Nyebe' lo be' nde izyo. Na'nchod Xa' len' yodo' ndoxkwa' ya men,§

[‡] **17:18 17:18** Re xa' nak estoicos ndlo' xa' lo men sa le'ga men li men sa yal lazo' men na'lid men jwan' narax. § **17:24 17:24**. Is. 42:5.

²⁵ nekla nakin' Xa' men toxkwa' jwan' nchola's Xa', tak Xa' nda' yalnaban, Xa' ndli sa nzi men nde Xa' nda' reta jwan'.

²⁶ 'Kon thipta mbi' mtoya'r Dios reta ned men ta nzi dib xis izyo; nde Dios mtan' nyen' cho be' ban men nde ploja kwe men.

²⁷ Sa kwan' men Dios, tez toyala te' ya' men sa yosal men Xa', tak di's gal'ka na'ndod Dios tij lo na'.

²⁸ Tak Dios ndli sa naban na', ngwin na' nde nzon'. Xa nchabka pla men go', xa' nchak, ntoxkwa' di ngo xij go' pola: "Lo bin Dios nden'."

²⁹ Lo ta nden' lo bin Dios, nandabloda lin' xgab le' Dios nya xaja nya ti mnab ta naksa' or, jwan' plat o ke, jwan' ntoxkwa' ya' men, jwan' axaja nchal yek men ntoxkwa' men.

³⁰ Per Dios, mtori'd yek Xa' re jwan' kow mbli re men nzi pola, nde naya Dios nyebe' lo reta men, sa reta ten' nzi men la' men re jwan' narax nak men nde bere men lo Dios.

³¹ Lo ta mtan'la Dios ti wiz nya'b Xa' kwent lo reta men kon ti mod gal', jwan'na li mbi' ta mbli Dios, nde mtan'no Dios Xa' lo reta men sen' lo mbliche Dios Xa' xij re men nguj.

³² Sen' mbin re xa' jwan' ta ryo'xban men nguj, nzo men mxino xa' Pab nde nzo xa' nchab:

—Ba tedib gob sa gon ná' tud jwan' ta ndej la ba.

³³ Nde tamod mbro'te Pab xij re xa' ya.

³⁴ Nzo pla xa' mbli lazon' xki's Dios nde mdonke xa' xis Pab, xija nzo tib xa' ndole Nich, xa' jwan' nzo xij re xa' nyebe' lo Areópago, kon ti ngol ndole Dámaris nde nzora' masra' xa'.

18

Pab ngete yez Corint

¹ Sen' ngolo re jwan' re', Pab mbro' yez Atenas nde nda xa' yez Corint.

² Tya ngosi'b xa' ti mbi' judí ndole Aquil kon xa' got xa' Priscil xa' lo xyon Ponto per le' xa' ngo Italia nde ludla ndate mbro' xa' Italia mzin xa' yez Corint, tak Claudio xa' nyebe' lo yez Rom, mnabe' sa reta men judí ndablo ryo'te xa' yez Rom. Le' Pab ngwatna rop ta xa' re',

³ tak thipta rsin' xa', jwan' nasa mbyan' Pab kon xa' sa thita mke xa' sin', tak le' xa' ntoxkwa' re yo yid ma'.

⁴ Nde reta wiz jwan' ndryoxkwen men nda Pab ten' ndob yo ndyop re men Israel sa ncha Pab di's kon re xa' judí nde re xa' na'nakta judí sa ko Pab yek xa' li lazo' xa' Jesucrist.

⁵ Sen' mbro' Silas kon Timoteo lo xyon Macedon nde mzin xa' yez Corint, reta wiz mketetej Pab xki's Dios nde ngo'xkan Pab lo re xa' judí ke Jesús nak Xa' mtel' Dios.

⁶ Per re xa' judí na'ndoyalta xa' ndli lazo' xa' jwan' ndej Pab nde mni xin xa', zyasa mzib Pab xab Pab nde nchab Pab lo xa':

—Le'ga go' nchap yalke sa lux go', le' na nambi ndon, nche'ja lan go', naya le'n nda lo re men na'nakta judí.

⁷ Sen' mbro' Pab tya, nda Pab liz ti xa' ndole Just, xa' nzeb lazon' Dios, liz xa' ndob gax cho yo ten' ndyop re men Israel.

⁸ Le' Crispo, xa' nyebe' len' yo ten' ndyop re men Israel, re liz xa' mbli lazo' xa' Jesús, na bro toz re

men yez Corint, lo mbin xa' xki's Dios mbli lazo' xa'y nde mbro'le xa'.

⁹ Zyasa yal' mni Xa' Nyebe' lo Pab xaja men nzal' lazon'ba, nchab Xa':

—Na'zyepta lu, ptej xki's na lo re men nde natow'ta la roa,

¹⁰ tak na ndo kon lu, nde nek thib xa' na'lida gan toti xa' lu, tak bro toz men ngenon yez re'.

¹¹ Jwan' nasa, tib lin' narol ngo Pab yez Corint, mblo' xa' xki's Dios lo re men.

¹² Len' lin' ya, Galión nak xa' nyebe' lo xyon Akaya, zyasa re xa' judí thita ngok di's xa' sa ke' xa' yalke yek Pab nde mbe' xa' Pab yolow,

¹³ sa nchab xa':

—Mbi' re', ngetetokil' re men sa xobyek men Dios ti mod na'ngenida ley.

¹⁴ Le'ja tyobte kab Pab, ner Galión nchab lo re xa' judí:

—Re go' men judí, tez ngaka nchap xa' re' cho yalke o tez nchap xa' yalke ro jwan' mbij xa' men, zyasa ndabloga wi'n chen' go'.

¹⁵ Per tez napta di'sa, be'n le mena nde ley chan' go'y, le'ga go' bwi'y, tak na'ncholasta na goxyon jwan'na.

¹⁶ Nde mblo'te xa' xa' len' yolow.

¹⁷ Zyasa reta xa' mxenta, mxen xa' Sóstenes, xa' jwan' nyebe' len' yo ten' ndyop men Israel nde tyaga lo re xa' yolowa mdin xa' xa', ana'ndyo Galión jwan'na.

¹⁸ Le' Pab tata bro ngo xa' yez Corint. Ngolo jwan'na, Pab nchab lo re wes ke yo Pab ned tyen xa' bark ya xa' lo xyon Siria, zyasa mbe' Pab Priscil kon Aquil, lo sen' mzin xa' yez Cencrea

ro nitto', tya thiptane mchub Pab yek Pab, tak jwan'na mke'yekla Pab lo Dios.*

¹⁹ Sen' mzin xa' yez Éfeso, tya mbla' Pab Priscil nde Aquil nde nda Pab ten' ndob yo ndyop re men Israel, tya ngwa Pab di's kon re xa' judí.

²⁰ Re xa' nzi tya mna'b xa' lo Pab sa kwed Pab lo xa' tipla wiz, per na'ndoyalta Pab,

²¹ che'la nchab Pab lo xa':

— Nakin' ndan yez Jerusalen sa tya ri'd na ni jwan' nde gaxla, per tez Dios nchola'sa tye'd win' go' tedib gob.

Zyasa ngo Pab ned yez Éfeso, ngwap Pab bark ndya Pab.

Mbere Pab yez Antioquía sa tyobte byon gob ryo' xa' ndatej xa' xki's Dios

²² Sen' mzin Pab yez Cesarea, mbro' Pab mbya Pab yez Jerusalén, mbya ni Pab dyux lo re wes nzi yodo', nde tya mdola Pab nda Pab yez Antioquí.

²³ Ngolo ngo Pab tya ti tyemp, xisa mbro' Pab ngwatna xa' kad thiba yez jwan' nzi lo xyon Galacia nde Frigia, ngwalo ne xa' lazo' re wes.

Apolos ndej xki's Dios yez Éfeso

²⁴ Zyasa yez Éfeso mzin ti xa' judí ndole Apolos, xa' yez Alejandrí, Mbi' re' nchak toz ndyodi's xa' nde jwin toz nzolo xa' xki's Dios.

²⁵ Mtote'd men xa' lo xned Xa' Nyebe', nde nale toz nzo lazo' xa', ndyodi's xa' nde ndlo' xa' xki's Dios axata nak kwent chan' Jesús, te'nyega ben' jwan' nzolo xa' nak, jwan' ta mblo'le Juan men.

* **18:18 18:18** Nm. 6:18.

²⁶ Nde na'nzyebta Apolos tolo mdobte mdej xa' xki's Dios len' yo ten' ndyop re men Israel nde sen' mbin Priscil nde Aquil jwan' re', zya xa'ta mbe' xa' Apolos nde jwin mblo'xkan xa' xamodpa nak xki's Dios lo Apolos.

²⁷ Sen' nchola's Apolos ya xa' lo xyon Akaya, le' re wes mbla'sto xa' Apolos mke' xa' ti ye's mtel' xa' lo re wes nzi Akaya sa kaya' xa' Apolos. Sen' mzin Apolos lo xyon Akaya mbla'sto toz xa' re men, re men jwan' por yalwen chan' Dios sa mbli lazo' xa' Jesús.

²⁸ Nde nzi wi' reta men, gal' mni Apolos lo re xa' judí, mblo'xkan Apolos xki's Dios axata ngeniy, ke Jesús nak Xa' Mtel' Dios, nde na'nsalta nkab re xa' judí.

19

Ndej Pab xki's Dios yez Éfeso

¹ Laj ngete Apolos yez Corint, Pab ngolo mbri'd lo xyon men nzi yi' nde mzin xa' yez Éfeso, tya mzyal' xa' na'r men ndli lazon' xki's Dios,

² nde nchab Pab lo xa':

—¿Cho mkaya' go' Mbi Nayon sen' mbli lazo' go' Jesús?

Le' xa' mkab:

—Nekla nchon ná' cho nzo Mbi Nayon.

³ Zyasa nchab Pab lo xa':

—¿Xomodka mbro'le go' sa?

Le' xa' mkab:

—Xata mod jwan' mblo' Juan lo ná' mbro'le ná'.

⁴ Zya nchab Pab:

—Juan mbro'le re men jwan' mbere lo Dios, nde nchab Juan lo re men sa li lazo' men Xa' jwan' ndenke xis Juan, Xa' ya nak Jesús, Xa' mtel' Dios.*

⁵ Sen' mbin xa' jwan'na, mbro'le xa' lo le Jesús, Xa' Nyebe'.

⁶ Nde sen' mxob ya' Pab yek re xa', mbla Mbi Nayon yek re xa', nde mni xa' xa'la di's nde mdej xa' re jwan' tera' ak.

⁷ Reta xa' bi' jwan' nzi tya, mkata tibsenska xa'.

⁸ Nde na'nzyepta Pab nchote Pab len' yo ndyop men Israel, dipta len' son mbe', nda xa' di's nde nda' xa' kwent lo men sa yen men yalnyebe' chan' Dios.

⁹ Per nzo pla men ne yek na' na'ndlid lazo' xa'y, che'la nzi wi' re men mni xin xa' xis xned Dios, zyasa mbla' Pab re xa' ya nde xa'ta mbe' Pab re xa' jwan' ndli lazon' Jesús, ten' ndob yoskwel chan' ti xa' ndole Tiran, nde tya ncha Pab di's kon re xa'.

¹⁰ Tamod mbli xa' len' chop lin' sa reta men nzo lo xyon Asia, xa' judí nde xa' na'nakta judí, mbin xa' xki's Jesús Xa' Nyebe'.

¹¹ Nde mbli Dios re yalnaro toz kon ya' Pab,

¹² axta re bayek nde re lar jwan' ndin' lad Pab, nche' xa'y lo re men nayiz nde nchak men lo re yiz ndyak men nde re mbi narax ndryo'tey lazo' men.

¹³ Per pla xa' judí, xa' ngo'te mbi narax lazo' re men, nchola's xa' li rsin' xa' le Jesús Xa' Nyebe', sa kote xa' mbi narax, nde mbez xa' lo mbi narax:

—Lo le Jesús, Xa' ta ndej Pab, nyebe'n loa bro'te.

* **19:4 19:4** Mt. 3:11; Mr. 1:4,7-8; Lc. 3:4,16; Jn. 1:26-27.

14 Jwan'na ndli re gas xin' ti xa' judí ndole Esceba, xa' nyebe' lo re nglwey'.

15 Per mbi naraxa nkaba lo xa' nde nchaba:

—Nzolon Jesús nde mnen cho nak Pab, per go', ¿Cho nak go'?

16 Nde le' mbi' ta ndono mbi naraxa, mbo' mbi' xis re xa' ya, nde mbli mbi' gan mke' mbi'y cho re xa', per mbli xa' gan mxon' xa' len' yo nde tata che'y xa' nda xa' taja mbwiy' xa'.

17 Reta men nzo yez Éfeso, re xa' judí nde re xa' na'nakta judí sen' mbin xa' jwan' ngok, mzyeb toz xa', nde masra' mxo'byek xa' le Jesús Xa' Nyebe'.

18 Nde bro toz men jwan' mblila lazon' Jesús nche'd xa', nxobdol xa' nde ndej xa' reta jwan' narax ndli xa'.

19 Taga' bro toz re xa' ngok xa' mxí, mbyedno xa' re libr nte'd xa' nde nzi wi' re men mtol' xa'y. Lo mblo' xa' kwent plopa ntak reta libr ya, mbro'toy cho'pzi' mil tmi plat.

20 Tamod ndoxena nde ndlo'y yalne chan' xki's Xa' Nyebe'.

21 Sen' ngolo re jwan'na, mbli Pab xgab ya Pab yez Jerusalén, per nerla rid xa' lo xyon Macedon nde Akaya, nde noga nchab Pab: Sen' ngolo ngwan Jerusalem, nakin'ka yan yez Rom.

22 Zyasa mtel' Pab Timoteo kon Erast, chop xa' jwan' ndli kompay Pab sa ya xa' lo xyon Macedon, laja mbled Pab tud lo xyon Asia.

Ngok bxol re men yez Éfeso

23 Len' wiz ya, nakta lud mxyol re men yez Éfeso por kwent chan' xned Dios.

²⁴ Tak ti xa' ndole Demetr, xa' ntoxkwa' re jwan' plat, ntoxkwa' xa' re yodo' bix chan' dios ndole Artemis, nde tmi toz nzena' re xa' ta ndoxkwa' re jwan'na.

²⁵ Nde mthop Demetr re xa' nke sin', le'ga sin' ya, sa nchab Demetr lo xa':

—Reta go mbi', go' mne ben'ta lo sin' re' nzenan' tmin na'.

²⁶ Per ngwi'la go' nde nchonla go' jwan' ngeteli Pab, na'nakte ben'ta yez Éfeso noga mer dib lo xyon Asia, bro toz men ngetetokil' xa' nde mbez xa', ke na'nakta dios, re dios ta ntoxkwa' ya' men.

²⁷ Nde na'nakta be'nta lux re rsin' na', noga yodo' ro chan' dios Diana tluxa, tak reta men tolo ta'b xa' yalnaro chan' dios, dib Asia nde dib nax izyo.

²⁸ Sen' mbin reta xa' jwan'na, mxitin lazo' xa' nde ne mbrez xa', nchab xa':

—¡Naro nak Diana, dios lo re men yez Éfeso!

²⁹ Reta men yez ngok bxol xa', nde zyaga mxen xa' Gay kon Aristark, chop mbi' jwan' ndli compay Pab, mbi' lo xyon Macedon, mdo'bnyo xa' rop mbi' ya axta ten' nzidop reta ma yez.

³⁰ Nde nchola's Pab ndla Pab xija sa ni Pab lo re men, per re wes nzi tya na'nda'd xa' di's.

³¹ Noga pla xa' nak sin' lo xyon Asia, xa' jwan' nzal'ta Pab, mtel' xa' di's lo Pab sa na'yad Pab ten' nzidop reta men ya.

³² Tak thibned xa' mbez ti jwan' nde tedibned xa' mbez tedib jwan' anta mbwan re xa', nde masra' xa' ana'nye xa' kwan liy mdyop xa' tya.

³³ Le' pla xa' jwan' nak sin' lo men judí mblo' xa' Lejantr, nde mchep xa' Lejandr axta lo. Zyasa

mta'b ya' Lejandr lo reta men sa na'kwestra' men, tak nchola's Lejandr ni xa' lo mayez sa la xa' re men judí.

³⁴ Per sen' mne re men ke no Lejandr nak men judí, mer nye ti chopka hor mas ne mbrez xa', nchab xa':

—¡Naro nak Diana, dios lo re men yez Éfeso!

³⁵ Zyasa ti xa' nak sin' lo yolow, xa' jwan' nke' ye's, sen' mbli xa' gan mbrexe re men, zyasa nchab xa':

—Men yez Éfeso, ¿Cho na'nyeda ke yez Éfeso ngenap men yodo' chan' dios ro Diana, nde Júpter mbro' mnab chan' dios re'?

³⁶ Lo ta reta men mne jwan' re', na'ndabloda taja kwes go'. Xe bre go' nde jwin bli go' xgab ti jwan' sa li go'y.

³⁷ Tak re mbi' ta ndeno go' nche', namblid xa' narax lo yodo', neka ni xin xa' xis dios na'.

³⁸ Tez Demetr kon re men jwan' ngeno xa' sin', nkwan' xa' yalbyo kon xa'la men, jwan' naga ndli nzo xa' nak sin', nzo jwes, xa' ya wi' re jwan'na nde tya todi's kad thiba xa' nyen' xa nak chan' xa'.

³⁹ Nde tez nzo cho tedib jwan' nchola's go', ndablo tej go'y sen' ncho yaltodi's ro.

⁴⁰ Tak jwan' ta ngok naya nzo mod ke yalke yek na' nak na' men nkwan' byo, nde na'zyalta tan' kwent xomod ngok jwan' re'.

⁴¹ Nde sen' ngolo nchab xa' jwan' re', mcha'z xa' reta men.

20

Pab ngwa lo xyon Macedon nde Grecia

¹ Sen' lo mne taja ngok bxol reta men, zyasa mbrez Pab re xa' ta ndli lazon' Jesucrist nde sen' ngolo mtoni Pab xa', mde's Pab xa', nde nchab Pab lo xa' ke yo Pab ned, zyasa nda Pab lo xyon Macedon.

² Sen' ngolo mbri'd Pab dib lo izyo ya nde noga jwan' toz mtoni Pab re wes, zyara' mzin Pab lo xyon Grecia.

³ Sen' ngolo son mbe' nzo Pab Grecia, zya nak kwent tyen Pab bark nda Pab lo xyon Siria, per mbin Pab le' re xa' judí mbyan'di'sla xa' toti xa' Pab. Zyasa mbli Pab xgab tyen Pab ned lad lo xyon Macedon.

⁴ Nde na'r xa' mdonke xis Pab, ti xa' ndole Sópater xa' yez Berea, Aristarco nde ti xa' ndole Segund xa' yez Tesalónica, Gay, xa' yez Derbe nde Timoteo; le' Tíquico nde Trófimo nak xa' men lo xyon Asia.

⁵ Re xa' re' mzi'blo nde mbled xa' ná' yez Troas.

⁶ Le' ná', sen' ngolo mbrid wiz jwan' ncha men pan na'ngenta lebadur, zya ngwap ná' lo bark, mbro' ná' yez Filipos nde sen' ngoxo'b gay' wiz zyara' mkata ná' xa', ten' nak yez Troas ten' mbyan' ná' gaz wiz.

Lult gob ngwatna Pab re xa' yodo' Troas

⁷ Wiz ner xan' sman, zya mdyopbe reta ná' sa thita wa ná' pan, le' Pab mblo' xki's Dios tak tedib wiz yo Pab ned, nde mbro'nol' mdodi's Pab axta rol yal'.

⁸ Nde nzi toz re jwan' ntoxni len' yo xta' gap ten' nzi ná'.

⁹ Le' ti mbyo ndole Eutik, ndob or ro ventan nde tya mxen mkal' or, tak nol' toz mdodi's Pab, zyasa thiptane mxen mkal' yek or nde ngob or, mbro'r axta yo son xta' gap nde ngob or axta izyo, tya ngwaliche xa' or nguj or.

¹⁰ Zyasa naban toz mbla Pab mzin Pab ten' nax or, mde's Pab or nde nchab Pab:

—Na'zyepta go', naban mbyo.

¹¹ Zyaga bere ngwap xa' gap tedib gob, mblirol xa' pan mda re ná' nde tatka mdodi's pab xki's Dios axta mduxni, nde tya ngo Pab ned ndya Pab.

¹² Le' mbyo ta ngoba, naban or ndyano xa' or, nde jwan'na ndli nale toz nzo lazo' reta xa'.

Mbro' Pab yez Troas nda xa' yez Mileto

¹³ Le' ná' mzi'blo ngwap ná' bark nda ná' yez Asón sa tya yaxi' ná' Pab, tak Pab mbro' lazo' xa' nda ni xa'.

¹⁴ Sen' mkata ná' xa' yez Asón, mbe' ná' xa' lo bark nde nda ná' yez Mitilene.

¹⁵ Tya ngwap ná' bark nde tedib wiz mbri'd ná' ngo' lo izyo ndole Quío jwan' nax len' nitto' nde tedib wiz mzin ná' ro yez nax ro nit ndole Samos, tya zyara' mbri'd ná' yez Trogilio nde axta tedib wiz sa mzin ná' yez Mileto.

¹⁶ Tak xgab Pab nak, na'rita xa' yez Éfeso, sa na'lyen'tozta xa' Asia, tak ngen lazo' xa' sin xa' yez Jerusalén, tezka tli xa' gan tya rid xa' wiz ni ndole Pentecostés.

Lult di's jwan' mni Pab lo re wes Éfeso lad yez Mileto

¹⁷ Lo ndo Pab yez Mileto zya mbrez Pab re xa' nak sin' lo yodo' yez Éfeso.

18 Sen' mzin re xa' lo Pab, zya nchab Pab lo xa':
—Go' mne, xamod mkete'n xij go' dib tyemp,
xata wiz jwan' mzin ner na Asia.

19 Lo dibta sen' ngon xij go' mblin sin' lo Xa'
nyebe' kon dib nado' nzo lazo'n nde taja nge nit
win' lon, nchon' na lo ta ne mbri'd na re yalti
jwan' nchola's re xa' judí li no xa' na.

20 Per na'ndlat na ndej na lo go' re jwan' li wen
lo go', mblo' nay lo go' xij reta men nde mketelo'
nay liz go'.

21 Nde taga' mblo' nay lo re xa' judí nde lo re
xa' na'nakta judí sa la' xa' re jwan' narax nak xa'
nde bere xa' lo Dios sa lipa lazo' xa' Jesucrist Xa'
Nyebe'.

22 Nde naya Mbi Nayon nyebe' lon, ndan
Jerusalén nde na'nyet na kwan yote'n tya.

23 Ben'ta jwan' mnen nak, reta yez ten' ngete'n,
Mbi Nayon ndej lon ke'lizyi'b xa' na nde ri'd na
bro toz yalti.

24 Per na'ndlit na xgab nek thib jwan'na, nekla
nke' lazo'n yalnaban chan' na, che'la ncholas na
nale yolo rsin na,* sin' jwan' mdaya' Jesús Xa'
Nyebe' lon, sa todi's na di's wen chan' Jesucrist
jwan' nak yalwen chan' Dios.

25 'Nde mnepa na, nek thib go' nde nek thib xa'
jwan' mketetej na yalnyebe' chan' Dios, na'wi'tra'
go' na.

26 Jwan' nasa, nawiz re' nin lo reta go', ngenta
cho yalke nchap na por kwent chan' go'.

27 Tak reta jwan' nchola's Dios mdejla nay lo go',
na'mkasta nay.

* 20:24 20:24 2 Ti. 4:7.

28 Jwan' nasa pkenap lazo' go' nde pkenap go' yez Dios, tak Mbi Nayon mdoḅ go' sa nak go' xa' kenapa, ta xa ngenap xa' mbak xil'la, ta pkenap go' yodon' Xa' Nyebe' jwan' mxi' Xa' kon ren Xa'.

29 Tak mnen, sen' na'ngenta na, zya ye'd xa'ga men xij go', xaja lob lusle ta ndlya xij mbak xil'la, ta tolu'x xa' go'.

30 Nde le'ga xij go' ryo' xa' lo' jwan' kwin' nde tokil' xa' re men ndli lazon' Jesús sa tyonke men xis xa'.

31 Jwan' nasa, bresa' go' nde ptela's go' tak son lin', yal' nde ndlyabe na'mzanta na mtonin kad thiba go' axta win' mka'ba lon.

32 'Le' naya, wes na nde ptan na, lo ya' Dios tan na go', nde xki's Xa' jwan' nak yalwen, ngenoy yalne sa xyen go' lo Dios, nde taya' Xa' lo go' jwan' ta mke'yek Dios lo re na' ta nak yez nayon chan' Xa'.

33 Na'ndyabla'sta na jwan' plat, neka jwan' or, nde nekla thi xab men.

34 Go' mne, che'la le'ga ya'n nkwan na reta jwan' nakin' na nde jwan' nakin' re xa' ngete'non.

35 Reta jwan' re' mblo'n lo go', nakin' li men sin' sa la'sto men re xa' nalát ndyak. Ptela's go' di's nchab Jesús: "Nabe'z toz nda men jwan' nda'y, ke men kaya'y."

36 Sen' ngolo ta nchab Pab, mdoxub Pab nde thita mdo'disno re xa' Dios.

37 Ngolo jwan'na xaja kwana nchon' reta xa', mde's xa' Pab nde mda' xa' chut lo Pab,

38 nabil toz ngo lazo' re xa' por di's jwan' nchab Pab, ke yaja na'wi'tra xa' Pab. Nde ngwa toned xa' Pab lo bark.

21

Pab nda yez Jerusalén

¹ Sen' ngo ná' ned, ngwap ná' bark ndagal' ná' izyo ndole Cos jwan' nax len' nitto' nde tedib wiz ngwa ná' izyo ndole Rodas jwan' nax len' nitto' nde tya mbro' ná' nda ná' yez Pátara.

² Tya ngosi'b ná' ti bark jwan' nda lo xyon Fenicia nde lo bark ya ngwap ná' nda ná'.

³ Sen' mbwi' ná' lo xyon Chipre jwan' nzi xtow' nit, mbyan'key lad beg ná', tak le' ná' nda lo xyon Siria, nde le' bark ndenoy yo' jwan' yan' yez Tiro, tamod sa mzin ná' tya.

⁴ Nde tya mzyal' ná' re xa' jwan' ndli lazon' Jesús, tyaja mbled ná' gaz wiz. Le' Mbi Nayon mni lo re wes nzi tya sa mdej xa' lo Pab sa na'yad Pab yez Jerusalén.

⁵ Sen' ngoxo'b gaz wiz ngo ná' ned tya, le' reta wes kon re men got xa', nde xin' xa', ngwatoned xa' ná' mzin ná' ro nitto', tya mdoxub re ná' nde mdodi'sno ná' Dios.

⁶ Ngolo jwan'na, mde's ná' ta ná' zyara' ngwap ná' lo bark nde le' re wes ndya xa' liz xa'.

⁷ Sen' ngolo mbri'd ná' lo nitto', mbro' ná' yez Tiro nde mzin ná' yez Tolemaida tya mdodi'sno ná' re wes nde thipta wiz mbled ná' lo xa'.

⁸ Lo tedib wiz, mbro' Pab tya kon re ná' jwan' nzino xa', ngwa ná' yez Cesarea, tya mzin ná' liz Blib* xa' jwan' ndej xki's Dios lo men, xa' ya nak ti xa' nzo xij re gaz xa' ta mbli xa', xa' la'sto re apóst nde liz xa' ya mbled ná'.

* 21:8 21:8 He. 6:5; 8:5.

⁹ Xa' ya ngeno thap xin' got xa', mza' yen' nde Dios ni lo re mza' ya sa ndej mza' xki's Dios lo men.

¹⁰ Sen' ndatela pla wiz nzi ná' tya, zyasa mzin ti xa' nak profet mbro' lo xyon Judea xa' ndole Agabo.[†]

¹¹ Xa' re' mbye'd ten' nzi ná', mxen xa' sint jwan' nachal len' Pab, mtobo' xa' ni xa' nde ya' xa', nchab xa':

— Che' mod ne Mbi Nayon, yez Jerusalén, che' go xa' mbi' ta nak chan' sint re' nde taya' xa' xa' lo ya' re men na'nakta judí.

¹² Sen' mbin ná' jwan' re' nde kon re wes ta nzi tya mna'b ná' lo Pab sa na'yad Pab yez Jerusalén.

¹³ Le' Pab mkab lo ná', ne xa':

¿Cho kwan liy sa nchon' go' nde ngonabil go' lazo'n? Tak ndosa'la na, nde na'nakte ben'ta go xa' na, noga axta kuj xa' na yez Jerusalén por Jesús Xa' Nyebe'.

¹⁴ Lo ta na'ndlid ná' gan ngo ná' yek Pab, yaja nchab ná':

—Gaka xa nchola's Xa' Nyebe'!

¹⁵ Ngolo jwan'na, mdoxkwa' ná' re chan' ná', nda ná' yez Jerusalén.

¹⁶ Nde mdonke pla wes yez Cesarea xis ná' nde mbe' xa' ná' liz ti mbi' ndole Mnasón, xa' lo xyon Chipre, xa' jwan' ndala ndli lazo' xa' Jesús nde liz xa' ya mbled ná'.

Mxen xa' Pab len' yodo'

¹⁷ Sen' mzin ná' yez Jerusalén, nale toz nzo lazo' re wes mkaya' xa' ná'.

[†] **21:10 21:10** He. 11:28.

¹⁸ Tedib wiz, re ná' Pab ngwatna ná' Jakob nde tya nzi re xa' nak sin' lo yodo'.

¹⁹ Sen' ngolo mni Pab dyux lo re wes, zya tolo mdej Pab kad thiba re jwan' mbli Dios lo re xa' na'nakta judí por sin' jwan' mketeli Pab.

²⁰ Sen' mbin re xa' jwan'na, mbli naro xa' Dios. Zyasa nchab xa' lo Pab:

—Wes, lu mne, xij reta xa' judí na'r mil xa' mbli lazo' xa' Jesús, nde reta xa' ya mbez toz xa' ke nakin' xo'byek men ley chan' Moisés.

²¹ Nde nchab xa' ke ndlo'a lo re men judí, re xa' ta ngete tij sa na'xobyekta xa' ley, nekla ke' xa' be' lad xin' bí' xa' nde nekla li xa' re mod gox jwan' nzino men.

²² ¿Le' naya cho kwan lin'? Tak lo nye re men ke mzin la nche', zyaga dyop xa'.

²³ Jwan' nasa mas wen bli jwan' re': Nzo tap xa' bi xij na' re', xa' jwan' ndablo li jwan' mke'yek xa' lo Dios.

²⁴ Be' xa', sa thipta wayak nambi re go' nde lu kix sa cho' yisyek xa'.[‡] Sa nye re men ke yalkwin' re jwan' ni xa' xis la, che'la no lu naxut ngetea, nxobyek la ley.

²⁵ Le' re xa' na'nakta judí, xa' jwan' ndli lazon' Jesús, mtel'la ná' ye's lo xa', jwan' nchab, nandabloda kenap xa' lo reta jwan' re', ben'ta jwan' ndablo li xa' nak, na'wad xa' re bel' jwan' ngo lo mnab, nek ren, nek ma' nchaj we nde na'lid xa' re lo yalbew.§

²⁶ Zyasa mbe' Pab re mbi' ya, nde tedib wiz ngwayak nambi re xa', zyara' ngwa xa' yodo' sa

[‡] **21:24 21:24** Nm. 6:13-20. **§ 21:25 21:25** He. 15:29. fornicación

tej xa' nyen' cho wiz yoxo'b be' yolo ak nambi xa',
sa kad tiba xa' taya' xa' jwan' yon lo Dios.

²⁷ Sen' ndoyoxo'bla gaz wiz, pla xa' judí, xa' lo
xyon Asia, sen' mbwi' xa' Pab ndo Pab yodo' zya
tolo mtoxol xa' reta men nde mxen xa' Pab,

²⁸ nde ne mbrez xa', nchab xa':

—¡Reta go' men Israel karelka de' go'! Mbi' re'
jwan' ta ngete reta lad, ngete tej xa' lo re men ke
narax nzin' las na', narax nak ley chan' Moisés
nde narax nzin' yodon' na, ndeno xa' re men
na'nakta judí yodo' re', ngeli bew xa' ten' Nayon
re'.

²⁹ Ta nchab xa', tak mbwi'la xa' Pab len' yez
Jerusalén kon Trófimo,* xa' yez Éfeso nde mbli xa'
xgab noga yodo' ngwano Pab xa'.

³⁰ Zyasa reta mayez ngok bxol nde mdyop xa'
mxen xa' Pab, ndo'bnyo xa' Pab nde mblo'te xa'
Pab ten' ndob yodo' nde mtow' xa' ro yodo'.

³¹ Nchola's xa' kuj xa' Pab, per zyaga mbin mbol
jwan' nyebe' lo ti mil sondad, ke reta men yez
Jerusalén nzi yakbxol xa'.

³² Zyaga mthop mbol reta sondad nde re xa'
nyebe'ga lo sondad sa nda xa' ten' nzi yakbxol
reta men. Sen' mbwi' re men mzin mbol kon reta
sondad mbol, zya mbla' xa' na'ngintra' xa' Pab.

³³ Nde sen' mzin mbol, mnabe' mbol lo sondad
sa mxen xa' Pab nde mbo xa' Pab kon chop kaden;
zyara' mnabdi's mbol cho ta ngeyin xa' ya nde cho
kwan mbli xa'.

³⁴ Per xij reta mena, cho xa' mbez ti jwan' nde
cho xa' mbez tedib jwan', ya na'yenta mbol nyebe'

* **21:29 21:29** He. 20:4.

jwan' mbez re men, yaja mnabe' mbol sa we sondad Pab ten' nzi sondad.

³⁵ Sen' ndozin re xa' lo skaler ten' nzi re sondad, tyaja mxo'b yen re sondad Pab, tak jwan' toz naxol nchak reta men nchola's xa' kuj xa' Pab,

³⁶ taja mbez reta men ndenke xa' xisa nchab xa':

—¡Bij go' xa'!

Mkab Pab lo mayez

(He. 9:1-19; 26:12-18)

³⁷ Sen' ndoyoteno re sondad Pab len' ten' nzi sondad, zya nchab Pab lo mbol nyebe':

—¿Cho toyal tadi's na lud lo go'?

Le' mbol nyebe' mkab:

—¿Cho nchak nia di's gryeg?

³⁸ ¿Cho na'nakta lu xa' Egipto, xa' ta mdobte yalbyo pola nde lad izyo bis mxon'no xa' thap mil mbi' jwan' nchuj men?

³⁹ Zyasa nchab Pab lo xa':

—Na nak merpa' ti mbi' judí, las na nak yez Tarso, lo xyon Cilicia ti yez ro, jwan' nasa nya'b na loa, ta'a di's tadi's na lo re mayez.

⁴⁰ Nde sen' mda' mbol nyebe' di's lo Pab, zya mdoli Pab lo skaler nde mta'b ya' Pab lo re mayez. Sen' xe mbre reta mayez, Pab mni di's hebreo nde nchab Pab:

22

¹ —Reta go' wes na nde xud na, ptonza go' sa kab na lo go' lo jwan' ta ndlino go' na.

² Sen' lo mbin re men ke di's hebreo mni Pab lo xa', zya masra' mbre xe re xa'. Nde nchab Pab lo xa':

³ —Merpa' men judí nak na' nde yez Tarso ngol na, yez jwan' nax lo xyon Cilicia, per yez Jerusalén re' mxyen na nde Gamaliel* ngok xud te'd na, jwin' toz mblo' xa' lon jwan' xa nakpa ley chan' re xa' gox lon' xa' mbre pola. Thibla' nchal na nxobyek na Dios dib nzo lazo'n, ta xa ndliga re go' ba naya.

⁴ Pola mchublan re men nzo lo Xned Jesucrist axta mbij na xa', mbi' nde ngol mxen na xa' nde mdayan xa' sa ya xa' lizyi'b.

⁵ Mbol ngwley' ro nde re xa' nak sin' lo men judí mne xa' jwan' re', tak xa' mda' ye's lon sen' nakla di's yan yez Damásko yaxen na re men nzo tya, re men jwan' ndli lazon' Jesucrist nde ye'dnon xa' yez Jerusalén re' sa kin men xa'.†

*Pab ndej xamod mbli lazo' Pab Jesús
(He. 9:1-19; 26:12-18)*

⁶ Jwan' re' ngotey laja ndon ned, ndozinla gax yez Damasco awizta ba xajta mbro' ti xni toz lo be' mblay dib ten' ndon.

⁷ Nde ngob na izyo, na mbin na mni ti Xa' lon, ne Xa': "Saulo, Saulo, ¿Cho kwan liy ngete chublaa na?"

⁸ Zyasa mnabdi's na lo Xa': "Cho go'?" Le' Xa' mkab lon ne Xa': "Na nak Jesús Xa' Nazaret, na ta ngete chublaa ba."

⁹ Nde re xa' jwan' ndanon mbwi'pa xa' xni nde mzyeb xa' per na'ngonta xa' xki's Xa' ta mni lon ya.

¹⁰ Nde mnabdi's na lo Xa': "¿Kwan ndablo lin Xa' Nyebe'?" Le' Xa' Nyebe' ne lon: "Ptolí nde waga

* 22:3 22:3 He. 5:34-39. † 22:5 22:5 He. 8:3; 26:9-11.

yez Damasco, sa tya nye xa' loa reta jwan' ndablo lia."

¹¹ Le' na thiptane mkow ngud lon por xni jwan' ta mblaya, yaja' re xa' jwan' ndanon mxen xa' ya'n sa mzin na yez Damasco.

¹² 'Tya nzo ti mbi' ndole Ananías, ti mbi' gal' nde nxobyek toz xa' ley nde reta men judí nzo yez Damasco wen ni xa' xis mbi' ya.

¹³ Mbi' ya mbye'd lon, mbike xa' gax nde ne xa': "Wes Saulo, yoni ngud loa naya." Nde zyaga ngoni ngud lon nde mbwi'n xa'.

¹⁴ Nde ne xa' lon: "Dios ta ndli lazo' re xa' gox lon' mbre pola, Dios ya mblí lu naya sa yoloa jwan' nchola's Xa' nde wi'a Xa' gal' sa gon la di's ro Xa'.

¹⁵ Tak lu ak mbi' tej xki's Xa' lo reta men, re jwan' mbwi'a nde mbin la.

¹⁶ Nde naya, ¿Cho kwan ngembed la? Ptoza' nde bro'le, nde ptombi lazo'a lo re xken la, mna'ba lo le Xa'."

Pab ndej ke mtel' Xa' Pab lo re men na'nakta judí

¹⁷ 'Nde jwan' ngotey, sen' mberen yez Jerusalén, laj ndotodi'snon Dios yodo', zya xaja men mzal' lazon'ba mbye'd ti jwan lon.

¹⁸ Nde mbwi'n Jesús, ne Xa' lon: "Pkenka cha bro'te yez Jerusalén, tak re men nzi nche', na'tonzad xa' xki's na jwan' tej la."

¹⁹ Zyasa mkab na lo Xa' nchab na: "Xa' Nyebe', reta men mne mkete'n reta ten' nzi re yo jwan' ndyop re men judí, nde mben xa' mke xa' lizyi'b nde mdin na re xa' ndli lazon' lu.

20 Nde sen' lo mbij men Xteb, xa' jwan' nda' kwent chan' la, non mdo tya nde ndyen na sen' nguj Xteb, nde na mkenap xab re xa' jwan' mbij Xteb.”[‡]

21 Le' Jesús ne lon: “Waa, tak tij tel na lu, lo re xa' na'nakta judí.”

Pab nzo lo ya' mbol jwan' nyebe' lo sondad

22 Nde axta tyaja mbin xa' xki's Pab, tolo ne mbrez reta xa', nchab xa':

—Bij go' mbi' ba, na'nsal'ta xa' ban xa'.

23 Nde axa mbez re men, taja mblobi xa' re lar nzob xis xa' nde ngobi xa' yothi',

24 Le' mbol nyebe', mnabe' xa' lo sondad sa mbe' xa' Pab ten' nzi re sondad nde mnabe' mbol mdin xa' Pab sa ko'ro Pab nyen' kwa'n liy sa taja mbez re men xis Pab.

25 Sen' lo mdobola xa' Pab, zyasa nchab Pab lo ti xa' jwan' nyebe'ga lo re sondad ndo tya:

—¿Cho toyal kin go' ti xa' Rom, te'nye tera' zyal go' cho yalke nchap xa'?

26 Sen' mbin xa' nyebe' jwan'na, zya ngwatne xa'y lo mbol nyebe' ro, nchab xa':

—¿Cho kwan li go'? Tak xa' Rom nak mbi' re'.

27 Zyasa ngwa mbol nyebe' lo Pab nde nchab mbol:

—¿Cho lí men Rom nak la?

Le' Pab mkab:

—Liy.

28 Le' mbol nyebe' nchab:

—Na re', nap toz mbro'toy lon sa ngok na men Rom.

Pab nchab:

[‡] 22:20 22:20 He. 7:58.

—Le' na, ax ngol no nay.

²⁹ Yaja re sondad ta nakwent kin Paba, sen' mbin xa' jwan'na, tij mbike xa' lo Pab nde no mbol nyebe', sen' mne mbol men Rom nak Pab, mzyeb mbol tak mdoxo xa' Pab.

Mbe' xa' Pab ten' nzidop re men nak sin'

³⁰ Nde tedib wiz le' mbol nyebe' nchola's nye xomodpa nak yalke' nke' re xa' judí yek Pab, zyasa mnabe' mbol mxak xa' kaden jwan' nago Pab nde mnabe' mbol mdyop re ngwley' ro nde reta xa' nak sin'. Zyasa ngwaxi' xa' Pab nde mblo'to xa' Pab lo re xa' nzi tya.

23

¹ Zyasa xe mbwi' Pab lo re xa' nak sin' nde nchab Pab:

—Wes na, axta nawiz re' tatka kon xgab nambi ndon lo Dios.

² Le' Ananías mbol ngwley' ro, mnabe' lo re xa' nzi gax tya sa mdis xa'y ro Pab.

³ Zyasa nchab Pab:

—¡Dios ke'y choa, xa' kwin'!* Ndob la sa nya'b la kwent lon xa ngeni ley nde le'ga lu mdi's la ley tak mnabe'a mdis xa'y ron.

⁴ Le' re xa' nzi tya nchab lo Pab:

—¿Cho kwan liy nixin la lo mbol ngwley' ro xa' ndli sin' lo Dios?

⁵ Le' Pab mkab:

—Wesa, na'nyet na cho ngwley' ro nak xa'; tak lo xki's Dios nchab:

—Na'nixinta lu xis mdan lo yez la†.

* **23:3 23:3** Mt. 23:27-28; Lc. 11:44. † **23:5 23:5** Ex. 22:28

⁶ Sen' mne Pab ke rol xa' nzi tya nak saduceo nde rol xa' nak fariseo, ne mni Pab lo re xa', nchab Pab:

—Wesa, na nak fariseo‡ xin' ti xa' fariseo, nde mbezke go' lon tak ndli lazo'n ryo'xban re men nguj.

⁷ Sen' ta nchab Pab, le' re xa' fariseo nde re xa' saduceo tolo ngwa xa' kwent nde ngok rol xa'.

⁸ Tak re xa' saduceo mbez na'ryo'xbanta re men nguj§ nekla na'ngenta re anj nde neka re xbi, mbay re xa' fariseo ndli lazo' xa' reta jwan'na.

⁹ Nde anta che'pa mbez reta xa', zya mdoli pla xa' fariseo xa' nak maestr ndlo' ley xki's Dios, nchab xa':

—Nek thib yalke na'ngasalta ná' ndli mbi' re', tak tez nzo cho xbi o anj mni lo xa', na'ke'd na' yalbyo kon Dios.

¹⁰ Nde jwan' toz nzi yakbxol re xa', zyasa le' mbol nyebe' lo re sondad mzyeb xa' yoloa naxguj xa' Pab, zya mnabe' xa' mbye'd pla sondad sa mblote xa' Pab xija nde mbe' xa' Pab ten' nzi re sondad.

¹¹ Lo tedib yal', mbro'to Xa' Nyebe' lo Pab nde nchab Xa':

—Blo ne lazo'a Pab, ta xa mdej la xki's na yez Jerusalén, taga' naki'n tej lay yez Rom.

Mbyan'di's re xa' kuj xa' Pab

¹² Sen' mduxni tedib wiz zya mdyop pla xa' judí, thita ngok di's xa' mxo'b xa' de xis xa' mda' xa' xki's xa' na'wat xa' neka gu xa' nit axta kebe' li xa' gan gaj Pab.

‡ 23:6 23:6 He. 26:5; Fil. 3:5. § 23:8 23:8 Mt. 22:23; Mr. 12:18; Lc. 20:27.

¹³ Masra' ti cho' xa' mke'yek jwan'na,

¹⁴ re xa' re' ngwa lo re ngwley' jwan' nyebe' nde lo re xa' nak sin' lo men judí, nchab xa':

—Reta ná' mxo'b de ná' xis ná' mda' ná' xki's ná', ngenta kwan wa ná', axta kebe' li ná' gan gaj Pab.

¹⁵ Le' naya, re go' kon re xa' nak sin', mna'b go' lo mbol nyebe' lo sondad sa ye'dno xa' Pab lo go' ye', ben'ta guz go' lo xa', ná' nchola's jwin nye ná' xomodpa nak kwent chan' Pab, nde le' re ná' nzisa'a ná' ned sa kuj ná' Pab.

¹⁶ Le' mbyo xin' ptan' Pab, mbin mbyo ta ndyodi's xa' yogo'd xa' ned, zya ngwa mbyo ten' nzi re sondad nde nchab mbyoy lo Pab.

¹⁷ Le' Pab mbrez ti xa' nyebe' lo sondad, nde nchab Pab lo xa':

—Be' mbyo re' lo mbol jwan' nyebe' lo re sondad, tak nakin' toz tej mbyo ti jwan' lo xa'.

¹⁸ Zyasa ngwano xa' mbyo lo mbol nyebe' nde nchab xa':

—Pab xa' ta nge lizyi'b, mbrez xa' na nde mna'b xa' lon sa ndenon mbyo re', tak ngeno mbyo ti jwan' tej mbyo loa.

¹⁹ Le' mbol nyebe' mxen xa' ya' mbyo, mbe' xa' mbyo tedib lad nde tya mnabdi's xa' lo mbyo, nchab xa':

—¿Cho kwan nchola's la tej la lon?

²⁰ Le' mbyo nchab:

—Re xa' judí thita ngok di's xa' sa ye'dna'b xa' lo go', ke ye' we go' Pab lo re xa' nak sin', xajka men jwan' jwin nchola's nye xomod nak yalke chan' Pab.

²¹ Per na'lid lazo' go'y, tak masra' cho' xa' nzisa'la tow' ned, nde mxo'b xa' de xis xa' mda'

xa' xki's xa' na'wad xa' neka gu xa' nit, axta kebe' kuj xa' Pab. Nde naya nzisa'a xa' ben'ta ngembed xa' nyen' kwan gab go'.

²² Zyasa mbloned mbol mbyo ndyar nde mnabe' mbol lor sa ngenta cho lo gab or jwan' ngwatner lo mbol.

Mtel' xa' Pab lo Félix xa' nyebe' ro

²³ Le' mbol nyebe' lo re sondad, mbrez xa' chop sondad xa' jwan' nyebe'ga', sa nyabe' xa', kwesa' chop ayo' sondad tye ni, songal nzo si' sondad tyob way nde chop ayo' sondad we yi'b nalé xin'*, sa ya xa' yez Cesarea hor ye' yal'la,

²⁴ nde mnabe' xa' ngoxab ti way tyob Pab sa naxuta we xa' Pab lo Félix, xa' nyebe' ro.

²⁵ Nde mke' xa' ti ye's jwan' nchab:

²⁶ “Na, Claudio Lisias, ngeke'n ye's re' loa Félix, xa' nyebe' ro, dyux nin loa.

²⁷ Re xa' judí mxen xa' mbi' re' nde nchola's xa' kuj xa' xa', per sen' mbin na xa' Rom nak xa', zya ngwatola'n xa' kon re sondad na.

²⁸ Nde ncholas na nyen cho yalke nchap xa' sa mben xa' lo re xa' nak sin' lo men judí.

²⁹ Nde ngosi'b na, le' yalke jwan' nke' re men yek xa' nak, le'ga kwent chan' ley jwan' nzino xa'y nde na'nakte yalke jwan' nzal' gaj xa', o ya xa' lizyi'b.

³⁰ Per mbin na, le' re xa' judí ngok di's xa' kuj xa' mbi' re', jwan' nasa zyaga mtel na xa' loa nde gab na lo re men jwan' nke' yalke yek xa', sa loa yatej xa' nyen' kwan nak yalke. Ba ndesal' na'.”

* **23:23 23:23** Lanza

³¹ Zyasa reta sondad mbli xa'y axa mnabe' xa' nyebe'y lo xa', yal' mbe' xa' Pab nda xa' yez Antípatris.

³² Nde tedib wiz le' re sondad ta nda ni ya mbere xa' ten' nziga xa' nde le' re sondad ta ndob way ndanoga xa' Pab.

³³ Sen' mzin xa' yez Cesarea, mda'ya' xa' ye's lo Félix xa' nyebe' ro nde taga' mda'ya' xa' Pab.

³⁴ Sen' ngolo mblab Félix ye's, mnabdi's xa' cho yez nde Pab, sen' lo mne xa' le' Pab nak men Cilisia,

³⁵ nchab xa' lo Pab:

—Sen' ye'd re xa' jwan' nke' yalke yek la zyasa tej la lon xomod nak kwent chan' la.

Zyasa mnabe' xa' jwin kenap xa' Pab ten' ndob yolow chan' Herodes.

24

Pab ndla lazon' lo Félix

¹ Sen' ngoxo'bla gay' wiz, Ananías mbol ngwley' ro, kon pla xa' nak sin' lo men judí nde kon ti xa' nchak ley ndole Tértulo. Re xa' re' mzin lo Félix xa' nyebe' ro, sa ke' xa' yalke yek Pab.

² Sen' mbro'to Pab, le' Tértulo mdobte mke' xa' yalke yek Pab, nde nchab xa':

—Lu Felix, xa' ntak toz, tak lu ndli sa nabe'z nzi ná' nde na'r toz jwan' nawe ndoyaka lo yez por yalnchak chan' la.

³ Lu xa' ntak toz Felix, reta jwan' re' oneja plo ngete ná' thibla' nkaya' ná'y jwan' nasa nda' ná' dyux loa.

⁴ Par na'kibta ná' bro tyemp loa, nya'b na gon la lud xki's ná' ta nagu'sla's nak la.

⁵ Mne ná' mbi' re' nak xaja bzin, tak reta ten' ngete xa' napta byo nkwan' xa' xij re men judí, nde xa' nyebe' lo jwan' kwin' ta mbez ndli lazon' Jesús Xa' Nazaret.

⁶ Nde noga nchola's xa' li bew xa' ten' nak yodo' nayon; jwan' nasa mxen ná' xa', nde ncholas ná' nya'b ná' kwent lo xa' jwan' xa ngeni ley chan' ná'.

⁷ Per xija mbala mbol Lisia xa' nyebe' lo re soldad, kon gob mkib xa' Pab lo ya' ná',

⁸ nde mnabe' xa', ke re men jwan' ngeno yalke xis mbi' re' ye'd tej xa'y loa. Le'ga lu mna'b kwent lo xa' sa nyea ke liga nak xa' re jwan' ta ndej ná' loa re'.

⁹ Nde reta xa' judí jwan' nzi tya, nchab xa': Liy, ta naka.

¹⁰ Zyasa Félix xa' nyebe' ro, mta'b xa' ya' xa' lo Pab sa kab Pab nde nchab Pab:

—Mnen ndalin' la nak la xa' nyebe' lo xyon re', jwan' nasa dib nzo lazo'n kab na lo yalke jwan' nke' xa' yek na.

¹¹ Le'ga lu toyal koxyoa cho li jwan' re', tak naya tera' yoxo'b tib senka wiz sen' ngwa li naron Dios yez Jerusalén,

¹² na'ngosibta xa' na ndoyan di's kon nek tib men, nekla ngete tobxol na re men, xa nak yodo', nekla re len' yo ten' ndyop re men judí o nekla dib len' yez.

¹³ Re men re', ngenta kwan tob ro xa' sa tej xa' loa ke li re yalke jwan' nke' xa' yek na.

¹⁴ Per jwan' go'ron loa nak, na ndli sin' lo Dios ta ndli lazo' re xa' gox lon ngo pola jwan' xa nak Ned Kub ta ni xa' yalkwin'na, tak ndli lazo'n re jwan' ngeni ley, nde ndli lazo'n jwan' mke' re profet.

15 Nde jwan' ngembed na lo Dios, jwan' naga ngembed re xa' ba, le' Dios ko'xban reta xa' nguj, xa' mbli jwan' gal' nde re xa' mbli jwan' na'gal'ta.

16 Jwan' nasa thibla' nchal na tyonon ti xgab nambi lo Dios nde lo re men.

17 'Ngoxo'bla pla lin' ta mkete'n xa'la re yez sa mberen ten' nak las na, ndanon ti gon lo re men nalat ndyak nde ndanon jwan' yon lo Dios.

18 Jwan'na ndolin yodo', lo mzin pla xa' judí mbro' Asia, mne xa' le'n ngeli jwan' nyebe' ley chan' Moisés sa ak nambin lo Dios, na'nakta na nzino bro toz men nekla ngetobxol na men.*

19 Re xa' ya ndablo ndro'to loa re', sa ndej xa' nyen' kwan liy sa mxen xa' na, tezka ngeno xa' cho yalke xis na.

20 O le'ga re xa' ta nzi nche', tej xa' nyen' kwan jwan' narax mbwi' xa' mblin lo ta mbro'tono xa' na lo men nak sin',

21 o nzo plo, lo ta ne mbrez na xij re men, nchab na: “cho nke' go' yalke yek na tak ndli lazo'n ryo'xban re men nguja.”†

22 Sen' mbin Félix jwan' re', mto xa' tedib be', tak mne wen la xa' xomod nak xned Jesucrist, zyasa nchab Félix lo xa':

—Sen' ye'd Lisias mbol nyebe' lo soldad, zyasa wi'n xomodpa' nak chan' go' re'.

23 Zyasa mnabe' Félix lo xa' nyebe' lo re soldad sa ke' lizyi'b xa' Pab nde na'nkad xa' di's lo re men nzal'ta Pab, tez nzo cho nchola's la'sto xa' Pab o yatna xa' Pab, toyal li xa'y.

* 24:18 24:18 He. 21:17-28. † 24:21 24:21 He 23:6

²⁴ Mbridnda'b pla wiz, mbye'dno Félix ngol xa' Drusil ti ngol nak judí. Zya mnabe' Félix ngwayo' Pab, sa gon xa' nyen' xomod nak li lazo' men Jesucrist.

²⁵ Per sen' mdej Pab nakin' gal' ban men, ndablo le'ga men kwek lazo' men, nde tzin ti wiz taya' men kwent lo Dios, zyasa mzyeb Félix nde nchab xa' lo Pab:

—Bya naya, tedib wiz sen' yena lon zyasa bez na lu.

²⁶ Noga nchola's Félix ko Pab tmi ya' Félix sa la' Félix Pab; jwan' nasa na'r gob mbrez xa' Pab nde mdodi'sno xa' Pab.

²⁷ Sen' ngoxo'b chop lin', mdaya' Félix sin' lo tedib xa' kub ndole Porcio Festo. Nde nchola's Félix wen yan' xa' lo re men judí, yaja tata mtan' xa' Pab lizyi'b.

25

Ndo Pab lo Festo

¹ Sen' ngok son wiz mblatob Festo, zya mbro' xa' Cesarea ndya xa' yez Jerusalén.

² Tya sa, re xa' nak ngwley' lnyebe' kon re xa' nak sin' lo men judí, mbike xa' lo Festo sa mke' xa' yalke yek Pab.

³ Kon di's wen mna'b xa' lo Festo, sa nyebe' Festo ye'd Pab yez Jerusalén. Tak mdodi'sla xa' ko xa' men ned sa tya kuj xa' Pab.

⁴ Le' Festo mkab ke Pab nge lizyi'b Cesarea, nde len' tiplata wiz yub Festo bere tya.

⁵ Nde nchab Festo lo xa':

—Jwan' nasa, re go' ta nak sin', tye go' ndan' yez Cesarea sa tez liga nchap mbi' ya yalke, tya tej go'y.

⁶ Ben' xonta wiz o si' wiz mbled Festo yez Jerusalén, nde mbere Festo Cesarea. Tedib wiz mdob Festo yolow nde mnabe' Festo ngwaxi' xa' Pab.

⁷ Sen' ngoteno xa' Pab, zya mbike gax re xa' judí, re xa' mbro' yez Jerusalén nde na'r toz re yalke nabi' mke' xa' yek Pab, per nekthiba na'ndloda ke li jwan' ndej xa'.

⁸ Zyasa mkab Pab lo re yalke ta mke' xa' yek Pab, nchab Pab:

—Ngen cho yalke mblin lo ley chan' judí, nek lo yodo' nde neka lo César xa' nyebe' Rom.

⁹ Le' Festo nchola's wen yan' xa' lo re men judí, sa mkab xa' lo Pab, nchab xa':

—¿Cho nchola's la yap la Jerusalén, sa tya nya'b na kwent loa?

¹⁰ Le' Pab mkab lo xa':

—Ten' nyebe' César ndoa na, nde nche' jwan' ndablo nya'b xa' kwent lon. Tak mnela lu, nek thib yalke namblit na lo re xa' judí.

¹¹ Tak tez mblin yalke jwan' ndablo gaj na, ngen kwan liy gaj na; per tez na'lida re yalke jwan' nke' xa' yek na, ngen cho taya' na lo ya' re xa' judí. Jwan' nasa nya'b na, César nya'b kwent lon.

¹² Zyasa mdodi'sno Festo re xa' nak sin' nzi tya, nde nchab Festo lo Pab:

—César nya'b kwent loa nchola's la, lo xa' yaa sa.

Pab ndo lo rey Agripa nde Berenice

¹³ Mbrid pla wiz, rey Agripa kon Berenis mbye'd xa' yez Cesarea sa mni xa' dyux lo Festo.

¹⁴ Nde tya mbre xa' na'r wiz, zyasa mdej Festo kwent chan' Pab lo rey, nchab Festo:

—Nche' mbla' Félix tib mbi' nge lizyi'b,

¹⁵ tak sen' ngwan yez Jerusalén, zyasa re xa' nak ngwley' nyebe' nde re xa' nak sin' lo men judí ngwana'b xa' lon sa gaj mbi' ta nge lizyi'b re'.

¹⁶ Per mkab na lo xa', nchab na, che'mod nak ley Rom, na'toyalta nyebe'n gaj xa' tata, nerla ndablo ndo xa' jwan' nchap yalke nde nzi xa' jwan' nke' yalke yek xa', sa tya tej xa' nyen' kwan nak yalke, nde xa' jwan' nchap yalke toyal kab xa'.

¹⁷ Jwan' nasa, sen' ngolo mbye'd re xa' lon, na'mbleta na na'r wiz, zyaga tedib wiz seba mdob na yolow, nde mnabe'n ngwaxi' xa' Pab lizyi'b.

¹⁸ Sen' nzila re xa' jwan' mdej kwan nak yalke, per na'ndeja xa' nek tib yalke jwan' mblin xgab.

¹⁹ Che'la yalke jwan' nke' xa' yek Pab nak, napta kwent chan' re jwan' ndli lazo' xa'y, nde ndej xa' ti mbi' ndole Jesús, Xa' ngujla nde le' Pab mbez naban Xa'.

²⁰ Nde na'nyet na xomod li men ti jwan' ta naka, jwan' nasa mna'bdi's na lo Pab cho nchola's xa' ya xa' yez Jerusalén sa tya taya' xa' kwent.

²¹ Le' Pab mna'bka, César nya'b kwent lo xa', jwan' nasa mnabe'n take xa' lizyi'b axta kebe' tel na xa' lo César.

²² Zyasa nchab rey Agripa lo Festo:

—Non nchola's gon xki's mbi' ba.

Le' Festo mkab:

—Ye' sa gon la xki's xa'.

²³ Tedib wiz, sen' mbro'to Agripa kon Berenice nyaga ndokwa' xa', nde sen' ngote xa' len' yolow kon re xa' nyebe' lo sondad nde re xa' ro lo yez, zya mnabe' Festo ngwaxi' xa' Pab.

²⁴ Nde nchab Festo:

—Rey Agripa nde reta go' ta nzi nche', bwi' go', mbi' ya jwan' re', reta men judí, xa' yez Jerusalén nde re men nche', ndetej xa' yalke chan' mbi' re' lon, nde taja nya'b xa' na'ndablotra' ban mbi' re'.

²⁵ Per ngwi'n nangenta nek tib yalke jwan' nsal' gaj xa', nde le'ga xa' mna'b ya xa' lo César, sa César nya'b kwent lo xa', jwan' nasa tya tel na xa'.

²⁶ Tak na'ngenta kwan ke'n lo ye's, tel na lo César xa' nyebe' lon, jwan' nasa lo go' mblo'ton xa' nche', loa rey Agripa, sen' mne mna'bdi's go' lo xa', sa zyal na jwan' ke'n lo ye's.

²⁷ Tak ndyak na, nawentay tel na ti xa' nge lizyi'b lo César, nde na'tejta na cho kwan nak yalke nchap xa'.

26

Pab mkab lo rey Agripa

¹ Zyasa nchab rey Agripa lo Pab:

—Toyal kab la sa laa lazo'a.

Le' Pab mblen yan' nde mkab Pab lo xa':

² —Rey Agripa, nale toz nzo lazo'n toyal todi's na loa naya, kab na lo yalke jwan' nke' re xa' judí yek na.

³ Tak lu nzoloa reta kostumbr chan' xa' judí nde mnea jwan' ta ncha ná' di's, jwan' nasa nya'b na loa, yap lazo'a gon la jwan' tej na.

Pab ndej xomod nak Pab pola

⁴ Axta lo yen' na, reta xa' judí mne xa' xomod mban na xij xa', ten' nak laz na nde yez Jerusalén,

⁵ noga mnela xa' nde toyal tej xa' ke axta yen' na nakla na men fariseo, tak re men fariseo nyebe' toz xa' xo'byek men ley chan' Moises.*

⁶ Nde naya, tak ngembed na jwan' mke'yek Dios lo re xa' gox lon' xa' mbre pola, jwan'na nak yalke mbrez xa' na ndon nche' sa nya'b xa' kwent lon.

⁷ Nde re thibsen xa' jwan' nde lo bin Israel, ngembed xa' sa gal ya' xa' jwan' mke'yek Dios, jwan' nasa yal' nde ndlyabe nzi li xa' sin' lo Dios nde jwan' naga ngembed na. Rey Agripa, jwan'na nak yalke nke' re xa' judí yek na.

⁸ ¡Mbay! ¿Cho kwan liy sa na'lid lazo' go' ngo'xban Dios re men nguj sa?

Pab nda' kwent xamod mbyi'no Pab re men ndli lazon' Jesús

⁹ 'Pola liga mblin xgab, rsin na nak lu'x na re men ta ndli lazon' Jesús Xa' Nazaret,

¹⁰ jwan'na mblin yez Jerusalén. Kon yalnyebe' chan' re ngwley' nyebe', mke' lizyi'b na bro toz xa' ndli lazon' Jesús, nde sen' mbij men xa', non mda xki's na.

¹¹ Nde nar toz gob ngwan plo ndob re yo ten' ndyop men Israel, tya ntotin xa' axta kebe' ni xin xa' xis Jesús. Ngi'notin na re xa', taja mkete'nke'n xis xa' axta re yez tij ten' na'nakta laz na'.†

Pab ndej xamod mbli lazo' Pab Jesús

¹² 'Jwan'na ngete lin, sen' ndan yez Damasco kon yalnyebe' chan' re ngwley' nyebe',

* 26:5 26:5 He. 8:3; 22:4-5. † 26:11 26:11 He. 8:3; 22:4-5.

¹³ nde jwan' nin lo go' Rey, lo ndon ned nde rolja wiza mbwi'n ti xni toz mbro' lo be' mas naro xniy ke lo xni wiz, mblay dib ten' ndon nde dib ten' ndo re xa' jwan' ndanon.

¹⁴ Sen' ngob re ná' izyo, zya mbin na mni ti Xa' lon kon di's hebreo, ne xa': "Saulo, Saulo, ¿Cho kwa'n liy ngetechoblaa na? Le'ga loa nkwan' la mas yalti, ta xa ndli ngon sen' nke'ni ma' xi ya nalé."

¹⁵ Zyasa nchab na: "¿Cho go' Xa' Nyebe'?" Le' Xa' Nyebe' ne lon: "Na nak Jesús, Xa' ta ngetechoblaa ba."

¹⁶ Goche nde btoli', tak jwan' re' ndli sa mbro'ton loa, sa tob na lu lia sin' lon nde tej la lo men jwan' mbwi'a nde re jwan' nara lo'n loa.

¹⁷ Tola'n la lo ya' re xa' judí nde re xa' na'nakta judí tak lo re xa' ya tel na lu,

¹⁸ sa xal' la ngud lo re men, ryo' xa' lo yal'kow sa ye'd xa' lo xni, nde ryo' xa' lo yalne chan' maxu' sa ye'd xa' lo Dios; nde lo lipa lazo' xa' na dyon' reta xken xa', nde kaya' xa' jwan' nkaya' re men nayon lo Dios."

Mxo'byek Pab di's jwan' mbin Pab

¹⁹ 'Jwan' nasa, rey Agripa, na'ndlit na yalneyek lo di's ta mbin na mbro' lo be'.

²⁰ Nerla mdobten mdej na lo re men yez Damasco,‡ yez Jerusalén§ nde dib lo xyon Judea nde lo re men na'nakta judí, mdej na lo xa' nakin' la' xa' re jwan' narax ndli xa' nde bere xa' lo Dios nde li xa' jwan' wen sa lo' liga mbla' xa' re jwan' narax.

‡ 26:20 26:20 He. 9:20. § 26:20 26:20 He. 9:28-29.

²¹ Nde jwan' nasa re xa' judí, mxen xa' na ten' ndob yodo' nde nchola's xa' kuj xa' na.

²² Per Dios ndla'sto Xa' na jwan' nasa ben' ndon axta naya, ndej na xki's Jesucrist lo re men ngeno yalnyebe' nde lo re men na'ngenode, na'ndlot na xa'la jwan', na ndlo' re jwan' mdej re xa' ta mbye'd ta' xki's Dios pola nde jwan' mdej Moisés re jwan' ta mdej xa' ndablo ak.

²³ Le' Crist ndablo ridka re yalti, nde Xa' ak Xa' ner jwan' ryo'xban xij re xa' nguj, nde ak Xa' xni lo re men yez Israel nde lo re men na'nakta judí.*

Nega ndo Pab sa li lazo' Agripa Jesús

²⁴ Laj ben' ndokab Pab lo re yalke jwan' nke' xa' yek Pab, zya ne mbrez Festo lo Pab:

—¡Ngosa' yek la Pab, nte'd toz la jwan' nasa mtosa'y yek la.

²⁵ Le' Pab nchab:

—Na'ngosa'da yek na, Festo xa' nyebe' ro, che'la di's lipa' nde di's gal' ta ndotej na.

²⁶ Nde rey Agripa mne xa' reta jwan' re', jwan' nasa nche' ndowi' xa' dib xla's ndotej nay; tak mnepa na ke no xa' mne xa' reta jwan' re', tak re jwan' re' na'ngoktay ten' naga's.

²⁷ Rey Agripa, ¿cho ndli lazo'a jwan' mdej re profet? Na mne ke ndli lazo'a ley.

²⁸ Zyasa rey Agripa nchab lo Pab:

—¿Cho yapa lud tira se ndyak la koa yek na sa li lazo'n Jesús?

²⁹ Le' Pab nchab:

—Tenye luda o broy, Dios nchola's ke na'nakta ben'ta lu li lazon' Jesús noga re xa' ta nzi yon

* **26:23 26:23** Is. 42:6; 49:6.

xki's na nayay, ak xa' xaja na re', per na'nakte kon kaden re'.

³⁰ Sen' ngolo ta nchab Pab, zya ngotoli rey, ngotoli xa' nyebe' lo re yez, ngotoli Berenis nde ngotoli re men jwan' nzino xa' tya.

³¹ Nde sen' nda xa' xa'ta tedib lad zya mdodi's re xa', nchab xa':

—Nekthib yalke na'nchapta mbi' re' sa gaj xa' nde nekla nsal' xa' ke xa' lizyi'b.

³² Nde nchab Agripa lo Festo:

—Ndoyal ndro' mbi' re' lizyi'b tez na'na'bta xa' ya xa' lo César.

27

Mtel' xa' Pab yez Rom

¹ Sen' mbyan'di's la xa' sa tel' xa' ná' lo bark par Italia, zyasa mxen xa' Pab nde kon tipla xa' jwan' nge lizyi'b sa mdaya' xa' xa' lo Julio, xa' nyebe' lo re sondad chan' August.

² Nde ngwap ná' lo ti bark chan' yez Adramitio, bark ya ndri'd reta yez jwan' nzi ro nitto' lo xyon Asia nde noga Aristarco ndano ná', ti mbi' yez Tesalónica lo xyon Macedon.

³ Tedib wiz mzin ná' ro nit yez Sidón, le' Julio wen mbli xa' lo Pab, mda' xa' di's ngwatwi' Pab re men nsal'ta Pab nde re xa' ya mblasto xa' Pab lo re jwan' nakin' Pab.

⁴ Mbro' ná' yez Sidón mxen ná' bark nda ná', mbri'd ná' gax lo xyon Chipre ten' na'ngenta mbi ntow' lo ná'.

⁵ Nde mbri'd ná' ngo' lo xyon Cilisia nde lo xyon Panfilia, tya mzin ná' yez ndole Mira lo xyon Licia.

⁶ Le' xa' nyebe' lo sondad ngosi'b xa' ti bark chan' xa' yez Alejandri, jwan' nda lo xyon Italia, nde mxap xa' ná' lo bark ya.

⁷ Nar wiz mdo ná' lo nit tak sow' nda bark nde nen toz mzin ná' ngo' lo yez Gnido, tak na'ta'da mbi di's tye bark, zyasa mbyek ná' cho lo xyon Creta, ngo' lo yez Salmón.

⁸ Nde ne toz nde ná' dib gax ro nit, zyara' mzin ná' yez ndole Wen Puert, gax cho yez Lasea.

⁹ Tak jwan' tozla mbri'd be' ndo ná' lo nit, nde ndyagaxla be' nxyo'b mbi nde yi, nathoz nzo lo nit par tye bark, tak mbri'd la be' ndyon' xken men*, jwan' nasa mtoni Pab re xa',

¹⁰ nchab Pab lo xa':

—Reta go' men bi', ngwi'n nathoz nzo lo nit ta ndan' naya, nzo ryes lux bark, lux re jwan' ndanoy nde axta na' nzo ryes lux na'.

¹¹ Le' xa' nyebe' lo sondad, na'ngonta xa' di's ro Pab, che'la mas mbin xa' xki's xa' ta ntote' bark nde xa' nak xwan' bark.

¹² Nde ro nit ten' nzi xa' na'wenta nak tya par yan' xa' dib be' nxymb yop, jwan' nasa re xa' mbli xgab ndablo ryo' xa' tya, sa nyen' cho tli xa' gan sin xa' yez Fenice, ro nitto' lo xyon Creta, ten' ndlo' lad la nde ga'p nde tya rid xa' be' nxyo'b yop.

Mxyo'b toz mbi nde yi lo nitto'

¹³ Nde mbli xa' xgab tli xa' gan nda xa', tak anta nagu's nxyo'b mbi jwan' ndryo' lad la, zyasa mxap xa' re yi'b jwan' ndyenke' bark nde nda xa' thita gax ro nitto' dib ro xyon Creta.

* **27:9 27:9** Jwan' re' nak ayuno lo di'sxtil

¹⁴ Per ludla ndatey mbro' ti mbi toz lad ga'p ndole Euroclidón mdina bark.

¹⁵ Nde mdobte mchep mbi bark, yaja na'ndlit ná' gan ngoneda, mda' ná' di's mbe' mbi bark.

¹⁶ Nde mbrid ná' axis ti izyo lud jwan' nax' xtow' nitto' ndole Claudia ten' ngentozta mbi, nde nen toz sa mbli ná' gan mxap ná' lo bark kano lud jwan' ndlya' men.

¹⁷ Sen' mne mxap ná'y lo bark, zyasa mbo xa' dib cho bark sa ne naka nde noga mzyeb xa' yotob bark lo yux ten' ndole Sirte, zyasa mbli xa' re lar jwan' nda'b lo bark sa mda' xa' di's mchep mbi bark.

¹⁸ Nde tedib wiz, masra' mbryo mbi, yaja mdobte mblobi xa' re jwan' nzo lo bark.

¹⁹ Nde sen' ngok mbyon wiz, lega re ná' mblobi ná' re jwan' ndli rsin' bark.

²⁰ Nde na'r wiz na'ndlada be nekla ndlo' re mbel nzi lo be', nde mxyo'b toz mbi taja mdin mbi ná', na'ngebetra ná' lya' ná'.

²¹ Na'rla wiz mbri'd tera' wa ná', zyasa mdoli Pab xtow' re xa', nde nchab Pab:

—Reta go' mbi', tez ngaka ngon go' di's ron na'ndro'd na' yez Creta, na'ndrita na' yalti re' nde ngenta kwan tyak na'.

²² Per naya, nin lo go', blo ne lazo' go', tak nek thib na' na'luxta, ben'ta bark lux.

²³ Tak yal'la mbro'to ti anj chan' Dios lon, Dios ta nak xwan' na nde lo Xa' ta ndlin sin',

²⁴ anj ya ne lon: “Pab, na'zyebta lu tak nakin'ka sin la lo César xa' nyebe' Rom, nde por lu sa lya' re xa' ta nzo lo bark.”

²⁵ Jwan' nasa nin lo re go', blo ne lazo' go', tak na, ndli lazo'n Dios, ta xa ne Xa' lon ta aka.

²⁶ Per te'nyega, nakin'ka yan' na' ti ten' nax izyo biz xtow' nitto' re'.

²⁷ Sen' ngoxo'b si'da yal' ndochep mbi ná' lo nit, zya mzin ná' nitto' ten' ndole Adriático nde rolja yal' re xa' jwan' ntote' bark mbli be' xa' gaxla nde izyo biz.

²⁸ Zyasa mchi'x xa' nyen' plopa na's nit nde na'sa galbsi' xop metr, zya mde bark tud nde bere mchi'x xa'y tedib gob nde tya na's galbwaz metr.

²⁹ Zyasa mzyeb xa' tak nzo ryes yodin' xan' bark xis ke, yaja xan' bark mkenga xa' thap yi'b jwan' tyenke' bark nde taja ngen lazo' xa' tyuxni.

³⁰ Zyasa re xa' ta ntote' bark nchola's xa' xon' xa' nde mxen xa' kano jwan' ndlya' men sa mxo'b xa'y lo nit, mbli xa' xaga ndli men ta ke'nga re yi'b jwan' ndyenke' bark.

³¹ Zyasa nchab Pab lo re sondad kon xa' jwan' nyebe' lo xa':

—Tez xon' re xa' re', pa li go' gan lya' go'.

³² Zyasa mcho' sondad do' jwan' ndenke' kano lud ta lya' men nde mbla' xa'y nday lo nit.

³³ Sen' ndetuxni, zya mbrez Pab yek re xa' sa wa xa', nde nchab Pab lo xa':

—Ndatela si'da wiz taja ndli toz go' xgab nde na'nchad go' nek lud jwan'.

³⁴ Jwan' nasa, nya'b na lo go', bda go' lud sa nawe yo lazo' go', tak nek thib yisyek go' nde nek thib go' na'luxta.

³⁵ Sen' ngolo mni Pab lo xa', zya mxen Pab pan, nzi wi' re xa' mda' Pab dyux lo Dios, mblirol Pab pan nde tolo mdobte mda Pab.

³⁶ Zyasa reta xa' ngone lazo' xa' nde tolo mda xa'.

³⁷ Lo reta ná' jwan' nzo lo bark, nak ná' ti chop ayo' nzo songal nzo sin' thib men.

³⁸ Sen' ngolo mda re xa' kebe' mse xa', zya mblobi xa' re trig lo nitto' sa mxyax bark.

Mblatha'b bark len' nit

³⁹ Sen' mduxni, re xa' ta ntote' bark na'ngyolod xa' ten' nda xa', per ngoni lo xa' ti ten' nak ro nit lad lo yux, nde mchal xa' mchep xa' bark tya.

⁴⁰ Mcho' xa' re do' chan' yi'b jwan' ndenke' bark nde mbla' xa'y len' nitto', mtole' xa' ya jwan' nchoned bark, le' lar jwan' nda'b lo bark mxap xa'y gap lo mbi nde mdobte nda bark ro yux.

⁴¹ Per ngotu bark ti ten' nchak chop lo nit nde tya mblatha'b bark che' ngwa'd xi bark lo yux nde ngenta cho kwina, le' xan' bark nyaga mdin bdey nde mdobte ndobila.

⁴² Le' re sondad nchola's kuj xa' re xa' nak pres, sa na'xo'nta nek thib xa'.

⁴³ Le' xa' nyebe' lo sondad, na'nchola'sta xa' gaj Pab, yaja na'ndad xa' di's nguj sondad re pres, nde mnabe' xa' xanya xa' nij nit sa ner re xa' ya yobi lo nit sa sin xa' ro yux.

⁴⁴ Nde re xa' jwan' na'akta nij nit mxen xa' re ya tab nde mxen xa' re pedaz jwan' lad bark, lo jwan' na mxyo'b xa' nde tamod ngotey, reta xa' mblya' mzin xa' izyo biz.

28

*Pab ngete izyo jwan' nzi xtow' nitto' ndole
Malta*

¹ Sen' mblyala re ná', zyara' sa mne ná' Malta ndole izyo ta nzi xtow' nitto'.

² Nde re men nzo tya wen toz xa' lo ná', mtol' xa' ki nde mbrez xa' ná' sa zyen ná' tak ndo yi nde jwan' toz nal.

³ Zyasa mthop Pab lud xod ya bis ngego Pab lo ki nde xija mbro' ti mbel' ndaxon' ma' lo xlye nde mke' ma'y ya' Pab.

⁴ Le' re men nzo tya lo mne xa' ngenga mbel' yen ya' Pab, zya nchab xa' lo ta xa':

—Nzo pa xa' guj men xa' ba, jwan' nasa ne mblyala xa' lo nitto', jwan' nak gal' na'ta'de di's ban xa'.

⁵ Zya msib Pab ya' Pab lo bel, sa ngob mbel' nde ngenta kwan ndak Pab.

⁶ Reta men ngembed xa' lya ki Pab o zyaga gaj Pab nde bro toz mkembed xa' nyen' kwan tyak Pab per ngen kwan jwan' narax ndak Pab, yaja mzye' xgab re xa' nde nchab xa' ke dios nak Pab.

⁷ Gax tya nax pla izyo chan' ti xa' ndole Publio xa' ntak lo yez jwan' nax xtow' nitto', nabe'z toz mkaya' xa' ná', mda' xa' liz xa' mbled ná' son wiz.

⁸ Nde xud Publio nayiz, nax xa' lo lon' nzo xlye xa' nde ndyak xa' chi'd ren; zya ngote Pab len' yo sa mbwi' Pab xa', sen' mne mna'b Pab lo Dios, mxo'b ya' Pab yek xa' nde mdyan' xa'.

⁹ Lo ta ngok jwan'na, masra' re men nayiz, xa' nzo tya mbye'd xa' lo Pab nde taga' mdyan' xa'.

¹⁰ Nde jwan' toz mda' xa' dyux lo ná'; sen' ngwap ná' bark, mtel' xa' re jwan' mas nakin' ná' ned.

¹¹ Sen' ngoxo'b son mbe' nzi ná' tya, ngwap ná' lo ti bark chan' xa' Alejandrí, tak no xa' mbled tya dib be' jwan' mxyo'b yop; le' lo bark nge chop mnab jwan' ndole Cástor nde Pólux.

¹² Sen' mzin ná' yez Siracusa, tya mbled ná' son wiz.

¹³ Nde tya mbro' ná' nda ná' thipta ro nit mzin ná' ti yez ndole Regio, nde tedib wiz mdobte mxyo'b mbi ned jwan' nde ná', jwan' nasa ngok mbrop wiz zyara' mzin ná' yez ndole Puteoli.

¹⁴ Tya mzyal ná' pla wes nde mna'b xa' lo ná' yan' ná' lo xa' gaz wiz; xisa mbro' ná' nda ná' yez Rom.

¹⁵ Sen' mbin re wes ke ndozin ná', zya mbye'dxi'ned xa' ná' axta lo xbi' ten' ndole Apio nde ten' ndole Son Tabernas ten' mbed men. Sen' mbwi' Pab re xa' ya, mda' Pab dyux lo Dios nde ngo nale lazo' Pab.

¹⁶ Sen' mzin ná' Rom, le' xa' nyebe' lo sondad mdaya' xa' re pres lo tib xa jwan' nyebe'ga lo reta sondad, le' Pab, mda' xa' di's xa'ta ngo Pab nde ti sondad mgenap.

Ndej Pab xki's Dios yez Rom

¹⁷ Sen' ngoxo'bla son wiz jwan' mzin ná' yez Rom, zya mbrez Pab re xa' nyebe' lo men judí nde sen' ngolo mdyop re xa', zya nchab Pab lo xa':

—Wes na, ngen cho jwan' narax mblin lo re mayez xa' judí, nekla mblin narax kon re mod gox jwan' mtan' re xa' gox lon' mbre pola per mke' lizyi'b xa' na yez Jerusalén nde naya ndetaya' xa' na lo men nak sin' yez Rom.

¹⁸ Nde sen' mna'b xa' kwent lon, ngen cho yalke mzyal xa' jwan' nzal' gaj na, jwan' nasa ndonke xa' ndla' xa' na.

¹⁹ Per re xa' judí na'nchola'sta xa' la' xa' na, jwan' nasa mna'b na tel' xa' na lo César,* na'nakte tak ncholas na ken' yalke yek re xa' las na.

²⁰ Jwan' nasa, mbrez na re go' sa wi'n go' nde todi'snon go'; tak xke jwan' nkembed re na' ta nak men Israel, yalke ya sa nagon kon kaden re'.

²¹ Zyasa nchab re xa' lo Pab:

—Tera' kaya' ná' nek thib ye's jwan' mbro' Judea jwan' ndej kwent chan' la nde nek thib wes jwan' nke' yalke yek la o ni narax xis la tera' ye'd xa' nche'.

²² Per nchola's ná' gon ná' kwan nak xgab la, tak kwan liy sa reta lad narax ni men xis jwan' ta ngetetej la ba.

²³ Zyasa mbli xa' ti wiz dyop re xa', nde wiz ya bro toz men mdyop lo Pab, sa mdobte mdej Pab jwan' nak yalnyebe' chan' Dios lo xa', xata mdobte Pab til' nde axta bzye. Mchal Pab li lazo' xa' Jesús sa mdej Pab lo xa' jwan' nak ley chan' Moisés nde xki's re profet.

²⁴ Nzo xa' mbli lazon' jwan' mdej Pab nde nzo xa' na'ndlid lazo'ne.

²⁵ Nde lo ta na'nzal'di'sta xki's re xa' zya mdobte ngo xa' ned nde nchab Pab lo xa':

—Jwan' naga sa, por Mbi Nayon mni Profet Isaías lo re xa' gox lon' mbre pola, nchab xa':

²⁶ Wa yez ba nde gus lo xa':

Nchon go'y kon nza go', per na'yenta go'y, nde wi' go'y, per na'yolod go'y.

* **28:19 28:19** He. 25:11.

²⁷ Tak ngok ne lazo' re mayez re',
nde now' nza xa' na'gonta xa' di's,
nde now' ngud lo xa',
tamod sa na'yonid ngud lo xa',
nekla gon xa' di's kon nza xa',
nde na'yenta xa' dib nzo lazo' xa',
nekla bere xa' lon sa todan' na xa'.[†]

²⁸ Nde naya ndablo nye go', le' re xa' na'nakta judí,
xa' ya kaya' yaltola' chan' Dios, nde re xa' ya ton
xki's na.

²⁹ Nde sen' ngolo ta nchab Pab lo xa', zya tolo
ngo re xa' judí ned nde taja ndaya xa' di's.

³⁰ Chop lin' dib ngo Pab ti yo ten' mdi'x Pab nde
tya mkaya' Pab reta men jwan' nda lo Pab,

³¹ dibxla's ndej Pab yalnyebe' chan' Dios nde
ndlo' Pab xkis' Jesucrist lo re men, nde ngen cho
xa' nka di's lo Pab.

[†] **28:27 28:27** Is. 6:9-10

**El Nuevo Testament en el idioma Zapoteco
de Loxicha**
**The New Testament in the Loxicha Zapotec language
of Mexico**
El Nuevo Testament en el idioma Zapoteco de Loxicha
copyright © 2025 Wycliffe Bible Translators, Inc.

Language: Loxicha Zapotec (Zapotec, Loxicha)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

968619e6-cca2-5898-b8d1-3b961f3e1c32